

中華民國五十六年五月臺初版

近代中國史料叢刊 第七輯

精裝十二冊

定價新台幣



上

主編者：沈雲龍

發行人：李振華

出版者：文海出版社
臺北縣永和鎮中興街99巷8號

郵政劃撥戶第二七八四號
電話九二一二六五九號

印刷者：美明美術印刷廠

臺北市康定路二〇二號

經銷者：全省各大書局

版權所有

內政部登記證內版臺業字第〇八〇〇號

記載類

戴省長劉軍長顧師長鑒自軍務結束以來不幸蔡公中道殞殂以川事付託我輩川亂如麻自古號稱難治彼此果能各抒智慮捐除私見同舟共濟何難克臻治理淺識者流不務息事寧人輒欲揚湯止沸甘鷓蚌之相爭快漁翁之得利竊所大惑當袁氏秉鈞專以操縱政黨供其魚肉進步派亦曾助袁以壓迫國民派國民派倒而進步派亦隨之當是時民氣墮落國勢消沉其後國民進步合力以倒袁袁死而國基再造重見天日今黨爭又恢復原狀矣承曠素無黨籍亦不知黨派作何解竊意際此歐戰擴張巴爾幹問題已解東亞大陸問題其亡其亡繫於苞桑凡有血氣之倫均當肝胆共照一致對外若徒自相交關爲他人作嫁此其所大惑者一也段氏襲袁故態素未開誠布公專與西南當局者事事爲難謀浙之後繼以圖川羅督軍賦性深厚臨事不苟我輩同

心協助夫豈無濟今者羅督將去而江朝宗輩來彼等歡迎以媚之者是也抑知北軍南來飲馬大江能保彼等之有幸耶即使有幸川民何辜再堪糜爛此其所大惑者二也縮減軍力以輕川民之負擔桑梓所關義不容辭乃竟敢擁兵自衛擅電攻訐忍於破壞義軍根據地墮司馬氏之狡謀此其大惑者三也承嶽明知逆耳之言不足動聽唯不忍以千萬頭顱所博得之共和基礎一朝而去之故敢略責愚忱幸垂聽焉川邊鎮守使殷承獻叩青

辛亥以來滇軍兩次入川騷擾地方擄劫巨款全川父老共見共聞去年秋間該軍司令羅佩金又在資隆內簡各屬藉口搜捕周王餘黨抄擄民財不可勝計殺戮無辜慘無天日本軍長以同胞起義之故不忍加誅乃該軍入省以來益復肆無忌憚既屢運大批雲土入川破烟禁以漁奸利更於陰歷除夕及正月五日在省城及彭縣等處先後作亂殺人越貨若非川軍及各方面竭力設防省城一帶何堪設想不甯非是羅氏自膺署督以後大倡雲南政策破壞國

家統一強滇弱川爲子孫萬世之計故其初在川滇軍不過兩旅比及羅任督軍陸續由滇招來徒手七八千人卽以川省兵工廠所趕造及解散川軍之槍械畀之遂增加至兩師之衆當此國困民貧蜀又新遭兵燹亟應減兵以紓民力乃羅氏反將滇軍增至兩師非喪心病狂而何況其待遇川滇兩軍厚薄懸殊川軍每師每年餉銀八十萬滇軍則每師一百二十萬川軍減去騎砲工輜各科而滇軍則於正額以外巧立護衛團及衛廠營種種名目添置多兵其意何居路人皆見川軍各師爲保全大局起見始於月前聯合本師據情入告幸中央明見萬里電准查辦嚴斥羅督詎渠怙惡不悛日前又乾沒四師欠餉巨萬恐其不服乃以大隊滇軍迫其繳械已畢無力抵抗更生擒千數百人殺於新東門等處以示威纍纍陳尸萬目共睹窮凶極惡曠古無儔川軍聞之髮指背裂而羅氏猶以爲未足更欲斬草除根遂於本月十八夜分兵三路一由武備街襲擊本軍司令部一向羊市街一遶道通惠門夾攻二師砲團又有先期

藏匿少城滇籍軍官家內之便衣士兵同時突起八面圍攻當此之時本軍長仍復顧全川局嚴束士兵不許還擊詎期該軍盡力猛攻我軍官士兵多名西北兩較場同時垂陷二師人人迫於萬不得已爲正當防衛計始以一矢相加此後情形想爲在省中外人士所共見該軍志不得逞乃由所駐城上猛潑煤油縱火焚燬民居數千家屠戮人民四千有奇哀號之聲震動天地黃巢李闖無以過之本師目擊心傷冒險救火乃該軍慘無人道復用機關槍乘機猛射我救火士兵無算野蠻之狀罄竹難書要之本軍長有維持桑梓之責平生德薄不能化及豚魚致令小醜跳梁川民塗炭撫衷自責哀痛難名合向國民引咎並將經過事實詳告中外俾免誤會特此佈告咸使聞知

第一軍司令部啟

一 据機關槍官報告華陽縣潰散警備隊匿于高等審判廳內午后一時由廳越牆至本營房上經衛兵查覺卽向衛兵射擊登時搜拿渺無踪跡因該縣

知事係滇人未始非滇軍所嫉使

一据八團二營報告該營步哨在西馬棚街拏獲川奸繆選廷供稱受副官王海清之託遂約同數人到少城四路放火焚燒民房事後另有酬費

一据八團二營報告午后六時在大西街拏獲放火滇軍二等兵李永清并搜獲雙筒五子槍一支子彈五十四發水瓶一個

一据騎兵團報告老東門出入人等衣服稍華麗者即排往新東門處死刻下處死不下二百餘人

一据工兵營長報告羊市街莊鄧兩公館藏有滇軍奸細希圖放火

一据騎兵二團報告總府街太平街東大街一帶之滇軍步哨已經撤回滇軍即在各街拉夫聞有退出省城之信滇軍并在各街肆行搶劫

一据機關槍營報告拏獲竊取民財之滇軍伍貞卿一名送請訊辦以快人心
一据機關槍營據探報東較場滇軍將警務處槍枝軍服概行搶盡并殺無辜

百姓多人

一據工兵營長報告探報本日出城滇軍已全數開回城內滇軍警戒各街口均暗藏洋油準備燒房

羅佩金蹂躪成都實在情形

(一) 滇軍既以大隊圍攻川軍復將督署內辦事川人約二三百人盡行屠戮

(二) 武城門警察探訪所共有員兵十九人概行殺戮逃脫者僅一人耳

(三) 東較場所駐滇軍一團將川人之着普通服者殺有七八百人均將屍骸拋下武城門外其殺戮時指爲四師退伍者綁於城垛用刺刀戳死並有挖去心肝烹吃者

(四) 滇軍一面施行攻擊一面由督軍署內用水槍吸射洋油潑燒民房火燄冲天三日夜始息警兵登屋救護者概被轟斃淨盡

(五) 開花彈打壞房屋甚多中砲死之人及燒斃者將近萬人

(六) 后子門左邊燒至人販子街右邊燒至東御河街小紅土地廟口花家公館止東西二巷各燒半節皇城壩燒至三橋止西御街燒至清真寺止東御街燒至樂陽店止東鷺市永清街皮房街各燒去半節約計不下五千戶

(七) 后子門三橋西御街三處當舖均被滇軍搶劫東華門當舖東轅門街東華門街提督西街口以及中順城街東西御河邊街大小紅土地廟街各商家均被督署內之滇軍輸出搶劫

(八) 東較場之滇軍在省內東北角街道搶劫財物并有姦淫等事

(九) 滇軍退出東門外時又在城外街道以及鄉下大肆搶劫

(十) 省中投攷講武堂各官約千餘人亦被滇軍殺戮無遺
災民蘇澤之等去電

成都去電北京大總統國務院參衆院大理院四川同鄉會南京副總統重慶查辦使鈞鑒昨見報載戴省長呈覆中央電內稱羅督出城後住兵工廠現正料理行裝及其所部并無何項舉動亦未有在城劫掠兩日之事等語不勝惶駭竊災民等此次無辜受滇軍焚燒殺掠冤慘萬狀業經分別具呈靜候使節蒞臨查明辦理戴省長爲一省長官不能爲民請命乃轉爲滇軍諱莫如深是將令災民等冤苦長埋更無撥雲之日情實難甘爲此仰懇電飭查辦使迅行赴省會同戴省長親勘如災民等所呈屬虛均甘倍坐倘係戴省長甘心抑遏冤情想政府顧念民瘼必能秉公究辦也成都災民蘇澤芝程伯恩洪聯芳等七千六百八十五人同叩

唐繼堯覆川紳電

日前各界致電滇督已誌本報茲得滇督唐繼堯覆電云重慶蒙裁成梅樹兩及各界諸君鑒巧電悉川事既奉中央派員查辦卽應靜候解決在川滇軍早

經迭飭嚴守紀律矣滇督敬印

曾督辦懇兩使早臨

籌賑局曾督辦電渝云王 張兩大使鈞鑒前奉巧電同省長會覆計邀察覽
此次變起鑑於四月馬日即因防地未通僅以給米散炊暫濟眉急現計捐存
各款約亦可集兩萬圓擬即定期散放仰副盛意尊匯二數瀝由省署併入京
款核辦來蘇望切伏懇早臨爲叩曾鑑養印

黔軍已由渝西上

重慶快郵云川東師範學堂地點（即舊學院考棚）所紮黔軍已於昨二十五
號整隊出城向省開拔云

補誌戴兼督兩電

頃接北京快郵據公言報載戴兼督兩電於川事頗有關係茲補誌於左閱者
諒不以爲明日黃花也第壹電云感及勘壹二電均奉悉川滇破裂後積憤之

餘互相仇視顧電所稱皆有其事劉電所稱如云張旅長邦本等曾被滇軍擒去然非在黔軍區域內業經分電飭兩軍放還先後交由省署轉交其遇害者尙待確查設法撫恤至兩軍作戰時外縣所駐川滇隊或因清鄉回省或聞風赴援羣赴省門途中相遇如簡陽新店子坡以未奉到停止戰鬥之命故有此衝突省中停戰戡已嚴飭回防各已遵辦此後外縣皆未聞有川滇兩軍作戰行爲至羅督出城後住兵工廠現正料理行裝及其所部並無何項舉動亦未有在城劫掠兩日之事總之此次之事本非尋常禍變士兵含憤不無過情之舉迨經曉以大義恍以利害目前幸須悔禍尙就範圍惟瘡痍滿目急待撫綏軍隊林立尤須安插奸人播弄謠詠未息戡惟有竭智盡能處以鎮靜而已至劉電稱滇發援師一團抵叙一事由昭通開拔等語查在省滇軍現均陸續開行滇省自無助援之必要劉電亦恐未確除壹面仍派探查明如果事出有因當卽電阻以免糜勞昨始奉到合併聲明云云

第二電云此次成都事起滇軍有回省者以至簡陽與川軍相遇遂互相攻擊迨省城停戰均飭回防此外未聞開赴川北亦無資中作戰情形川議員所云自係道遠傳聞之誤至滇軍駐紮當以川南一帶爲宜容俟設法改編後再行妥酌指定分別安插不至再生衝突云云

三師與滇軍衝突詳情

日前簡陽及新都兩處第三師軍與滇軍作戰其情形已紀前報茲得其詳情如左

▲新店子方面 新店子地方於省城兵擾以後被匪屢次搶劫三師十一團楊營長率兵進駐到時該場附近張家巷芍家灘對岸已有滇軍何旅長率兵一團并有大砲機關槍等埋伏於此楊營長猶以中央嚴令停戰未便開釁特爲嚴密戒備而滇軍竟忽開槍四面猛力圍攻楊營長以少禦衆抗戰不支不得已乃漸次退却聞滇軍到場後不特肆行殺劫并將該場房屋焚燒過半方

長嘯而去

▲簡陽方面四月十八號成都兵閔三師鐘師長即飛令步兵十團團長張鵬舞率部近駐安岳樂至簡陽方面堵截滇軍張團長探得滇軍約有兵一團由內資向成都前進遂飛令該團一營長何疇進據簡陽二十二夜何營長抵簡城滇軍前哨已達距簡陽城二十里之新市舖何營長即作一函先交簡陽官紳閱後然後遞送滇軍大意勸滇軍停兵資陽等地勿與我軍衝突不必同胞互相殘殺誠懇懇約萬餘言乃滇軍不聽仍然盲進至兵臨簡城五里許何營長又作函請勿衝突滇軍不允猛進轟擊兩軍遂鏖戰於簡陽城外十里許之雞公嘴白塔壩旗盤山等處滇軍不支已漸退却突由臨江寺方面增入滇兵步兵十連及砲兵機關槍將何營四面進攻何營官兵猛勇血戰自午前七時至午後六時終以寡不敵衆遂漸向樂至方面退却是役也滇軍斃百餘人內有營長一員連長一員傷者約二百人何營僅陣亡士兵十餘名損失快槍

二十餘支并奪得滇軍快槍十餘支夫以奔馳四晝夜之疲卒淒風苦雨之時節猶能血戰十三小時之久始行退却則川軍雖弱固亦未可輕犯也

▲附錄各往來電文如左 致北京電萬急北京大總統國務院陸參兩部鈞鑒川滇軍隊前在成都開砲攻擊幸經中央馬日明令解決我大總統總理總長仁民愛物對於此次事變不偏不頗曲爲調處不使戰禍稍延一日其所以保全地方獲惜人民之至意祇奉之餘欽感莫名師長當卽轉飭所部各旅團營遵照辦理在案惟查本師部隊駐防各地距離爲遠交通不便傳達命令動需時日乃於本日忽接第十團團長張鵬舞報稱該團第一營在簡陽方面與滇軍已起衝突等語師長竊查該營既與滇軍接近彼此或以誤會致起衝突因卽飛令嚴飭勒限該營迅速退避一面電呈戴督軍并懇迅予令阻滇軍勿再攻擊除分別呈令外理合瀝陳所有情形伏候均裁可否飭下暫兼署四川督軍就近設法阻止滇軍前進攻擊不勝迫切待命之至四川陸軍第三師師

長鍾體道叩宥

▲致北京電萬急北京大總統國務總理陸軍總長參謀總長鈞鑒華密昨呈宥電諒達鈞覽頃接步兵第十一團團長郝焘報稱據第一營長楊瑞立報告本營奉令進駐新店子附近保護地方殊二十三號夜滇軍由新店子之上下游偷渡二十四號拂曉以大隊繼進合計兵力步兵三營並有大砲數門機關槍數挺向我軍猛力圍攻傷亡連長夏鼎一員士兵數十並將新店子焚燒我軍還擊滇軍亦有死傷等語團長本擬立率二三兩營及輜重營前進增援適奉師長轉到中央停戰之令當飭所部退駐姚家渡不與滇軍接近免啟弊端等語師長竊查川滇兩軍勢成水火稍一接近衝突立生特懇大總統總理總長迅令戴兼督軍嚴飭成都附近川滇軍胥不得再行進逼尋衅以免糜爛地方不勝迫切待命之至四川陸軍第三師師長鍾體道叩

▲北京來電鍾師長鑒宥電悉簡陽衝突已飭該團退避宗旨甚善已飛電戴

督查明阻止將來自有是非此時惟以保全防地爲要院豔

▲北京總統府軍事幕僚處來電鍾師長鑒華密奉大總統發下盛電悉郝團長熹已飭所部退駐姚家渡免致接近起釁甚是已電令戴督軍嚴飭川滇軍隊各遵約束不許再有衝突情事總統府軍事幕僚處

▲北京國務院來電鍾師長華密宥感兩電悉川滇兩軍不得再行接近所見甚是已電戴兼督嚴飭仍希約束所部力持鎮靜爲要特覆院部儉

▲旅京同鄉列列先生鈞鑒感電悉據張團報告滇軍以一團之兵力攻我駐簡何營幸該營向稱能戰抵抗至十三小時之久始退守樂至待援兩軍傷亡計在百人以上團長擬即時率二三兩營暨機關槍營砲兵連前進攻擊等語又據郝團報稱據第一營營長楊瑞章報告本營奉令進駐新店子附近保護地方殊於廿三號夜滇軍由新店子上下游偷渡二十四號拂曉以大隊繼進合計兵力步兵二營並有大砲數門機關槍數挺向我猛力圍攻傷亡連長夏

鼎一員士兵數十名並將新店子焚燒我軍還擊滇軍亦有死傷等語團長本擬立率二三兩營及輜重營前進增援適奉師長轉到中央停戰之令當飭所部退駐姚家渡不與滇軍接近免起釁端各等語查此次成都變起道初恐省會糜爛延及地方並恐外駐滇軍並攻省城以致菁華盡竭故令各軍前進防視期於兼顧滇軍盡住交通便利地方中央停戰命下尙敢率隊襲擊我軍非不能戰祇以中央既明令解決川事何敢違抗故於張郝兩團報到時當卽飛令退守一面分電總統總理戴督軍嚴飭滇軍不准再與川軍尋釁以免糜爛地方并請公等再瀝陳政府俾川亂可以止息是所切禱道叩儉

各師長致北京電

各師長致北京電云大總統國務總理鈞鑒華密竊師長等前以羅督辦理裁兵不公不平呈奉院電飭候撤查師長等遵卽維持秩序靜候解決一面體念財政艱難當將裁兵事件極力進行惟昨羅督因病請假令准入覲川人全體

冀幸昭茲近羅督口稱決不去川未知何所憑藉竟視中央若無且日令滇軍領給大批子彈又復集中兵力於貧簡一帶以拊制川軍第一師一方集兵力於成都附近以進逼川軍第二師儼若大敵當前準備征戰近又聲言已經請准檢查各師文電並非軍興施行戒嚴風聲所佈無不惴惴至川各師處境尤危師長等不敢自誤誤國特再籲懇伏待後命若不亟予解決師長等即欲擔負維持秩序之責將恐事變暴發力有未能謹此電聞川軍師長劉存厚周道剛鍾體道陳澤沛熊克武叩真

田爾公等致議會函

二十七號有田雨公彭望如等致省議會一函云省中惡劇無待贅言兩使既到渝城是非自有公論昨閱前報載外邦人電云戴省長麻木不仁又云完全是劉存厚之過兩語先入滇人繼電竊幸中央明如日月仍以戴省長兼署督軍並還劉軍長之頭銜兩者之舉已悉羅奸寓以調和保我蜀土頃閱報載有

請中央以羅氏復督吾川揆此情詞前日囑外人以麻木不仁四字是誣戴也完全是劉之過是害劉也誣戴害劉實爲今日請命復督之計也計雖不行藉候查辦之名徘徊敍富之間有隙可乘實行侵略然我輩同居水火之中尙思補救之策卽如反正之際黔省首領滇味與我蜀人三受其毒同病相連孰肯忘之今戴兼督以受微疾之苦藥投我病重之良劑公民等現擬電中央改兼署爲特任以便徐徐治理伏念貴會全省代議爲此函請一致進行爲吾川七千萬人計幸甚幸甚臨穎神馳恕我諒我云云附呈電文一紙見昨報

補誌羅佩金自辯之電文

北京公言報載此次川省變亂起於裁兵問題目下川省人士多謂羅督軍裁兵辦法有欠公平茲覓得從前羅督軍辨誣之原電報照登於左閱者勿以過日黃花見諂也

大總統國務院副總統鑒川省自軍興以後軍隊驟增佩金受命之初卽謀嚴

加裁汰但恐荷槍四散必至全省騷然乃將有鎗械者暫行編制成師以期蒼頭異軍可歸口勒長槍利器藉便收回然供億浩繁餉糈奇絀非亟謀收束則後患無窮前同王檢察使戴省長會擬辦法電請核示旋中央核准滇軍暫留一師一旅黔軍暫留一混成旅一團川軍照五年度預算範圍再加減少特種兵一律緩設等因自應遵照辦理故川滇黔各軍一律分裁一秉至公并毫無成見頃見北京順天時報登載五師電文所言殊多失實佩金遵奉中央命令整軍節餉勞怨所不敢辭然是非混淆於軍政前途梗阻實多茲謹將該電中誣妄各節逐一詳之滇軍歲費百八十萬黔軍歲費九十萬此乃照現行章制核計前經會電呈奉中央暫准然尙未蒙指撥而川省財政奇絀財廳每月認解七十萬元以現在實支軍費計之川軍五師一混成旅滇軍二師黔軍一旅五營加以軍事機關及川邊經費併漢軍月約需一百零八萬七千餘元實屬不敷甚鉅然爲收束川滇黔各軍俾就核定預算範圍一面爲維持現狀計自

不能不量入爲出酌量分配故滇黔軍所領經費與川軍并無厚薄之分此在省署財廳皆有案可稽無可掩飾乃謂主客相形顯分厚薄此其誣妄者一查五年度預算核定川省軍費六百零五萬除軍事機關及漢軍經費外川省軍隊定爲兩師兩旅每年應支軍餉二百七十五萬八千四百元前奉中央電令川省軍費以五年度核定數爲準係合滇黔軍而言今滇黔軍已劃出應照預算再加減少川軍有五師一混成旅擬裁爲三師兩旅較諸舊額已多一師軍餉定爲每年共三百二十萬元亦較舊額多四十餘萬不得已乃酌裁漢軍并減裝具及兵工廠等經費四十八萬餘元移充川軍軍餉乃尙以爲分配不公此其誣妄者二軍興之後軍隊淆雜軍官程度不一整頓極難故暫設講武學校就各師現職軍官及裁減軍隊無可位置之員選送肄習非新招學生可比且學生名額定爲五百名計由川軍錄取者三百餘名由滇黔軍取錄者百餘名川軍學員約占全校五分之四乃云講武學校多納滇人此其誣妄者三滇

軍由蔡故督統率入川者四梯團并一警衛隊至第一次停戰期間續調第三軍一梯團以資援應除特科不計外步兵有二十一營及二次停戰期滿預備作戰又調入川者有黃毓成劉法坤所部步兵十二營騎砲工機合計共六營他如電信軍警衛生憲兵各雜項隊伍並甫到成都即行解散之王潭支隊尙不在內合計以上兵額滇軍有無二師不辯自明乃云詐稱兩師明減暗增此其誣妄者四四川兵工廠所造槍彈因前年軍興以後蕩然無存佩金護任以來該廠雖廣續製造惟因歐戰影響鋼料缺乏所出鎗枝爲數較少計自上年八月迄今計出步槍七百餘支馬槍二千四百餘支子彈二百餘萬發除槍一項歷年散出已多現在正謀收回新製各槍未便驟予發給外子彈一項則各師爲清匪所用者皆酌量核發數月以來計已發出一百餘萬顆乃云新出槍彈悉供滇軍此其誣妄者五四川省迭經事變府庫空虛加以匪患未清收入銳減軍隊既多餉需奇絀計自上年八月起至本年三月止由財廳逕解本署與

各道撥交各師以及稽核分所撥留鹽款共收入七百六十餘萬元而支出軍費以及遣散恩給等臨時費用共八百九十餘萬元入不敷出多至一百二十餘萬元不得已乃爲由護國軍銀行護國軍軍需處造幣廠兵工廠等項挪墊開支然挹彼注茲終形竭蹶計各軍隊及軍事機關應支納項蒂欠一百餘萬元此皆有實數可稽前經詳報中央并咨送省署備查有案乃云各項預算未盡照支多爲暗中挪移別用此其誣妄者六佩金自奉命督川適值大亂之後補苴罅漏智力俱窮數月以來毫無治狀溺職之咎實有難辭然擁護國家之統一維持地方之治安耿耿此心可誓天日乃各師欲阻撓裁兵節餉之急務而橫被以營私誤國之惡聲僅關係一身本無足辯然危詞聳聽實有辯言亂政之虞故敢披瀝陳明伏乞俯賜鑒核暫署四川督軍羅佩金叩灰印

知恥室日記（節錄關於亂事之見聞）

十八日陰晴參半夜半微雨午前十二時及友人游青羊宮途中聞友言昨晚

予回家稍宴爲軍人所阻幾不得歸幸距家已近婉言以告乃能通過蓋因川滇黔各師合計將近十萬財賦有限頻勞呼庚裁冗省費理勢必然故也近則鴻溝分界儼如敵國夕陽既西則戎服荷槍之徒集隊往來竟夜戒備行路之人多被阻止今晚秉燭之游予將爽約子亦可以不往免生意外危險予諾之然猶以謂省會乃爲四方輻輳之地執政者當存投鼠忌器之心乃午後七時槍聲忽發似在少城東門街方面人聲一時大譁於是四面響應槍聲隆隆全城鼎沸交關約數小時天雞初唱夜雨浙瀝戰情因以息止而槍聲猶如清秋冷杵其聲斷續也予聞槍聲始感予友教予爽約之善而家中婦孺如聞霹靂懼而投箸臥伏於地相與聚匿時值下浣月色晦暗風雨交至砭人飢骨皆不耐寒隱几而臥

十九日○日○昧爽切切嘈嘈槍聲又急則西較場所駐川軍砲團與督署互以開花砲轟擊聲浪則震驚百里彈道如慧星經天加以機關槍五子槍錯雜

其間有若除夕守歲靜聽爆竹之時矣朝曦破曉曙光斂霧豈天顏之霽實天威之怒耳午后又幸稍止惟督署城上鳴手機關槍百餘響時緩時急而已○防本巷步兵約十餘人故昨夜槍聲不絕於耳今曉又將比鄰各戶之門敲開荷槍入內或隱女牆以便射擊或升樹杪以窺敵情亦無騷擾情事而予家并未進來或以此非用武之地耶惟門外階石被其折毀砌成石堡○本宅適當戰綫危險萬狀時有流彈擊屋成窟隨破礫齊墮榻前家人震懾胆幾欲裂昨夜既未安寢今朝亦覺忘食且寢門未闢市無行人相對相當心亂如麻已至薄暮饑疲不支乃相與具爨而食○然志似飢鷹情同困獸逆料今晚必有一番鏖戰將近黃昏卽聞快放兩次約在皇城附近既而呼聲震地槍砲如雷移時火光又起勢甚猛烈但見暮鴉與火炎齊飛濃燄干青雲直上在本宅遠望已覺不可響邇此際時針已指十二仍不敢就枕坐而靜聽若鎗聲稍疏則聞督署城上有三五人大聲急呼似長官指揮作戰者呼已卽聞機關槍聲累累

如串珠由右而左或由後而前周匝城上循環不休槍止則急呼呼已則槍鳴又似聞城下號令嗚嗚然其音悲楚吹畢旋即同聲相應齊呼前進間以人民之哀號聲叫囂聲兩軍之砲聲槍聲同時並作如萬弩齊發撼動山河槍停則號鳴既鳴則聲復作如是數次自夜達旦想城門失火無辜及災台上彈人誰能避丸而本宅在川軍範圍之內則又不幸中之大幸也

二十日○晴○夜來燎原之火已至今日午前十時始覺撲滅惟見白色之煙燎燒空際而槍聲猶時疏時密此響彼應然皆仰而射雲子彈與空氣相激颼颼有聲以不能越雷池一步故外面虛實不得探聽戰事情形亦不能知不惟坐井觀天且恐束手就斃入夜以後兵戎再見槍聲如玉關月夜萬戶鳴搗衣之聲火光如金烏西斜長天現落霞之色仍在皇城方面惟無昨夜之猛攻而已○某浣婦來予家即託其往外購買食物以彼等貧民若有正當行動軍人許其通過既歸聞其言云予兄嫂小賢糊口貧無立錫攜一子一女棲流於城

陞街之更房疇昔之夜正泣牛衣忽流彈自天上飛來破壁以入洞貫嫂背波及女身同時倒地腹裂而斃時嫂猶縳兒于懷呱呱啼不住血濺其衣而窸窣仍存兒覩此慘情祇願逃生那能慟死俯身抱子以適予室孺子無知格格猶笑孩提背母哀實命之不猶化險爲夷豈此兒之非凡耶

二十一日○陰晴參半○東方既明兵革稍息晝間槍聲雖多似皆望空射擊與昨日情形大略相同亦因交通斷絕真實消息不得而知祇得坐而假寐晝寢以代夜眠酒可消愁晚食且能當肉一食未終祝融再作驚而起視似在城之西北隅距本宅亦甚近以距離及事實測之此災不在厚載門則在北較場槍聲亦如落花流水竟夜不止噫或被焚如變華樓成焦土或遭炮轟埋白骨於荒丘悲夫

二十二日○陰晴參半夜雨○曉來火熄槍止市靜鳥啼小販市儉挺而走險居奇貨以求善價予亦往門外與鄰人閑談聞滇軍准於午後暫離督署人心

厭亂皆相頹慶乃午後三時突來工兵數名荷戈持械或損階石作堡或削大木爲梯問其故則云滇人怙惡無意弭兵目懼四面楚歌必至背城一戰本軍保衛桑梓誓將撻伐蠻方斜日既沒槍炮隆隆雖兩軍既接戰霧再開然一鼓卽衰交頹而退轉危爲安此其機乎○家人恐傷流彈或匍匐屏氣或相對無言時方夜半聽怒風颼颼急雨淒淒與此或疏或密之槍砲聲互相咽答不辯真僞而雲影慘淡夜色朦朧樹枝縱橫崢嶸可怖真有八公山中風鶴草木之境矣○川軍旣登少城與皇城守陴之士相距不遠彼此言語皆可了了攻擊力疲繼以嘲罵此詈彼爲滇蠻彼呼此爲川鼠鄙俗不堪而自雄曰罵陣亦趣聞也

廿三日○陰夜雨○雞鳴而甯未聞槍聲以將和平又有零星小販負貨門外家人乃相與具炊頗覺安靜午後忽聞交涉無効戰機危迫川軍并將本巷內石堡移至衝頭砌成弧形高可及人匿於內以擊其外若砲台然小民無知驚

懼更甚又聞有排長一在少城根申做該兵士云三國領事不忍旁觀出任調停昨進皇城說其罷兵敵人詐佞留作保障我軍若再攻擊不休外人或有一傷又起國際交涉貽禍大局後患何堪設想是日夜雨如注槍聲仍通宵不止○予在門外聽一御人言聞諸道路彼此相持既久俱已各電中央互陳意見頃得覆電飭其各束所部勿相鬪牆

二十四日○晨雨陰○今日並未聞有槍聲惟謠啄紛騰人心擾亂蓋因滇軍今夕有退出消息而被難者有杯弓蛇影之懼未被難者有談虎變色之心或謂假道少城恐將廬舍爲墟或謂遷怒無辜可憐玉石俱焚於是扶老攜幼避居郊外閨秀弱息絡繹道中驚惶之色不堪言狀本宅仍未輕動以觀其變乃未及黃昏防本巷之兵皆率往北退所有各戶階石許其自認運回始知滇軍已於午前由武成門開拔由城外川軍砲二團亦移駐青羊宮等處於是心乃大安夜遂解衣就臥

二十五日晴○雙方讓步各束其軍戰事初平秩序漸定除西北方面在兩軍之警戒線內人民不得通過外其餘屬黔軍範圍皆能行動自由然市肆多閉人心猶未大定也予乃同二三鄰人沿少城徐徐行見街頭積石如星羅碁布充塞道途皆爲臨時所築之壘壁平易未盡者少城上被砲轟二處一關如壑一深如洞附近之高樓矮屋雕牆竹籬亦多被轟擊破碎不堪既至公園門外見薄棺陳陳尸骨纍纍焦頭爛額掩鼻而過冤死孤悲睨目不視乃有紅十字會旗徽高擎振隊往來置諸畚中葬於郊外並攜像鏡一具攝影多張比之圖繪流民情形不更確切耶再折而東出西御街抵皇城則見夫室皆四壁蕭條一望無際地無一片乾淨四大皆空碎礫破瓦及難者覩物生悲棟折頰崩拾殘者執焦仍爨黔廬赭垣雉尾炬烈於猛火噬膚滅鼻觸體台盍築武軍象因有齒乃焚其身彼死者殺之何咎燕若無巢猶可歸林其生飛傍誰家傷心慘目有如是耶皇城之上猶有守陴之士戎服往來予等乃由西鸞市巷過金家

壩仍沿少城而歸

二十六日○晴月光初生○二十一日戰情稍停時即聞武成門一帶無辜平民多被滇軍挾之上城以刺刀剖其腹死與未死且不暇顧即由城上擲下已死者雖厲氣爲災而精魂已散猶有所歸未死者則殷血沒踝而呻吟仍存更屬可憫昨閱二師佈告謂已有七八百之多予皆未敢真信今午與諸友不期而會俱互道受驚並竟述所見聞甲曰武成門探訪所及惜字宮分駐所兩處巡警皆被滇軍虐劉殆盡矣乙即言曰豈但巡警供其魚肉平民亦且遭其蹂躪路上行人誣以辭而加之罪純袴公子斃其命而攫其財入室則鳥獸盡散既去則積蓄皆空近日聞之親友已有數處其未聞者猶不知有凡幾也丙曰然吾聞死者非盡屬平民實以退伍之兵士及充任軍探者爲多丁曰惟該軍處死婦女之法最爲殘酷褫其衣袒其腹割其兩乳擲尸城外哀聲震野慘不忍聞予既聆諸友言始知七八百之多亦非無其事又安敢不信歟

雷波來電阻滇軍

雷波來電成都督軍省長省議會鑒閱報載國務總理嚴電羅前督將所部調駐雷馬等語現在雷波饑饉兵民交困原駐兵無米爲炊已移防就食滇軍再來必釀他患全縣驚恐泣懇轉呈阻止以紓邊禍雷波閬縣人民叩效

釋還俘擄之各電

▲北京來電萬急成都劉前師長存厚華密據報羅前督派往新都等處之滇軍二連及第六師參謀長范石生等官佐數十人均爲滇軍搜捕扣留等語如果屬實應卽全數迅卽釋還以免再延禍端爲要院部江印

▲成都去電北京國務總理參陸部長鈞鑒本日連奉宥江兩電敬悉滇軍自前夜襲攻砲團激成衝突先經川軍臨陣俘獲官佐士兵共數一百餘人嗣經調停退兵卽於沁日起由川軍給贖分別釋送由省署交還除各團營自行省釋不計外共由師部釋還范石生等官長十六名士兵一百零四名均取有收

據存案謹復劉存厚印支

▲北京來電成都劉師長積之華密支電悉趕辦交代并釋放滇軍官兵足見顧全大局至爲企慰其餘各事俟查辦使到川自可明悉也院部青印

自井滇軍之行動

▲十一號以來滇軍各級官佐日在石塔上秘密開會

▲滇省近日與滇軍往來緘電甚多半由叙府轉遞到井

▲滇軍持紙券沿街估換生洋商號多關閉

▲滇軍派該地富紳爲籌餉員勒令籌餉并派滇軍多名爲護衛實行羈押

▲濬川源銀行執事被其押索款項

▲連日由資中到井之滇軍甚多聞羅前督日內亦將到井

▲滇軍於陰十五號派兵向自井濬川源提款共提去一萬四千五百元中國

銀行管理人黎庶康見幾病避於石塔上

▲聚興誠銀行及寶豐隆銀號均駐新到之南軍各軍官之兵太太則多分駐於民家及商鋪

▲第十四旅二十七團長金漢鼎駐井保護安甯并出示云以後無論何種部隊凡開拔他行所用役夫須先向警察局代覓不准滇軍自由拉夫此示出後人民稍安

大批鹽被滇軍提

滇軍在納溪於五月十三日扣提永邊之各商之鹽十餘載計三十餘張引并焚沈一船各商已電運使求救矣

羅佩金臨去之自井

▲羅前督佩金到叙已紀前報頃聞係二十五號由自井動身者同行者有七師金團長

▲羅去時除估提中濬兩行款外尙無搶劫人民情事

▲井地被拉去之婦女甚多人民非常驚恐男女老幼無敢出街者逃避者亦衆

▲羅去後其滇系重要人劉雲峰韓鳳樓趙鍾奇等尙盤據井地滇軍駐井者尙多

▲同羅到叙之輜重有二百餘駝擔抬者尙不知若干

▲羅臨去時有電兩使並請大使所派之代表遲從吾到叙相晤如己起程自井留有廖副官候其到時護送到叙

▲駐叙滇軍二十五團一營沙營長雲仁於二十四號卽率衆到百花場同新到川之滇軍獨立營馬營長歡迎羅氏

滇軍內訌之再誌

▲釀出外交

▲果誰之咎

滇軍因爭風在敘互相仇殺及殺死連長等情曾誌本報茲聞最近某日又大

起衝突擊斃排長一名士兵死傷甚衆重慶日人所辦之新利洋行日前派該行之辦事人日人矢佐一五郎到敍躬逢其盛中流彈三發大有性命之虞現重慶日本領事已電成都特派員（日前官廳文電皆誤爲領事）荒井君向交涉署提出交涉將來尙不知如何解決嗚呼此等國軍吾不禁爲我國前途哭

關於川事之重要文電

▲日前參議員劉楚湘質問政府何以任命劉爲將軍及撤換羅佩金一案茲經國務院咨覆云國務院爲咨覆事奉大總統發交貴院咨開議員劉楚湘等提出政府何以任命背叛中央之劉存厚爲崇威將軍及撤換四川督軍羅佩金質問書一件希咨覆等因查此事雙方是非各執現正派員查辦政府前任劉存厚爲將軍另任劉雲峯爲師長以期消釋爭端嗣因其不遵令停止爭鬥業經明令免職聽候查辦至四川督軍羅佩金前本自請來京是以予以調任政府對於此事并非有所偏倚來書所稱未免誤會相應咨覆貴院查照可也

此咨衆議院國務總理段祺瑞

▲日前政府密電湖北王督軍會其轉四川王張二查辦使所指各則飭令分別情形妥爲辦理內容探誌如下（一）議省會來電力詆戴省長之非并羅舉罪狀是否屬實仰卽秉公查辦呈報核奪（二）該會又電參羅前督軍并慰留劉前師長是否出於該會全體意見抑係個人感情作用（三）戴省長請撥款六十萬以便開拔軍隊不知係開何軍仰卽查明以便撥款仍由該使隨時監督（四）現在川滇兩軍各持理由並迭次來電辨正茲抄錄原電附去飭令併案查復

簡陽道上見聞錄

▲簡陽龍泉驛駐紮之滇軍約一營餘人十三號四出拉夫開往簡陽現留駐該驛之滇軍約百人左右

▲簡陽自大批滇軍往資後秩序始稍回復十三號忽開到滇軍一營人民非

常驚恐又將門關閉匿不敢出

△某君自渝來省道經簡陽至赤水鋪時因滇軍紛紛東下即暫住該場避之聞該場及鄰封各場滇軍藉擲夫爲名肆行騷擾遠近十餘里幾無人跡幸赤水鋪保正鄒某頗善經營於十四號集紳商籌款各團按戶抽丁護送滇軍該場賴以安堵現尙駐滇軍一營尙無騷擾情事對於商家亦和平其他各場則相隔天淵不惟商家關閉而人跡罕有設使他場均能照此辦法或者不致受若大之損失也

(卿乙)

資內要聞種種

△婦女可憐 東御河街焚燒之際有一逃出婦人年約二十餘被滇軍拉去於十號抵資住大芳園向店婦哭訴伊本梓潼橋(或桐子街記之未清)劉姓之婦回東御河街米姓(或閔姓未記清)娘屋遇難老母五十餘歲兄二人不知死活夫家亦不知其被擄訴畢大號淒楚不堪十一號竟被一兵姓林者挈

往自井矣此三日內被擄之婦女陸續抵資者極多有眼哭腫如桃者有受驚駭已成呆者狀極可憫云

(木)

▲滇軍騷擾 羅前督於九號到資護從滇軍約三四營之譜其前後之軍尙多沿途頗爲騷擾聞羅小駐數日卽赴自井云

▲資城損失 成都川滇軍激戰時由自井到資中之滇軍不下二三團人民房多被其霸駐後戰事停止滇軍漸去凡經駐過之處捲樓幾盡房宇亦多遭其損壞云

▲滇軍在大面鋪馮樹甘家逼索銀洋六百元馮當時祇繳銀百元餘伊等勒限翌日六鐘給楚否則將其坐宅焚燬盡淨馮駭極遂由後牆翻出從小路來省躲避云

(容易)

測量員自願回家

唐滇督繼堯日前派兵入川援羅馬營長錢團長紛紛到叙府自井一帶已誌

本報茲聞近日叙府人民頗爲驚惶所有叙府測量員二十餘人已自願回家矣

自流井最近情形

▲滇軍在井上因估換濬券不依團部所示訂之價一千四百文而堅索一千八百文爲一元燈竿壩之當商被打警察巡長勸阻無效亦被打傷兩臂以致一般街鋪將門關閉五月十二三兩夜各戶戒嚴謂將被起發婦女則潛逃四鄉或上砦或入教堂

(十八號記載)

滇軍又到叙一營

滇軍到叙府已誌前報頃聞雲南一師二營又於本月三號由昭通開拔到叙云

(十九號記載)

瀘州要聞彙誌

▲滇軍新到 近日由叙府自井開到瀘州之滇軍共約團餘分駐城內及小

市各處對於電局電報郵局信件稽查均異常嚴緊云（二十號記載）

▲羅前督前在造幣廠造獎章一萬枚每個重約六錢當時僅兌銀三千卽將獎章催繳旋戰事發生無何羅去該廠大受損失

羅前督去時之資中

前督羅佩金現仍駐資中城內東街湘園廖姓花園稱候查辦使到資面訴此次戰事由某報載已到自井實無其事

滇軍近日多由資過并輜重甚多拖去之夫二千餘人後無人可拖滇軍直到學堂拖去學生數十人卽富紳中亦有被拖者
滇軍在資拖去青年婦女甚多不從者多被殺

東門外風鶴頻驚

日前東門外飽受虛驚已誌本報十一號後六鐘時謠傳滇軍折回駐扎沙河鋪一時街談巷議者皆談虎變色多有逃避者而牛市口之警察亦收站崗巡

警五區四分駐所三分駐所均將出班巡警一概收回次日果有滇軍約一營到牛市口聞係到省領餉者旋仍向簡陽而去

簡陽道上見聞錄

△滇軍到簡時聞戴兼督及熊旅長來省之各眷均在簡陽當時避入福音堂於七號同陸知事到省云

(匯)

△簡陽知事陸廷楨於七號回省會紀前報其原因係隱存征收公款激怒滇軍被捕將槍斃幸爲韓鳳樓所見方得保釋隨即攜妻小脫險而行李則損失無存矣

(梗)

△滇軍在龍泉驛一帶姦淫擄掠迭誌本報該軍長官於八號綁出滇軍五名伙夫二名一律正法云

(佳)

△龍泉驛滇軍開去後該處縣佐召集街鄉總保保董到署會議善後辦法因逃難未歸到者甚少由縣佐提議首先注重治匪出示召各鄉人民從速歸里

一面調集團防寇日編制以資捍衛云

(竹天)

▲某君自簡陽逃出云羅前督前日在該縣向滇軍演說略謂本部官兵有家眷及銀錢物品等類者設法迅速送回滇省我軍在川駐紮三五年都不知的云云

(召)

獨立聲中之四川(續)(成都特別通信)

川軍第一師劉旅長在內江檢獲滇軍中主要人韓鳳樓劉雲峯等五月十號由資中致瀘縣趙師長又新秘函錄後江電諒達此間主張我公駐瀘小齊駐簡羅擬駐紮似乎不妥來函主張則羅公應駐資中固結我軍兵力以候中央相當之解決但所謂相當云者我軍未解決之先必有所主張庶臨時方能確定中央解決之相當否也茲將主張電稿飛呈鑒核公如謂然則請飛示以便致北京上海西安等處之電用兩公領銜也竊以爲籌擬數策之能否達到目的端在我軍之能否固結也幸公與小齊力圖之除錄函電飛遞簡陽外特將

軍稿呈核批示遵行再六七師應一律編國軍羅與小齋均各去電力爭矣總之編則均編抱定做去當然見效附電錄後

簡陽顧師長瀘州趙師長康定殷鎮守使雲南唐督軍上海岑西林李協和北京陳鶴亭李子暢先生西安李省長此次劉師肇蒙中央始終偏護未能明正其罪致滇軍隱忍退師現已移駐簡陽一帶地方聽候解決惟其間若先無成算恐查辦結果中央仍無正當辦法現鳳樓等籌擬數策謹先電商（一）以唐公督川羅公督滇或卽岑公督川唐公仍督滇（二）駐川滇軍均編國軍以羅或唐公用巡閱使名義統率之（三）以兩師編爲國軍分駐川滇受兩督節制以上數種應用何策並如何進行或別有良法統祈籌定示悉以便各處一致主張當能有效否則段系計畫着着實行不惟滇軍一蹶不振卽西南勢力關係甚大祈卓裁示復韓鳳樓劉雲峰周鍾嶽李伯唐李臨陽華封印

前蜀督軍羅佩金于五月二十七號到敘州當其將由自流井起程赴叙時卽

有電與兩查辦使王張兩使以羅氏態度不明當兩使到渝時羅在資中電渝稱在法候駕旋羅又到自流井復電請兩使到井地相晤駐井數日又稱將到瀘州旋又實行到叙州一般謠言甚衆皆謂滇軍積極預備作戰各處防禦地點已剋戰壕修砲壘矣渝城謠言則謂滇軍將到重慶加以戴兼督新調西上之黔軍四營餘現亦麇集渝城外間固早有羅戴携手之說因之咸以將有戰事發生二十二號查辦使訪周道剛師長密談甚久聞卽係調和請勿擅開兵端者鎮守使熊克武已表示意見以衛民爲前提兩大使一面又派滇系之前財政廳長楊寶民往敘勸羅務要體念川民紳商各界亦羣舉代表郎承銑馮楊二君到叙哀懇羅氏旋兩大使又恐楊等前往不生效力復派滇人連從吾前往勸解遲氏起程時王使特召宴密談甚久

兩使前日請羅將東大路讓出昨顧品珍有電與黔軍熊旅長稱資陽一帶之軍日內將完全開拔據各方面探求滇軍將開到叙瀘一帶沿長江岸駐紮以

集中兵力蓋因岷江沿岸已爲川軍二師防守而隆內一帶又厚集一師樂至一帶厚集三師一旦有故資中一帶實三面受敵故羅氏議定滇軍集中叙爐進可以戰退可以守其讓出東大路究非因兩使之請而然也五月下旬以來自流井滇軍已紛紛向滇開拔沿途非常騷擾掠去民間婦女七八百人現值插秧之際一般農人皆晝伏夜出二十七號省議員胡素民等電羅氏哀懇勿拉農民但恐難生效力

川軍第二師砲兵近已向川北出發聞係繞道赴川東者劉存厚氏對於滇軍尙不極端主戰惟其部下則非常激昂其旅長陳洪範近又移軍近叙扼岷江岸防守第一軍之第一混成旅前戴氏令劉成勛旅長到懋征亂夷劉氏要求一師欲任師長也戴氏未充現劉亦主戰派將其兵力集中于川南距叙不遠地方新由成都昇去之大炮四門亦已安置於對叙之江岸一帶皆依山帶水形式險要集川軍至兩營旅之多將來若有戰事叙州方面必劇烈也惟戴兼

督力促劉旅征懋以圖去劉軍長之勢力劉則陽允去而陰仍不動僅派工兵營營長宿靖南率兵一營到灌縣防堵使夷人不致出灌而已而灌以內則不堪問縱橫二千餘里皆爲僞皇帝察都和尙所有最近川邊之丹巴亦已失守殷邊使以對羅之關係積極預備不暇顧及戴劉輩亦皆不暇顧及因之夷衆得以不恐現勢力浩大大清通治之僞示已佈滿於灌縣以內勢將燎原將來不知司軍柄者能尸其咎否也

兵災瑣聞錄

▲前月變亂時 槐樹街係滇軍區域有張某者收買雜貨營生因見滇軍捆綁一人姓劉前充某連排長嗜好甚深革退賦閑常賣衣物與張突被滇軍指爲奸細劉求張擔保張亦認識滇軍一人遂代而哀懇釋之無家可歸劉原係外縣人恐走又爲該軍拿獲張忠厚老成憐其孤客收留在家日給兩餐夜代賃被蓋迨停戰後劉懷不良之心將張神龜上錫器並被蓋捲颺不知去向噫

之無良乃至於此不思報德反竊其物聞張已報告警區緝捕諺云好人難做信不誣也

(福言丁)

▲慶雲南街某氏婦貌儘中姿伊夫赴川邊從公兩年未歸其婦常倚門眺望或露半身或掩半面遂與對門醫生結不解緣前月變亂時該醫生躲藏於家被滇軍數人入室搜掠財物未得竟將該醫生綁至武門砍死拋屍城下並將其婦拉去不知下落噫姦夫淫婦報施之巧異哉

▲少城東馬棚街有劉某者家頗富因妻不育購買一妾聞約費生洋一百五十元之譜貌甚美麗刻尚未擇吉收房月前變亂舉室皆外出逃避其妾不知被誰拐去杳如黃鶴劉垂頭喪氣現已呈報警署並出廣告探訪云

▲梓潼橋有何某者政界中之人物也高樓大廈頗爲華麗卽月前變亂時有滇軍兩排聞紮伊之公館何卽命雜役廚房逐日製造美饌以供大嚼該滇軍亦頗文明臨去時何具程儀伍百文所損失者被蓋十餘床茶碗烟袋零星數

件而已此一不幸之一幸也

(三則福言丙)

▲書院西街伶人潘么么家及如是巷街樊琴官家均被滇軍搶劫數次約損失銀數百餘元

▲滇軍出城在東門外兵工廠附近一帶姦淫婦女均有一種特別名詞代之如姦少婦則謂之爲捉母雞淫少女則謂之爲捉雛鷄

▲東華門街有馬某者開設布鋪生理素與滇軍某軍需官交好日前戰事發生該軍需官卽以皮箱一口內存貴重物最多且有兌券數百張寄伊鋪上殊滇軍打起發時來到伊家各物均不搶劫惟將該軍需所寄皮箱劫去亦奇事也

(三則大中丙)

▲前月變亂時惜字宮街一帶係滇軍區域聞該處某雜院內住有散兵趙某被滇軍探確在家某日直入其室將其尋獲該趙某母親及祖母均上前救護該兵麾之不去卽用槍筒毒打竟將趙某拉至武成門用刺刀殺斃拋尸城下

▲四月廿三號有總廳警察隊隊兵廖麻子者腰圍子彈惟未持有槍枝因抽便回乾槐樹街審親殊乾槐樹街爲滇兵區域廖麻聽天安命冒險闖入當被滇兵將其拉住扯去腰間子彈不由分說立予槍斃

▲鐵路公司附近有某轎夫之妻某氏於四月廿一號因開門傾倒淘米水突被一槍彈對面飛來從下扒落至右乳間洞穿胸腔由背後腰部趨出立即倒地殞命街衆惻念各解囊相助頃刻湊錢卅餘千文用作該故婦棺殮之需

▲皇城壩及東西鵝市巷一帶鋪房坐院於後二月廿九晝間被滇軍火焚淨盡現均搭蓋蓆棚重理舊業一俟查辦使抵省查明後再行新建等情曾誌某報茲聞西鵝市巷有姚某者雜貨生理以搭棚營業諸多不便遂鳩工修造鋪面殊附近災民聞之與之大起衝突姚見衆怒甚犯規又停止修造

▲西御河邊街有開硝房之魏某於後二月廿八夜正仰臥床上突一槍彈由門外飛入洞穿魏某右腿當請醫診治殊傷痕較重未及一日竟致殞命又同

時有西府街蹇某之子年約十餘歲因事路過后子門街甫進柵欄突被城上滇兵瞥見擊伊一槍穿過左手手脛忍痛奔歸抬往醫院診治迄今尚未痊愈

▲溝頭巷有轎夫某曾被滇軍拉夫去供驅使者行至資陽始放伊歸言昨日二十五號即被拉去措包袱兩個出城駐紮兵工廠宿一夜又開至大麵鋪駐紮每日只行三四十里并不給錢供飯紮在何處即吃何家如吃大戶一樣他們行至簡陽於五月二號又前進正行至距簡三十里之譜即有軍隊截住大戰一晝一夜又前進從此日日均在打仗沿途均係土匪希圖擄搶直行至資陽過去一站另外拉着有人始得轉來并未給與工錢路資一文沿途下力始歸歸時大路已通且言簡陽縣城及石橋場兩處并無打仗焚燬情事

(二則必丙)

▲自省開出之滇軍經過各地均有拉婦女隨行有一兵住赤水鋪地方籍拉夫爲名直入某姓家誘其婦該婦有急智當笑語承迎給該兵將槍械棄置乃

同數婦共執該兵以針及鍵子刺之血流被體始送交保甲該處保甲乃雇力夫將該兵送簡陽城交該連連長云

(久丁)

△少城桂花街蔡金氏隆昌縣人有二子焉長子蔡某前赴藏從軍因上年陳步三叛亂開拔抵禦受傷陣亡該氏月前率次子蔡文來省請領卹餉時值川滇兩軍構釁戰事發生將蔡文阻止貢院街一晝夜不敢前進饑寒交迫只得奔走回家至板橋街被城上滇軍鳴槍彈穿咽喉登時擊斃

△日前淘渣力夫在三橋河內淘獲快槍一支由路過軍士瞥見收去

△皇城壩居民張子元年約六十餘因戰事發逃至清真皇城寺內避難於二十九日被滇軍指爲偵探登時槍斃教主哈某見張身藏有銀數百兩當卽通知妻某氏將人銀領回安葬

皇城壩災民投訴

雜

具報告災民陽金山住皇城壩第五號爲據實呈報俯懇憐恤事緣民一家六

口討佃蘇姓舖房一間居住向以涼粉生理爲業糊口因又二月二十九日早突被滇軍縱火焚燒居民房屋登時財物損失何止千家當火烈時民見之舉止荒亂無奈空手攜家逃避所有衣物器俱無敢搬運概遭焚掠迨至三月初旬返家片瓦無存觸目傷心數口嗷嗷難以聊生情實可慘爲此報熙貴會代爲伸雪謹呈

回教俱進會悲訴

宏

回教俱進會附設災民調查事務所爲慘遭槍殺焚擄陳請建議賑恤事竊川省回民聚居皇城附近歷有年代禮拜各寺以及大小營貿外省僑寓商民在此尤多今者羅劉兩軍不知因何構釁突於又二月二十七夜槍聲四起彈如雨下清真義學寺經生沙煥然時當禮拜匆忙不避被滇軍指爲偵探拖入皇城槍斃後且戮其屍又回民馬雨周等或過從戚友或市物街頭驟聞槍聲各尋歸路均被皇城施槍死者十餘人傷者不計其數於是皇城周圍居民不

敢出門一步坐以待斃二十八日兩軍槍彈愈放愈密旋有滇軍多人手執洋油硫磺火藥引火之物估燒民房持槍駭壓不許搬救延燒一晝兩夜皇城附近已成焦土其未經燒燬及在滇軍戰區者則悉被搜擄十室九空當縱火至皇城寺時回民哈殿臣等以該寺爲成都首善大寺叩頭哀乞幾至舌敝聲嘶乃免焚燬傳令避難回民遷避迨難民遷去放在寺中衣箱等物則概搜盡掌教馬本廉入寺取經被滇軍彈傷右臂已成廢人又停戰期內回教穆瀛家避居馬道街聖修醫院被皇城施槍回婦穆周氏登時殞命其子伏哭亦中彈死并傷其戚周張氏今調治未愈計此次回民被燒數百家損失百萬餘死者數十人陸續彙表呈查且各寺常款全賴皇城一帶房租今被焚燒寺窮如洗現回民等流離失所棲居燹餘各寺幾無隙地哀痛呼號之聲慘不忍述除電中央政府北京回教俱進會暨分呈外爲此凍呈貴會俯察慘狀賑濟全體回民感無涯涘謹呈四川省議會公鑒

貢院街災民投訴

具報告災民殷吉安年三十六歲係成都縣警察一區六分所大營門口貢院街第十四號牛肉生理鮮於閏二月二十八日夕被滇軍放火災燒房屋民見事急閤家人丁七口赤手逃生在外銀錢衣物家俱概成焦土約值銀一百五十餘元現刻生活維艱閤家嗷嗷無哺只得呈懇貴會俯賜垂憐則全家老幼感德無涯矣此呈

西華門災民投訴

宏

具請願災民毛松山年五十歲住西華門街四十九號爲橫遭災害願懇主持事情今又二月廿七日夜省城突生變局川滇兩軍衝突民西御河邊街所置產業共計鋪面七間公館一院內上房四間箱房四間門道總計十六間於二十八日夜滇軍陡然放火幸佃戶驚覺急往撲救殊該城上滇軍執槍指擊不准近前登時將民房屋焚燒一空比時各佃戶因火起倉卒捨命逃外衣物器

用不及攜出盡遭回祿現均流離失所慘難言狀將受災各佃戶姓名及損失情由粘單報告鋪院共值銀一千二百兩正呈鈞鑒外只得泣懇主持以救殘生民等有生之日皆再造之年頂祝不忘伏乞回教俱進會各先生公鑒

災民調查一覽表

受害人	年齡	住址	職業	加害人	受害日期	死傷丁口	損失財產
馬祥順	六十五	永靖街	鹽店	慎軍	廿號		損失貨物財產甚多尙無確數 衣物家俱全焚共值一百四十餘元
王協隆	六十	同上	麵	同上	同上		衣物家俱全焚共值一百元
郭興順	五十三	同上	厨子	同上	同上		鋪房四間毛房一間及衣物嫁奩被焚共值二千五百餘兩 鋪面四間及衣物等被焚三百餘兩 門道一院及衣物被焚共約值銀三百五十餘兩 衣物被焚共約值四百餘元
唐洪順	六十	同上	棧房	同上	同上		鋪房四間毛房一間及衣物嫁奩被焚共值二千五百餘兩 鋪面四間及衣物等被焚三百餘兩 門道一院及衣物被焚共約值銀三百五十餘兩 衣物被焚共約值四百餘元
白久長	五十二	同上	同上	同上	同上		鋪房四間毛房一間及衣物嫁奩被焚共值二千五百餘兩 鋪面四間及衣物等被焚三百餘兩 門道一院及衣物被焚共約值銀三百五十餘兩 衣物被焚共約值四百餘元
馬洪興	四十	同上	商	同上	同上		鋪房四間毛房一間及衣物嫁奩被焚共值二千五百餘兩 鋪面四間及衣物等被焚三百餘兩 門道一院及衣物被焚共約值銀三百五十餘兩 衣物被焚共約值四百餘元
馬耀如	三十八	同上	茶鋪	同上	同上		鋪房四間毛房一間及衣物嫁奩被焚共值二千五百餘兩 鋪面四間及衣物等被焚三百餘兩 門道一院及衣物被焚共約值銀三百五十餘兩 衣物被焚共約值四百餘元
馬照祖	十	同上	學生	同上	同上		鋪房四間毛房一間及衣物嫁奩被焚共值二千五百餘兩 鋪面四間及衣物等被焚三百餘兩 門道一院及衣物被焚共約值銀三百五十餘兩 衣物被焚共約值四百餘元
李洪順	六十	同上	銅匠	同上	同上		鋪房四間毛房一間及衣物嫁奩被焚共值二千五百餘兩 鋪面四間及衣物等被焚三百餘兩 門道一院及衣物被焚共約值銀三百五十餘兩 衣物被焚共約值四百餘元

鋪院家主馬羽周及馬馬氏

吳青山	二十八	同上	同上	同上	同上	損失銅條五十斤
馬占雲	三十	同上	同上	同上	同上	損失銅五十斤
湯樹三	四十一	同上	鐵匠	同上	同上	鎗斃湯坤雲一人 衣物全被焚毀共約值二百餘元
高金玉	三十二	同上	小貿	同上	同上	衣物被焚共約值一百二十餘元
馬朝富	五十三	同上		同上	同上	衣物被焚共值四十餘元
東復初	五十九	同上	茶商	同上	同上	自有公館一院及衣物等被焚共 值一千一百餘兩
王馬氏	五十	同上		同上	同上	衣物被焚約值五千文
馬瑞軒	三十五	同上	學界	同上	同上	衣物器具全焚約值值一百餘兩
馬洪順	五十	同上	屠宰	同上	同上	衣服銀錢被焚約值四百餘元
張應高	四十七	同上	廣業	同上	同上	衣物被焚約值八十餘元
張德鴻	五十	同上		同上	同上	損失衣物約值二十餘千文
楊蔡氏	五十	同上		同上	同上	損失衣物器用約值五十餘千文
馬廷早	四十	同上	軍界	同上	同上	自有房屋三間燒去間半及衣物 等共約值一百五十餘兩
李戒年	廿二	同上	學界	同上	同上	劫去衣物銀錢共約值三百九十 元
馬忠恕	七十四	同上	學界	同上	同上	劫去銀錢衣物共約值三百餘元

劉明德	二十八	永靖街	屠宰	同上	二十號
馬泗興	五十四	同上	飯舖	同上	同上
劉青山	三十	同上	銅匠	同上	同上
徐光甫	三十	同上	同上	同上	同上
安國榮	五十七	同上	商	同上	同上
馬保泰	三十	同上	同上	同上	同上
東維寅	二十九	同上	茶商	同上	同上
張馬氏	六十九	同上	同上	同上	同上
馬鶴亭	五十九	同上	同上	同上	同上
劉吉堂	六十	同上	商	同上	同上
張馬氏	六十四	同上	手工	同上	同上
羅羅氏	六十八	同上	手工	同上	同上
王安氏	四十二	同上	同上	同上	同上
朱茂林	五十八	同上	裁縫	同上	同上

衣物家具被劫共約值洋五十餘元

劫去衣物等件約值四十餘元

劫去衣物等項約值銀一百三十餘串

劫去衣物等件共約值八十千文

自有公館一院扯壞劫去銀四百五十元錢五十餘串金玉衣物等共值一千餘兩

劫去銀錢共二十餘元衣物玉器等共值九百餘元

劫去金玉飾物衣服銀錢共約三千餘兩

劫去衣物約值四十餘串

劫去衣物飾皿共值三百餘元

劫去衣物等件約值三十餘千文

劫去衣物約值二十餘元

劫去衣物約值四十餘元

劫去衣服約值三元

劫去衣物約值十餘元

買春山	六十五	同上		同上	同上	同上	劫去衣物約值六千餘文
安光續	七十二	同上	學界	同上	同上	同上	自業房屋扯壞劫去金銀玉器服飾等件共約值洋九千餘元
馬萬盛	六十一	同上	油米	同上	同上	同上	劫去衣物等件共約值洋四百餘元
周開元	二十二	同上		同上	同上	同上	劫去衣物共約值四十元
李鴻青	三十一	皮房後街苦力		同上	十九號		劫去衣物共值錢六千文
姜海亭	三十八	同上	同上	同上	同上		劫去衣物共值錢四千文
熊少卿	四十	同上	同上	同上	同上		劫去衣物共值錢十餘千文
周占雲	三十三	同上	同上	同上	同上		劫去衣物共值錢約十五千文
李萬興		得勝卿 智勇保	同上		二十七號		劫去衣物三十一件及銀錢約三十餘串
金德素		貢院街	牛燭 雜貨	同上	十九號		焚燬銀錢貨物衣服等共值一千餘元
胡表盛			油商	同上	二十九號	十五歲之女劫 擄劫無着	銀錢貨物被劫

回民被災調查表

四川成都回民被災損失調查表第一組

受害人 年齡 住址 職業 加害人 受害日期 死傷丁口 損失財產

穆馬氏	三十六	金家場	漢軍	陰三月初	因川慎激戰避難於平安橋聖修醫院姑周氏中彈立斃夫瀛抱母痛哭又被槍彈洞穿腰部登時亦斃	焚燬房屋共七間衣四箱內裝金銀首飾約值洋一千三百餘元
周張氏	四十八	提督西	同上	同上	槍傷左右膀及胸膛現尙未愈	
馬馬氏	三十	順河街	同上	又二月二十八	彈傷腰部現住聖修醫院調理	
馬雨周	四十五	同上	同上	同上	被流彈擊斃	
李文星	四十八	同上	同上	同上	同上	衣物等件被劫約值洋三百餘元
李馬氏	八十八	小河街	同上	同上	被漢軍拿獲指為偵探槍斃後割去頭顱	衣物首飾被劫約值三百餘元
沙煥然	二十四	貫院街	同上	又二月二十九	被漢軍拿獲指為偵探槍斃後割去頭顱	銀錢衣物劫去家俱房屋打壞約值洋七百餘元
賈青山	六十	西御河	牛肉	同上		
賈學成	十六	同上	同上		被流彈擊斃	
馬仁安	二十八	永靖街	同上		被漢兵指為偵探槍斃	
楊馬氏	二十三	東鵝市	同上			銀錢衣物等件被劫約值洋五百餘元
楊伯生	三十二	皮房街	同上		被流彈傷頭面部	
蘇中和	五十六	西華門	店房	又二月廿八		店房一號起銀錢衣物被焚被劫約值銀六千六百兩

丁三真川軍剿匪記錄

記載

三十

胥有森	馬洪順	馬建中	張子元	者朝林	馬紹鵠	馬晏如	克伯哈禮	大五德	托夥提牙	哈斯穆	哈四木	馬本廉	蘇明耀	同上
四十	三十	十五	六十二		四十八	四十二						五十四	三十三	同上
東華門	西御河	東御街	同上	永清	同上	西御河			住貢院街	中和店		西鵝市	貢院街	板橋街
米油	小貿	清真學生	同上	清真寺	同上	同上			新疆	回商		教士	同上	同上
同上	同上	同上	同上	同上	同上	同上			同上			同上	同上	同上
同上	同上	同上	又二月二十九	同上	同上	又二月廿八			四月十八			又二月廿七	同上	同上
難被偵兵將母子擊斃	奉母在平安橋醫院避		被偵軍指為偵探槍傷頭胸兩部因斃		被槍擊右腿現尙理調							被彈傷右勝現尙未愈	被彈傷兩腿現尙未愈	
銀錢貨物被劫約值洋一百一十餘元	住房打毀銀錢衣物等件被劫約值洋七百餘元	被劫約值洋七百餘元	舖面二十五間房屋二院被焚燬約值銀四萬餘元		銀錢衣物等件被劫約值二百九十餘元				被劫銀錢貨物等件共值三千六百一十七兩			房屋四間被焚燬約值洋四百元銀錢衣服被劫三百元錢七十串	客店一座獨院六間舖面七間焚燬約值洋六千四百餘元	

督軍署錄事投訴

難

具報告督軍署錄事龔伯平住東御河沿街三十二號爲主張放火罪惡彌天呈請昭雪事情陰歷又二月二十七夜兩軍衝突賓主失和砲聲隆隆連日不絕以致將伯平隔在皇城不能得出二十八日午後六鐘有羅佩金副官長黃質向云川軍四面圍緊非大用火攻不能狀其威勢各軍贊成卽於是夜燃燒東鵝市巷房屋民無法出圍惟有飲恨吞聲而已後羅督出走民始得回至其本街已不知家在何所計民所住房屋約值三千餘金所失器俱約值六百餘金特此報懇貴所以備察核謹呈

籌賑局之賑濟

籌賑總局以成華城會附設之災民調查所連日調查之災民十分詳細特事派委員到該所索取災民表以便分別賑濟聞該所已將彙齊之第一第二兩表交送委員

公民等之條陳

成都縣公民某君等致該會函云諸公憫卹桑梓代爲災民伸雪不辭勞瘁至屬高誼惟鄙意以爲宜令各災民各將原呈另錄一份俟王張兩查辦使到省時各災民親向王張兩使投遞以災苦之狀動其惻隱之心庶幾有益不然兩使將疑其捏詞聳聽矣蓋以旁人之代爲伸雪不若千百災民之自向兩使泣訴之爲得也是否有當悉聽鈞裁

災民表之呈送

災民調查所調查之災民已於日前將第一表呈報省長公署刻間該所又將第二表繕寫完畢呈報省長公署及咨送各重要機關核查

調查員之續報

該所派查附近督軍署之災民總調查員除前日已經報告之災民外又於昨日報告該員連日調查所得者探其報告災民共有五百餘家而被焚燬者則

在二百家以上云

簡陽滇兵已赴資

簡陽來客云駐紮該處滇兵賡續移駐資陽本月十六號拉夫千餘名抬扛以一小隊在後尾隨因此夫頭無一跑走者若遇宿旅店時所有夫頭概錮禁一處派人監守斷難逃出

查辦使行轅紀事

成都商務總會特派代表董炳南君由川地兼程來渝十五號夜到十六號早偕樊孔周往見兩查辦使痛陳以前之種種慘狀及現在之種種危機適有前漢軍統領趙南森君亦由省來渝先在座董君言時不覺言之泣下于是樊趙二君及兩查辦使均相與痛哭一場哭中董樊二君要求速發賑王張二公言我們電京請賑款已三日尙未覆電今既災民甚衆迫不及待卽商議向川路公司駐渝辦事處借款先行兌省俟中央款到卽撥還或另設法償還當持片

往邀經理人又中樊董二君往商渝商會正副會長蓋知該處無現款只有借出之款尙未收回擬以借券交出在渝貼現此事必有可望也

哀懇查辦使大會

十三號兩查辦使抵渝各界在江干迎迓面遞公呈上署名者共二百餘人是日并未到齊當由兩查辦使訂期十五號午前再行接洽屆時均齊集重慶總商會內適兩查辦使均往拜各界及領事各界人士坐候三時之久并無一人去者亦可見人心之關切也

午後二時兩查辦使到入座商會汪會長搖鈴報告兩大使爲四川事遠道而來欲伸已往之奇冤圖後此之安寧皆爲兩大使是賴各界應立起向兩大使行鞠躬禮禮畢汪會長復言曰兩大使來川吾民望之如大旱之望雲霓本係歡迎之至但此次成都遭此慘禍只好改歡迎會爲哀懇會各界諸公請向兩大使分別陳訴於是紛紛發言所言種種慘况與各報所載略同茲再敘其詞

意大致相同者亦不重記共記其大略如下

首由梁叔子就公呈上所要求數事言之其聲哽咽而哀其詞簡要而切王大使起立答云我本不願出來辦事此次純係爲人民而來不知所謂省界亦不知所謂黨見但盡心竭力一步一步的做去能做得做到則不可知

第一問題滇兵離川一層政府已知其不能共處惟視辦法如何

第二問題所謂二師師長一席必能爲中央呈明其中困難

第三督軍問題中央亦不得不慎重出之

張大使亦起而發言采老已在普陀山修造房屋準備作和尚此次出來既純係爲四川人民我兄弟係川人更不待說應請盡心做去但是能達諸公之圓滿目的與否則不可知將來如做到圓滿地步尙望稍寬責備

蒙君功甫起而發言此次四川冤死了許多人今天不是我們代表難民說話實係無數之冤鬼在說話兩位大使說出做不到又說要寬責備恐怕冤鬼不

能瞑目於地下總望兩大使認真做去必求達到目的

於是王張兩大使均起而言不是我們推諉此中是非曲直必能合盤託出決不敷衍袒護蒙蔽但我們只兩個人只帶隨辦筆墨供奔走者十餘人并無何等魄力還靠着中央政府現在中央政府威信二字要說有十分還說不上來諸公是曉得的所以要求諸公原諒

國會議員某君又起而發言此次之慘變牛係中央釀成在京時曾約集同鄉懇求府院急速解決因府院不合乃讓成此變現在惟有要求兩大使急切呈明府院須當機立斷梁叔子君亦沿其說并歸咎王芝祥檢查之不是

向君滿藩起言王大使護院時遺愛在民張大使川人我們係深信的不調過滇兵離川一層須切實說明并非排外并引出種種確證黔軍在川紀律嚴明我們不請其去可見川人無排外心也至二師師長關係軍事尤非吾民所能干預不過此中原因極多人民爲圖安寧計不得不說至督軍一層本有戴循

公出而兼任但戴公以省長兼會辦又兼督軍本係暫局應求中央早日簡任一黨派關係輕者速行來川

是時有某君忽發一言岑西林就好又某君言岑西林好與不好不必說諸公試想雲南督軍省議會均在越俎爲我們請任岑西林究竟是何意思此時秩序稍亂旋又歸入正文

舒品軒君起而簡單發言王張二使一滇人一川人我不知其爲滇人爲川人羅劉衝突一滇人一川人我亦不知其爲滇人爲川人但求就事論事而已又云聞滇軍有來渝之說并舉某報載羅電爲證（按省報無此說）應請查辦使注意四川成渝兩地最關緊要成都遭亂尙有重慶爲人募捐爲之呼冤恐滇軍果到渝地方糜爛更無人爲之募捐與呼冤矣

王大使云羅鎔軒昨來電在資中候我們面商一切并無來渝之說

商會副會長溫友松發言今日諸公所說大要不外昭雪前冤補救將來兩層

言已盡矣我只要求從速兩字汪會長復言日前兩大使曾允在渝商有辦法再行上成都總望大使多住幾日王公復允諾時已四時遂搖鈴散會是日在會人人均有戚容含淚欲流者甚多秩序極爲整肅云

羅佩金將赴敘時之自井

羅佩金到自井之初卽聞有電到渝稱在井候查辦使到井頃聞羅又決定到敘府于今(廿三)明(二十四)兩日即將移赴敘府警察局已在預備人夫矣舊歷三月二十八日由井開赴瀘州之南軍在東岳廟拉去之青年婦女數十人因鄉下婦女趕會爲該軍所拉也內中拉去井上名娼一人名羅敷仙係安岳縣人

劉雲峰(小嵐)於五月二十一日由省到井現住羅佩金處有與劉相識者問曰羅將軍何以不見客劉云羅言對不着川人有點自抱不安故不應酬也鹽務防護軍原駐正街之陝西廟近因滇軍二十八團第二營到井滇軍長官

與防軍營長交涉言王爺廟太窄不敷居住請以王爺廟易陝西廟防軍華營長遂允交換五月二十三日已雙方移駐矣

自井正在籌辦團防已經會議解決每月由各銀行捐銀洋若干元中國銀行二十元濬川十五元聚興誠裕商公各十元每僦鹽捐洋二十元每口鹽鍋月二百文井上每年行鹽三千餘僦每月有燒鹽之鍋一萬餘口此種團防係增廣原有之商團故籌款尙易也

滇軍所拉之婦女內有某校女教員至死不從滇軍用武刀強迫并持手槍駭之亦不從乃置槍思甘言以誘之女教員乘機奪手槍擊之未中滇軍大怒呼衆亂刀刺殺且將陰戶割下釘於拘留掠來婦女之門首意作不從者之榜樣連日由井到敍之婦女有六七百人之多均係被滇軍拉者沿途痛哭如送葬然

滇軍開往叙府沿途不但無行人卽栽秧之農民亦逃盡沿灘一帶每日時聞

槍聲聞係滇軍見遠處有人不能往拉則發鎗以擊之

富順同春生陳詔夫均被滇軍拉去估索銀三千限三日繳清逾限則砍頭

查辦使派員阻羅

王張兩查辦使在渝得羅將赴敘之耗恐有他故特派楊寶民（前財政廳長）前往勸阻渝埠紳商各界亦推郎承銑馮楊二君前往云

請兩使速到成都

成都去電重慶王張兩查辦使鈞鑒尊電奉悉川局糾紛生靈塗炭拯饑救溺尋專賴兩公惟災情過鉅非實地查勘難得真相伏祈幃帷迅臨錦日以慰民望臨電神馳無任盼禱省議會叩徑印

羅到叙府之別電

羅前督佩金預備到叙情形詳見別條頃聞敘府昨二十五號有電到省稱羅於二十六號可到叙府云

馬團長電索武器

新到叙府之滇軍馬團長電雲南唐督及第一師師長云督軍師長鈞鑒皓電敬悉遵卽尅日派蕭張兩營長各率所部向叙進發餘部分頭懇電飭赴昭通集中前領槍砲彈爲數希少請再發三十年式步槍彈七萬發九響彈四萬發湖北小口徑彈二萬發大小克魯伯炮彈各一百顆瓦斯炮彈一百顆并請添發管退砲二門機關鎗二挺附彈乞速派兵解叙以救急需又查所部槍枝複雜擬發給三十年式步槍六百枝復據獨立營呈請更換向用單嚮槍所撥各游擊隊可否調同前進懇祈示遵馬鈞叩唐督覆電云電悉該軍原有槍彈頗足敷用子彈亦復不少茲復請撥自係爲補充計候飭計畫派員解叙惟應尅日出發星夜馳援不能坐待游擊隊著留鎮攝地方無庸帶行切速勿違督軍印

旅滬川人致滇督電

雲南唐督軍鑒報載貴督軍派兵入川爲羅後援不勝駭異此次羅劉禍川無論曲在何方中央自有主裁何勞抱薪助火報載之言或係訛傳貴督軍諒不至此若確則視川省爲貴省之戰敗殖民地不然貴督軍據何法律有派兵入川之權西南黎義貴省固屬有功然政府授勳史冊紀錄亦足以酬須知四川乃四川人民之四川非國家酬功獎勞之具貴督軍功高望重尙祈善保令名勿爲此飛揚跋扈之舉若悍然不顧徒恃兵力則國法俱在清議難逃愛人以德特進忠告旅滬四川公民樊明三李屬江

資中道上見聞錄

陰歷四月初記者由陽縣至資一路甚屬清平行人絕少有上無下各場除茶館外多無生意棧房頗形冷落今將所見聞彙錄於後以嚮閱者

飛鴻鋪滇軍第六遞騎哨駐紮每日往來遞送該軍各文件

南津驛有滇軍步哨鋪戶關閉毫無生理

五里店石橋鋪一帶無滇軍步哨行人亦少（以上資陽屬）

金帶鋪駐滇軍第九遞騎哨雙石鋪駐第十遞騎哨

資中縣城貿易如常各城門均有重兵守衛惟進出尚不甚盤查王旅長駐於城內

滇軍又提去征收款三萬元糖捐銀二三千元

王旅長之部屬王營長曾駐東較場妄殺無辜人民卽該營長也日前至資中忽然瘋魔以手槍自射其心窩而又不卽死終日糊言旁人聽其所言似有人索命狀時則大聲疾呼時而低頭不語現因此請假另委營長報應之速亦顯矣

滇軍某營長之家屬昨由資過井至陳家場前面么店暫息護兵十餘人槍支置於店門突來土匪二十餘人先將槍支奪過并欲淫其家眷云爲川人婦女報仇經旁人勸止乃盡搜其行李槍斃護兵一人傷數人而去

銀山鎮地方（離地四十里）駐紮滇軍一營

至入內江縣境則係川軍第一師範圍云

兵禍中之拉雜記

四月十八號羅劉兩將軍交戰之後至次晨砲聲尙作之時商會總協理周葆誠白米舟及城內神耆曾奐老曾篤老顏雍耆徐申甫諸君尙冒險赴各處探聽情形並籌商調和之法俾免戰禍自此直至滇川兩軍撤退之後維持調和諸君無日不奔走於危險之中

皇城即督軍署前後門縱火之時聞係用水龍皮袋灌以洋油施於屋瓦然後射以硫磺彈着火即燃

此次成都戰禍英法日各國領事及僑寓西人教會青年會郵務局長杜達諸君尊重平和極爲熱心近杜達君不日回國有擬發起爲杜君餞謝者

聞羅督係於二十五號出城宿兵工廠是日滇川兩川交換俘虜聞每天釋還

者約百餘人

煙酒公賣局局長李臨陽濬川源銀行總理胡壽生皆滇人均隨羅督東去聞李係請假兩月

此次兩軍施放大砲之時各處落有砲彈者甚多幸開花者少其調查未悉者則無從紀載茲僅就所探得落有大砲彈之各地點如下

東門外製革廠側西門外青羊宮側某姓墳墓文殊院東珠市巷玉皇觀聚昌印刷公司鼓樓北街珍記紙莊大八巷提督街三義廟總府街商業場福建館華興街北署襪街省議會南門文廟街

英法日領事二十號先約定兩軍停戰以便從中調停晚間在停戰時間內入皇城正羅督坐談未久忽聞有大砲聲且落有砲彈於坐前不遠之地是晚三領事均守於皇城而未歸次晨始冒險出皇城日領事在皇城外遇一槍彈從肩上飛過幸均未受傷

戴省長於十九號午後至督署擬商停戰調和先以電話向兩方面約定已得許可不意行至紅照壁而槍聲作遂返

前財政廳長楊寶民家住少城某街被抄聞楊有隨羅督東去之說

政務廳財政廳於五月一號滇川兩軍實行撤退後召集人員照常辦公四門統捐亦於是日開征

滇軍於五月二號完全由省城東門外開拔聞有由水路行者封船百餘隻是日黔軍接收兵工廠

聞此次皇城内作戰者僅警衛團三營東較場駐紮之滇軍第二十四團未與戰事又滇軍何海清團長所部由綿竹歸省並未進城紮東門外皇城前後門僅機關槍兩架

聞羅督係於二十八號由東門外兵工廠起行由仁壽小路赴資中劉軍長係二十九號拔隊出城駐鳳凰山

聞督軍署軍需官穆伯仁被川軍所拘之放火匪犯供稱係穆所指使槍斃後斬之

聞川軍第三師檄文有云彼羅氏佩金者籍本滇人身非蜀產非我族類其心必異云云

四聖祠教堂門首貼有紙條云無論何軍有搶劫毀損本會者賠款一百萬元第一混成旅旅長劉禹九君自新津來省卽於二十九號見戴省長請命令赴懋功勦匪當日拔隊赴懋矣

黔軍張參謀長耀庭於十九二十日內正兩軍酣戰之際乘輿往皇城調停乃行至三橋側近某街遇一砲彈正落前面乃棄輿步行而返

十九號省議會某君往皇城擬商調和之法以白旗大書調停二字行至某街遇兵隊阻之嚴加盤詰且曰我們在打戰你們敢到此調查省議會某君曰係調停非調查也乃釋之歸

十八號晚兩軍已開戰成都縣知事楊雲從君連日仍照常辦事署門仍照常
啟門縣署正當火線砲彈飛落無數房屋打毀兵隊搜查甚嚴楊知事堅守不
離並保護署側各街居民及監獄甚勤

華陽縣李知事係雲南人戰事起卽被搜查李君避之至二十八號見省長辭
職省長未允令在黔軍範圍內行使職權

成都征收局被劫華陽徵收局亦被劫

督軍署參謀李伯良被川軍拘留時聞在室內屢次聞劉軍長命令停止射擊
中央任命王采老張佩嚴查辦川事據京電已於三號啓行乃日來外間傳聞
中央已改任曲同豐入川查辦此或在京某部分人曾有此運動未必遽成事
實也

未開戰前四川新聞警華報被羅軍逮捕之主筆發行人確於四月二十五號
午后由黔軍送出有謂有數人均被軍棍重打有云辛君丹書一人者辛君現

尙在外人醫院養傷又聞彭君仲甫且曾被羅軍勒令抬子彈云

僅東較場一地冤死屍體聞有人調查其確數至五百四十二具均由城頭擲之城外

自流井滇軍挖壕架砲日爲軍事準備聞五師有少數兵隊駐富順之牛佛渡一師有駐內江者

補誌各方面要電

張道尹去電 嘉陵道尹張瀾致四川參衆兩院議員電云羅督軍治川無狀尤着者當裁兵之時而罄川兵工廠半年所造之械彈悉授徒手滇人增足兩師提款踰七百萬金而至要之軍餉尙多未發巫匪前據棉竹時人越貨曲爲包庇因之各地盜匪縱肆至今未已嗜好甚深致煙禁廢弛滇省大宗鴉片源源輸入川中凡茲事實皆諸公所早知近復藉裁兵之名行殘害川軍之計意圖據川境不惜禍川川軍異常憤怨五師長兩次聯名電劾釁隙已成日趨險

惡瀾元日曾電陳大總統總理文曰羅督軍裁兵失平致激川軍全體抗議勢成水火同器豈容羅督軍請假入京忽又中止對於川軍既懷讐嫉之心川軍各師亦隱抱不安之慮風潮衝盪罅隙日深近聞羅督軍調兵索餉備戰益急川軍各師地處危疑力謀抵抗禍發在邇人心惴惴千鈞一髮莫喻危險川省治亂動關全局欲奠中國斷難漠視矧蜀經三次革命民墜塗炭衽席之安至今未復我大總統總理仁厚爲懷早縈惻念若再陷之水火必將益勞神明瀾謬膺道尹身負地方之責睹茲危象迫切陳辭山突徙薪尙猶可及斷絃離柱一逝難追謹此上陳伏希裁察等語諸公關懷桑梓請速協電府院立懇解決川兵固當裁處置川事要不可不公平如不去羅亦當別有辦法倘再遲回猶豫焚如之禍卽在目前臨電無任屏營張瀾叩銑

張道尹又電 萬急北京大總統國務總理鈞鑒川禍必發早於元電爲我大總統總理迫切陳之頃聞成都滇軍與川軍互相衝突自昨夜八時至今日午

槍砲未絕糜爛慘狀何堪設想風潮激盪勢必蔓延誠恐日內戰非一地泣懇我大總統總理速降明諭嚴令滇川兩軍停止戰鬥即派大員來川澈查分別功罪去留庶川亂可弭既失曲突徙薪之計應亟亡羊補牢之圖急痛陳辭罔知忌諱嘉陵道尹張瀾叩皓

張道尹又電 萬急北京大總統國務總理鈞鑒川變奉明令後川滇兩軍均遷駐省城外亂事似可止息但風潮震撼日甚一日危機險狀勢將蔓延靜推致此之故皆由疑懼而生疑懼之原厥有數端一因綿陽漢州等處滇軍及自流井資中等處滇軍向成都集中瀘叙滇軍亦聞西上川軍疑懼以爲羅前督軍將對川軍大施攻擊一因雲南唐督軍有出兵由昭通趨蜀之喧傳川中軍民以爲滇人將實行以武力併川之策一因滇軍用石油將督軍署皇城垣外民房焚毀延燒萬餘家死傷數千人無論軍民間之皆痛心切齒一因戴省長未宣布就兼督軍職羣龍無首紛亂益滋有此數端禍胎尙伏川軍既懷疑挾

恨滇軍亦逞忿尋讎時危事急較前尤甚如稍縱弛恐星火燎原更勞屢系應懇我大總統總理迅催戴兼督軍就職并令各滇軍仍駐原防不准向成都前進再明令編制以安其心一面嚴令羅前督軍及川滇各師師長旅長等管束所部勿再尋釁違者即從嚴治罪水懦火烈玩畏攸分軍紀國綱豈可陵替道尹就諸方面觀察非此無以解亂息紛非速請明令解決亦恐後時無濟心所謂危故迫切上陳是否有當迅請鈞裁四川嘉陵道尹張瀾叩勸

劉軍長去電 重慶商會並轉紳學各界諸先生鈞鑒皓電敬悉此次變生不測消弭無方滇軍縱火焚民房數千戶殺戮軍官主筆及已繳械散兵數百人積屍東郊砲轟四城雖經省長省會及各國領事調停中央令阻彼仍肆無忌憚多收石油四處放火川軍已遵令停槍彼仍到處挑釁紛調多兵禍機尙未全消除敦請戴兼督速就職負責並由存厚嚴督將士協力防制以期速就平息外特電奉覆存厚養

渝城各界電 成都劉軍長鈞鑒天禍吾川迭遭兵患現羅督已通電遵令解職和平可望殊傳聞我公猶豫未決千鈞一髮關係匪輕特在愛公敢進忠告軍人主義首重服從務懇垂念桑梓息事寧人格遵京電即日罷兵北上表明心跡於公民兩有裨益不勝急切待命之至重慶總商會會長汪德薰溫仁椿暨紳學各界梅樹南胡啟虞申家樹文光漢趙城璧曾鼎勳古秉鈞溫嗣康等叩敬印

渝城各界又電 成都戴省長鈞鑒修道尹批示二十二電藉悉省難未已憂心如焚頃致劉軍長一電文曰（見上）等語務懇我公始終維持力予調處俾免再啟兵釁萬勿遽萌退志轉難解決重奠川局惟公是賴重慶總商會會長汪德薰溫仁椿暨紳學各界梅樹南胡啟虞申家樹文光漢趙城璧曾鼎勳古秉鈞溫嗣康等叩敬印

北京院部電 四月二十八號北京來電云成都劉師長積之華密宥電悉已

電截滇軍不得再有啟釁行動至滇省派隊進援一節前已電唐督嚴飭勿動
已得復電撤消所派之兵尙希勿聽謠傳遵照歷次電令保守秩序聽院查明
解決院部儉印

補誌各方面佈告

五月二號四川省長兼代督軍布告云照得此次省城變事現已救平秩序可
望回復迭經本省長分飭所屬力保治安俾市面商民照常營業第地方甫經
兵燹粗就安謐難保無不肖之徒捏故造謠藉端生事意圖煽惑擾亂公安不
得不預爲嚴禁除令飭軍警嚴密防範查禁外合亟布告各界人等一體知悉
務卽各安生業毋自驚擾倘有造謠滋事驚擾人民及其他不法行爲者一經
查出定卽嚴重究懲決不寬貸切切懍遵勿違此告

五月二號省長公署布告云照得省城此次突起變故人民受害甚深本省長
從中調處英法日各國領事亦極希望消免戰禍故出而向雙方調停解說無

非意在息事寧人恐民間不職真相致生誤會特此布告俾衆週知

五月二號四川省長公署布告云照得此次地方甫經變亂一切安寧秩序諸待整理乃訪聞近日賭風大作街衢地面排列賭攤深恐匪徒潛身其間滋生事端亟應嚴行禁止以遏亂萌除令行西川道暨警察廳轉飭所屬從嚴查禁外合行布告各色人等一體知悉務卽各安生業毋得妄爲倘有不肖之徒不知悔改仍茲惡賭排攤一經查拿定卽重懲不貸切切懍遵勿違此告

四月二十七號省長公署布告云案據中國紅十字會華陽分會臨時災民留養院函稱竊本會宗旨所在原爲博愛恤兵當災黎滿衢死亡載道同人等目擊心悲不憚彈雨之橫飛敢效勞來之救護曾於本會丁公祠地點設臨時災民留養院並設分院二所兼負醫藥掩埋義務庶生有所寄死得所歸用副我省長主持人道之至意惟兩軍戒嚴道途多梗救濟一宗雖已達目的而掩葬一節尙未收全效苟再延數日不惟鬼無所依將爲淫厲且尸腐疫行流毒何

堪設想用特摹印中國紅十字會華陽分會臨時災民留養院圖記一顆并嘉禾十字徽章面署博愛恤兵四字一枚各一紙相應函送貴省長查照即請轉行所屬各機關并出示曉諭用資信守而便進行無任企叩等情據此合行布告週知此告

皇城門首有黔軍旅長熊令云禁止官兵無故出入携帶公物出署違者處以槍斃切切此令舊藩署門首亦有禁令文意略同

四月二十四號省會警察廳布告云軍興警察無權本屬各國通例昨以各軍劃防巡警停班暫避署所軍服公物不免遺失散棄誠恐匪徒拾得假冒巡警滋事本廳另製布標發警右臂緊繫若無此項佩章決非本廳巡士並商黔軍司令一律查送究治

四月二十四號省會警察廳布告云前因軍事紛爭現經和平解決非本廳協同黔軍共負保安安全責嚴禁生事造謠查拏匪盜攘竊城廂市面商店一律照

常營業恢復安寧秩序切勿妄生惶惑

四月三十號省會警察廳布告云照得川滇兩軍業已一律撤防出城所有各街壕壘阻碍交通者立即平去復還原狀機關秩序安寧賑卹死傷支配流離等事業由本廳陳明省長尅日興辦務使我水深火熱之父老子弟轉危爲安共謀生活自今以後如再有捏造謠言肆行煽惑乘機劫掠侵占財物以及煙賭一切不法情事經本廳查獲按照情節輕重立予執法不貸爲此布告仰閩城人民一體遵照此布

四月三十號憲兵司令布告云秩序漸定居民毋驚派隊巡查極爲認真倘有奸宄擾害民生軍法從事決不稍輕又告云嚴禁賭博如違拿獲重懲不貸
五月一號成都縣知事楊布告云照得省垣軍事現已和平解決軍隊開拔出城市面如前安帖諭爾商民鋪戶均各照常營業至於被災黎庶流離實堪憫惻繼續設法賑濟分別緩急供給倘有乘間滋事行爲不守法則定卽嚴拿重

辦決不稍事姑息特此諄諄布告其各凜遵毋忽

陸軍第一軍司令部布告照得滇軍縱火焚燬民房以致居民流離失所本軍長限於區域不及防護良深愧怍惟本軍區域以內亟應防制倘有上項情事發生更何以對同胞茲爲思患預防起見特擬就保護居民條令通飭遵守以資保衛除通飭各旅團營外合亟布告各該居民人等一體知照勿違切切此告

保衛居民條令

(一)本軍衛戍區域內如有借故擅入住居人民擄掠者准其就近報告軍隊官長立時派兵前往捕拿轉送本司令部從嚴懲辦各該居民力能捕獲亦准送由就近軍隊轉送軍部依法懲治

(二)本軍長已通令各旅團營如有軍事上之必要務須搜查者許其酌派官長帶兵會同警察前往不許士兵單獨入室搜查以杜弊端嗣後如有假

名搜查並無官兵督率者必係匪徒假冒准由各該居民報請就近軍隊捕拿送究

(三)本軍區域如有攜帶引火物件希冀放火燒燬居民者無論士兵居民均准報請就近軍隊捕拿送部嚴辦

(四)無論拿獲劫匪或放火匪徒一經送部審實嚴辦後其原報之人均由本部酌給獎資但不得挾嫌誣報致干反坐

劉軍長示云查有不法之徒現在各街游蕩包纏極大套頭並將花插頭上到處肆行騷擾實屬兇惡萬狀特行布告禁革拿獲定加懲辦

陸軍第一軍軍長劉示云昨夜皇城附近滇軍猛射洋油縱火延燒民屋環放槍彈不休以致無敢救護延燒街市成坵并聞死者多人生者家室離流似此瘡痍滿目深疚捍衛弗周現急會商省長首先撲滅火頭大局從速解決以釋人民殷憂

陸軍第一軍軍長劉示云照得現已停戰靜候中央解決乃聞近日街巷傳言將打起發顯有奸匪造謠意在乘勢搶劫已飭部隊查拿嚴辦決不姑息礮兵第二團團長賴令凡本團士兵未奉長官命令有借搜槍爲名擅入人家者立按軍法處治不貸此令

四月十八后成都兵禍又一記

成都此次戰事人民冤死者數千人財產損失數百萬爲張獻忠以後未有之慘禍當戰事未發生之先禍機四伏人人早知必有戰事然猶私心各自揣測以爲省城住有數十萬生靈或不至淪爲戰場乃事竟出乎尋常人意料之外四月十八號夜隆隆然槍聲作矣

事前狀況之緊急 當未決裂之先羅劉感情日惡且連日兩方面均通電中央兩方面均設戒備每近黃昏時各放步哨凡重要地點安置機關槍午後七鐘兩軍區域內卽不容易通過識者已預料戰事之不能免也

兩軍轟擊之開始 兩軍轟擊之始爲四月十八號午後七鐘先是六鐘時羅軍由溫江解運軍械進通惠門經過劉軍工兵營防地（工兵營駐西較場）劉軍盤查一面用電話請示劉軍長可否准行劉軍長回電准行羅軍兵士負氣言曰我怕不准行哪也要准行於是兩面兵士互相詆毀竟至開槍然此不過一部份兵士之衝突使羅劉素無意見正當解決并非難事惟羅劉早有決裂之勢此事遂爲引火導線

市面人民之驚惶尙未開戰之先除兩軍防範區域外各街人民猶熙熙攘攘一聞砲聲於是紛紛亂竄有關閉鋪門者有收攤子者有急奔者有覓熟識鋪家躲避者秩序大亂具一種惶恐之象非筆墨所能罄述

兩軍戰事之經過 十八號開始轟擊十分劇烈至十九號午刻大砲連放令人心胆俱碎殊午後五鐘隆隆之聲不絕於耳槍聲有如連珠西北方面黑烟瀰漫至九鐘時忽見火光焰天一夜砲聲槍聲譁噪聲哭泣聲實不忍聞凡戰

線附近各街子彈紛飛有如雨點是時人民之慘死者不計其數直至二十號午前八鐘火光猶未息滅惟槍聲漸稀人心稍慰殊十一鐘許砲聲又復連續不斷時愁雲密布天忽降雨着火之處但見白烟飛騰過此始議停戰然雖云停戰十日之內實無日無夜不聞槍聲也

人民住宅之焚燬 十九號夜砲聲隆隆之中滇軍爲亮城計縱火將貢院街東西鵝市巷東西御街焚燬往下燒至三橋北邊止當焚燬之際不但准施救并開槍指向着火處射擊人民狼狽逃命凡重要物品付之一炬其有未逃出者不死於槍即葬於火矣二十二二十一兩夜滇軍復縱火東西御街東西御河沿街亦被滇軍分頭縱火延燒多處（劉存厚公館亦被焚）

人民流離之慘狀 二十二二十一二十二連日均有被火難民紛紛逃向東面此等人民或僅負被蓋或受微傷或携少許零星物件由街面經過皆含有悲慘之象如以快鏡攝影見之者當無不惻然也

城內區域之大概 戰時城內各街可劃分爲三大區域曰川軍區域曰滇軍區域曰黔軍區域由東門起經糠市街書院西街湖廣館華興街曲轉至會府順城街鹽市口三橋南街直至南門均屬黔軍範圍各街口子均集重兵并起街面之石板築成掩護堵截亂兵緊急時卽不能通過南門自孟家巷起轉西至少城又北門老關廟之西正府街青龍街之北均屬川軍範圍東門自字庫巷經層天廟書院北街梓潼橋慈惠堂純陽觀馬王廟銅絲街喇嘛寺以及皇城附近均屬滇軍範圍此次戰事滇軍以皇城爲大本營以東較場爲輔助軍川軍以北較場爲大本營以西較場爲輔助軍皇城居省城中心一面發炮擊西北兩較場一面亦受兩面之還擊東較場發砲擊北較場北較場除擊皇城外一面亦還擊東較場人民受禍最烈者首爲皇城壩及北較場附近次爲東西兩較場附近此戰時之大概情形也

戰事調停之經過 當戰事未發生之先雙方意見日深戴省長極力調停迄

無效果及至開戰以後仍用電話雙方勸解十九號復由紳商界及英法日三國領事出而調停午後同往督軍署面述一切惟兩面正當酣戰之際是夜三國領事即往皇城次日方出是時戴省長已接得中央飭雙方停戰電令又復用電話雙方勸告羅劉始允停戰惟磋商停戰手續頗費周折先是商定川滇軍駐防接近之處一律撤防改駐黔軍即以黔軍爲間壁免川滇兩軍再起衝突也殊換防時又生梗阻於是拋棄前議另籌方法乃商定川滇兩軍同時撤防退出城外川軍開赴新津滇軍開赴簡陽乃於二十五號同時開始撤防暫退城外川軍駐南門外武侯祠青羊宮二仙菴等處滇軍駐東門牛市口兵工廠等處而城內東較場之滇軍北較場之川軍二十七號尙未盡行退出當兩軍未撤防之先二十四號忽傳戴省長因調停困難權將黔軍撤防退出城外消息人民聞之大起驚惶紛紛請代表赴省公署挽留嗣經戴省長允許留駐人心始定此調停經過之大概情形也

停戰以後之波折

二十號既議停戰人民以爲從此可免危險矣殊二十二十一號匝夜皇城附近房屋又被滇軍焚燬當焚燬之際步槍之聲頗類鞭砲二十三號夜兩軍復於皇城及嘛喇寺兩處接戰二十四至二十六三日之內東較場附近滇軍又肆騷擾日夜皆聞槍聲二十七號午後四鐘至五鐘突聞東較場槍聲不絕人民又起驚惶未幾卽開滇軍已出城外人心始定是夜黔軍區域內益復嚴加戒備二十八號各街人民往來者驟形增加惟各街口子又掘街石增築掩護又復不能通過矣

四月十八后成都兵禍又一記

四月十八日傍晚時鼓樓街紅廟子街暑襦街等處行人飛奔詢以何故均云不知有頃傳聞天成街已開槍擊斃數人矣是夜數聞砲聲至拂曉時愈密十九日八鐘時有自羊市街來北門者言此時督署滇軍均立舊皇城上以槍

向西較場及舊將軍署方面射擊少頃有川軍官來北區言自昨夜起開始攻擊云云俄而皇城四面槍聲密發傳聞劉軍已攻少城小東門及倒城牆一帶均有川軍梯城向督署射擊時鼓樓北三街紅廟子街德盛街爲川軍第一防禦線馬王廟街爲憲兵防禦線駐軍令將柵欄關閉各於駐地掘街石砌壕口傳語各鋪戶入夜均於門首燃燈戒無宿樓上於是人知戰事將愈激烈矣薄暮時槍聲驟密大砲雷轟東較場北較場皇城及西較場相應而起任家巷康公廟天成街等處係東較場滇軍防守區亦與鼓樓德盛等街對射德盛街王某住宅曾落開花彈一枚二櫃被打碎幸未傷人是夜槍聲愈放愈密直至次晨九鐘始漸稀

二十日遙見皇城附近煙燄冲霄有自該處逃來者言滇軍以洋油潑房上燃燒人民逃避者城上滇軍輒加射擊故逃奔云自後攜被包逃來北區者絡繹不絕皇城附近之火光亦竟日未熄其日午前九鐘有英領事從北區經過一

般人民傳說經外國領事調停川軍駐西北滇軍駐東北黔軍居中段南段聽中央解決云是夜槍聲仍多然大砲聲則較少

二十二日自皇城附近負箱抱被婦孺相携來北區避難者益衆而鼓樓三街之柵欄關閉不通極爲狼狽有某署與夫折柵欄一板而行有人報駐守川軍云柵欄被砍開矣該軍連發六槍幸未傷人適鼓樓南街某富戶女乘輿至柵欄聞槍聲自輿墜下號泣而逃少頃其使女尋得乃負之而過其自皇城附近火勢愈熾人情洶洶忽天降大雨約半小時簷端水如注火勢稍減然仍蔓延未息劉軍長出示謂已會商省長從速撲滅火頭

二十二日九鐘北門城開難民爭出避逃者絡繹於途有一婦携幼子數人疾行一幼子索錢五文買食物該婦云家已傾矣汝尙欲得錢耶聞者痛之其日午後皇城附近火光復大熾北區雖稍遠無不引爲大戚矣

二十三日北門晚開未久卽關閉而駐守之川軍方從事壕壘午後川軍一排

在紅廟子鼓樓北二街口增修壕壘一處既蕙事又進向鼓樓洞外三倒拐作壕壘進取鼓樓一街駝運行滇軍馬數十匹又進據山西館鼓樓洞之川軍復退聞滇軍已漸開出城

二十四日川軍第一防禦線退駐鼓樓北三街口晝間無事夜有黔軍自橫梓街來與川軍交涉於是黔軍駐鼓樓北二街川軍駐鼓樓北三街是夜洞樓及任家巷仍有滇軍放槍川軍未回射

二十五日夜駐北二 黔軍忽開去川軍戒備頗嚴謠傳滇軍出城者復折回一般人愈懼其夜北區雖有數次槍聲然兩軍未嘗相接

二十六號劉軍下令據探報有滇軍著普通衣入其區域其第一警戒線無論何人不許通過第一警戒線內惟本街人得通行於是郵政往來亦有阻碍有昇櫬者五至北三街不得過復昇返其夜駐成平街滇軍攻馬王廟憲兵陣斃者二人放槍數十發而止

二十七夜成平街滇軍復進攻馬王廟憲兵德盛街川軍見成平街燈火驟息知是滇軍來撲急發手機關槍滇軍傷十餘人始退

二十八日聞滇軍陸續退去駐城者已無多然其夜古佛菴成平街滇軍區域仍有槍聲古佛菴玉沙街等街街正以被數次劫掠騷擾不堪向劉軍長請設法維持

二十九日滇軍駐東較場附近者約一連經川軍追逐有數十人避入外國人教堂經人調護該軍卽時開出

三十日北三街柵欄已開駐守者爲馬王廟憲兵前駐之川軍已開駐北門外而鼓樓南街大陽溝等處黔軍駐守區域增築壕壘交通猶滯

五月一號駐鼓樓三街憲兵亦開去壕壘悉平附近北較場一帶街面皆可通行北區秩序自是漸回復矣

滇軍過簡陽述聞

簡陽來客云滇軍自省城開出後自沙河鋪至龍泉驛直線四十里左右十餘里時聞騷擾居民皆聞風逃避有某某等姓留守家屋者經搜獲拉去勒索銀錢不遂即予槍斃婦女亦間有被污者又有某某等姓逃避一空滇軍搜索無獲即將該住宅付之一炬云

石橋之滇軍多在鋪面分住每見有兵士與年少婦女同桌賭牌其年老而貌陋劣者丘八爺則使令與伊等裝烟或烹調飲食

石橋場口外有鄉人所喂之鵝兵士估捉之去鄉人大嘩兵士即用刺刀戮之鄉人卽任其所爲不敢再向阻止俟兵士去鄉人尾隨之偵其所止地點嗣卽赴滇軍長官處鳴冤長官查明立將該兵士槍斃

又一兵士買米米戶索價每斗一千八百文兵士欲照成都市價給錢米戶不服以致爭執時該軍長官出巡適遇其事卽出手槍將軍士擊斃聞簡陽城內亦殺有兵數名一般兵士近稍稍斂迹矣

令查未炸之砲彈

此次戰事城內居民拾有開花炸裂炮片者甚多省會警察廳爲防患未然計通令各區署所云查近日街面有無知人民拾得落地未炸砲彈玩弄爆裂受傷甚多合行令仰各區所速傳諭各區街正轉告各街居民人等以後拾有此種物品務須送所查驗免生危險云云

兵災瑣聞錄

探聞此次戰事調查員分頭調查業已得其大概聞皇城周圍被焚者一千一百零九戶焚民千八百餘丁口爲流彈所傳者二十九人死者三十六人又一消息成都屬被焚者八百三十九戶被劫者五百八十餘家爲流彈所傷者二十人死者六十五人

前月十九午後五鐘許武成門探訪所忽來滇軍十餘人入室聲稱奉營長命令飭員警等將裝械呈繳并云上城點名後卽送回總廳當各出長繩將員警

十九人及楊署員之客某甲逐一拴捆拉上城去移時拋下正探訪楊金鑑遍體鱗傷斃命某潛瘞之其婦於日昨三號扶其柩去副探訪周海雲被刺傷掉下城後死而復生四更許扒至某宅某潛將周送至對岸養調周於驚恐劍傷後復聞全體被害之惡耗一痛而絕

又某夫婦二人被滇軍拉至城上以刀刺其夫婦堅抱之滇軍用槍個猛擊婦手奪其夫而摔諸城外其婦不知下落

又有某甲被滇軍以刀刺之拋於城外未死跪地求饒當被某乞割其衣而擊斃之

鐵脚巷協興祥店內當十九號戰禍正烈時舉家席地而臥忽一大砲彈飛墮洞穿壁板從臥席上墜地裂地數尺幸未傷人檢視墮地物乃大開花彈也適觸土上故未爆裂該店人均未免危險矣

東御河沿街某戶於戰時舉家臥地板上一大砲彈墮門外石上登時爆裂有

散子自地脚穿入竟斃兩人

前月二十一號有一作工者入東較場附近滇軍區域內某戶一老人自室中呼云勿去倘滇軍窺見即不免槍斃也其人貿然向近旁住戶暫息有頃又同一年少者前行均爲滇軍戕害

華陽縣紅十字分會出一廣告略云本會並無人員到各街逐戶募捐若有各界自願募捐者請到本會給以正式之憑據

前日貢院門街及附近一帶地方所有之電線桿均被火焚燬近日電局因急於便利交通已開始修理另換新電杆

成華地方自治研究會昨開職員會到會職員約十六人缺席二人由鍾幹事主席提出此次省中變生人民橫罹災兇應如何施救經衆解決即日擬電中央請轉王張查辦使迅速到川以奠蜀民並由該會捐出款項賑濟災民聊解目前之危

馬道街某木匠年將六十當四月十八號早晨正槍林彈雨之中冒險往某處收賬以沿街尙未設防禦綫諒無大礙殊甫行至馬道街十字口突被滇兵在城牆上瞥見擊伊一槍貫穿背脊倒地殞命家人聞耗趕至當卽昇回安埋羅督於四月十九號放火焚燒皇城壩民房受災回民馬榮華在西御街開有製革廠茶葉舖各一又在皇城壩開有飯舖茶舖客店各一共計五處概遭劫燬靡有留遺聞已將被災事實呈報回民俱進會附設調查受災回民事務所矣

滇軍開拔之資中

資中滇軍連日又紛紛開拔向自井方面而去沿途輜重不絕拉夫亦多資陽滇軍亦繼續向資中進發運大砲多拾

羅前督到後之敘州

滇軍到叙後遍駐於民家凡廟宇客店皆不肯入駐

王旅長召集紳民籌餉十萬紳商再三要求始允暫籌四萬
獨立營董營長於日前乘馬經南門突來二十五團之兵士十餘人將董營長
扯下馬來飽以老拳甚至有扁擔槍筒從事者比衛戍司令至董營長已狼
狽不堪矣

華陽紅會之追述

此次戰事發生於倉卒初時紅十字會均不能通過因此華陽紅會各職員分
處各區一時不能集合而該會辦事員極爲熱心於西來寺四聖祠等處設救
濟團於丁公祠原辦事處設救濟留養院聞其主任爲何卓冰陳鶴村及方曾
徐諸人辦事均能盡力

兩軍開戰射擊甚猛少城一帶居於第一火線之內砲聲雷動居民驚惶萬狀
是時該會理事長蕭君劍秋卽於附近火線內設臨時辦事處其職員爲袁君
朗如黃秉先楊蘭高張景卿李佐君諸君分擔掩埋救濟會計文牘各事

戰事發生後三四日內皇城左右遍地死身急應裝埋此時交通不便所有一切用費由就近募捐聞少城之慈善諸君極爲熱心捐助

戰事後四五日內各處交通困難該會乃向曾與老及議員諸先生道其情形遂得各君極力代爲募捐補助以濟該會急需

該會蕭君於戰時不畏危險偕同職員像館將皇城左右各處被難火燒掩埋慘况自行捐資拍照

現在省中秩序漸就恢復各處臨時辦事處已分別收束方池街一處已由蕭君令辦事人仍回丁公祠原地且聞不日開會議商該會出發一切事宜

三區巡警護災民

警察廳准法國駐川領事署函開逕啓者此次省城之變本署內收容災民男女數百人極承貴三區一分所警署派警保護官長等督率有方巡士等勤敏可靠故得秩序井然茲特函達貴廳希即轉知該分所并致本領事感謝之意

實級公誼卽頌日社云云聞雷廳長准此後當將該所出力之官長巡警各予記功一次以示鼓勵并仰第三區署長卽便查取該分所出力之官長巡警職名列表申廳以憑註冊

皇城後門一帶之戰况

四月十八號夜六鐘有滇軍運槍械子彈數十車入督署後門槍聲起於西南似在羊市少城與督署之間行人多被攔阻不能通行槍聲則較前益密人家多閉戶不敢出

十九號天明槍聲稍稀人家有啓扉出者川軍於騾馬市附近掘坑三壘街石爲掩堡置機關槍一具軍士多伏地束竹木爲障礙物以避彈也槍聲時疎時密川軍舉石板爲障蔽傍人家屋堦徐進伏地射擊

有九思巷茗肆中人爲飛彈擊斃某茶葉鋪學徒及某宅婢女咸爲彈斃傍晚槍聲益密滇軍束草灌煤油先縱火焚西御河街劉存厚宅僅焚其半而熄乃

再燃之遂焚盡御河沿一帶民房着火焚數百家自皇城後門迄於西二巷滇軍以噴水筒吸煤油澆民居故縱火極易

巡警救火者徐某登屋斃於流彈當火起時川軍令居民有業泥木工者往折屋以殺火勢滇軍縱彈擊之多斃者

滇軍潛自城門出縱火後復大呼劉師長放火居民多聞至天明火勢乃熄后子門某乾菜鋪焚斃一家七口二十號槍聲仍不止午前御河沿一帶餘火復熾黑煙蔽天大雨忽降乃熄

川軍於騾馬市街中交木作十字形以防衝突

午後二時劉積之師長親赴堯光寺防禦綫查勘掩堡及一切設備自本日下午後經外人調停槍聲稍止息然時有一二響入夜則其響又密

二十一號川軍橫木壘石作戰備有紅十字會員來往

川軍搜索騾馬市倪宅云中有滇人

巡警有携引避難居民婦孺越川軍掩堡而去者

滇軍有縋城出探者爲川軍盤詰捕獲

青龍街廁所有以洋油棉花放火者爲小孩發覺驚呼被擒

午後五鐘復有火起在御河沿一帶西南旋即熄滅東南則延燒竟夜有槍聲數十發

二十二號無槍聲街中禁人通行川軍掘壕益深闊

川軍盤獲携煤油縱火者甚衆滇軍時自後門掘一穴匍匐潛出縱火以焚民居間有槍聲數發

夜槍聲甚烈

二十三號川軍防守如故城上滇軍時有射擊

街中居民無敢窺望者城上滇軍瞭見有人輒縱槍擊之故也

自亂起驟馬市郵政支局移住堯光寺中是日始遷回原處

午後無槍聲入夜復有數十發

二十四號川軍戒備稍弛槍聲亦息入夜亦無槍聲至二十八號始撤去橫木至三十號始平去掩堡填平坑塹川軍完全撤防

乘火劫物者被獲

皇城壩轎夫蘇某日前乘火搶得布疋一大捆寄存鹽市口洪發懋粃舖昨因分贓不平彼此大起衝突被巡警查知當將該民等一併擋局訊究又昨（八號）憲兵司令部偵探在總府街口大生昌茶社見一衣服襤褸之男子用破綿襖包裹青狐淺大袖皮馬褂一件在彼兜售該探見其形跡可疑上前盤詰該民語言支吾臉色紅漲當將人物一併送交二區警署查究聞此人名史得勝云

后子門西城根城半中有野樹一株上懸草席一床詢及城下災民僉稱此卽滇軍由城上放火拋下之物也至今尙存可爲災民之紀念物

東西城根下一帶民房其被焚者無論矣有門面極好外面貼一紙條此處已被燒燬詢及災民何以外而完全內面火從何來據云棉絮和洋油由城上擲下引燃并不許救如有潑水者城上卽鳴槍射之

東西城根被災較之貢院街后子門稍輕然所有居民雖未被焚而房屋亦被城上滇軍用城磚拋下將房屋打毀至今房上尙有大磚纍纍此亦滇軍遺留之紀念物也

板門子茶鋪左右數間見有鋪板門坎被火燒焦而房屋無恙詢之居民此何以故據茶鋪掌櫃稱此滇軍用洋油潑上鋪板以草蓆引燃卽走居民見滇軍去遠茶鋪儲水甚多大家撲滅得免

此次戰事發生東華門一帶挨戶騷擾災民過多難於記憶惟東轅門街貢院門起至東華南街柵欄止所知者有鼎升和錢舖劉賈兩家馮炳森黃姓衣鋪馬三興馬徵庸擺和齋馬相帆馬成周賴輝武唐洪順某等衣舖四家鄭宏道

刻字舖均被打起發損失一空甚有熙記玻璃舖室中無人該軍士亦毀門而入貨物全行擊碎搜攫陳李氏老媪手工積存銅元十千銀四元

陝人某因拉夫不去被槍斃於途此外一裝煙者米家門道老媪某中彈殞命謝黃兩人受傷現正醫調

此次戰事城內當舖因有被軍士打起發者昨該幫特開會議准取不當以作停業之計云

陰歷又二月二十八日午前川滇兩軍交戰槍彈橫飛時西順城街輔仁學社三層樓玻璃窗被流彈擊碎旋即高懸英國旗子彈即未從此經過得以安居無恙

前任禮州分知事羅大鏞住少城東門街當十八號戰端開時尙在友人處趕速回家至少城東勝街適川軍與滇軍正於倒城墻地方苦戰羅入濟川學舍暫避戀家急復出校飛奔而去該處川軍喝使止不聽問係何人不應當發一

槍自羅腰腿間穿過登時倒地匍匐至濟川校外某酒店自云我姓羅係雷波人羅所著衣服旋被乾飢剝去紅十字會收遺屍時已將羅屍叢葬通惠門外其家尋覓四日聞東勝街酒舖云有姓羅者擊斃始往紅十字會詢問於叢塚中尋得面盡黑不甚可辨足上洋襪一雙係其家屬手製始將屍身還當前月二十六七滇軍退出城時有一營駐農業學校甫到即將學生衣物搜括并將該學生等鎖閉室中不令出外該校校長聞滇軍尋之恐被其害先機出校當報告省公署函紅十字會前往將該學生等接出不食已日餘再遲卽不免餓斃矣

當四月十九號戰事正烈時有數處防禦線雖郵差亦不能通行北區某宅接一信係由電局信差送達因發信人急欲通其意故託該信差附寄某信差言經過康公廟街口見一普通人至該處已過滇軍防禦線該軍喝使止步卽前搜索旋加槍斃某信差所持信亦數經滇軍檢查送到某宅時其狀猶惶駭也

十九號兩軍激戰時滿城彈雨紛飛皇城所發大彈砲墮落民家者已紀前報茲又聞驛馬市街某酒店落一開花彈幸該室有頂蓬其下爲一礮礮口衣服層疊姓極柔軟彈適墮礮口得不爆烈惟某錢紙店被一五子彈穿過大木礮并貫穿店主之手又石牌坊某公館亦墮一開花彈穿樓而下觸地爆發洞穿一七歲小孩子

五月一號夜聞大紅土地街街民拿獲放火婦人兩口捆送警察廳經雷廳長派員率隊在該婦住宅搜出洋油數桶濫軍裝數件雲烟兩大盆據該婦供稱伊女嫁與滇軍某叫伊母放火每人能厚酬云云四號夜北區警察又在珠市巷拿獲放火賊一名於五號捆送總廳請予懲辦

鳳凰山四號有某差遣見開花彈有污拾起以帕拭之甫摹撫間偶爾爆裂砰然一聲遂將房舍冲塌并將差遣冲出房外墜地而死且身體焦黑云

四月二十二號有一婦欲出武成門同行一幼孩約十三四歲爲携被蓋一床

已至該處一軍人疑之並搜其身得銅元數百銀元十餘枚婦展轉不得脫大呼打搶人滇軍怒毆以數刀幼孩則棄被蓋奔回得免

中醫卓莘臣家於陰歷三月初三日突有滇軍入其室佯云求診卓方抵掌於案遂爲軍人所反搏問借盤川其子自內聞之趨出復爲滇軍擊倒墜下再四哀說始以數十元了事

東御街口某油米鋪於四月十九號來有滇軍徒手數人督送米十石入皇城該鋪告以無人軍人乃各負二斗去時以一紙予之上書收到米十石令其明日到軍署取錢此紙既無年月又無戳記掌櫃覽之惟自呻吟而已

四月十八號午後六鐘許橫通順街孫某尙乘肩輿自西御街歸家甫至公園之八卦亭則槍彈橫飛礮聲震天轎夫棄轎而逃轎中人俯匍以歸道旁死者四五人同行三者又斃其二歸家已無人色及停火往觀轎仍轎也而四帷已如罨網矣

興隆街陳姓厝房於十八號夜中一過山礮彈自屋而下椽絕其中入戶暴發連穿二壁穿棹入地其家現猶談之變色

此次滇軍過東門外得勝鄉大田坎之高小學校亦爲該軍所佔及去時將在校各員與各住堂學生之被蓋帳子箱中衣服概行挈去並將棹斃作薪助炊房屋全遭損壞惟自習室一間無恙以渠等將此室作馬槽故也現該校已陳報勸學所矣開課之期尙未可卜也

東御河沿街有老叟李某以打兔爲業於四月十八號在堵簷要突被后子門滇兵在城上打來一砲將伊擊斃次日十九號因滇軍四出放火其子出外買棺未歸李某死屍竟致化爲灰燼又后子門街柵子脚下有鍾紅豆者於四月十八號黃昏後正在點燈突飛來一砲彈洞穿屋壁鑽進鍾某頭部立即殞命貧無以殮次日滇兵焚燒房屋其妻甫將被蓋抱出正擬返身救屍殊火已封門鍾某屍竟被火焚

有渠縣旅省姜某者在上陞街某院寄站四月十九號夜出外買食甫行至后子門柵子脚以被滇兵在城上憑高俯見擊伊一砲貫穿姜某背心倒地殞命嗣經紅十字會掩埋

西御河街有劉與三者機房爲業因四月十九號滇兵以煤油射注民房四出放火劉同工徒搬運家俱於河邊擱置隨遣伊女(年約十二歲)在該河邊暫行看守殊劉去後突飛來五子彈一顆貫穿該幼女左手手心幸未傷筋旋送往醫院診治近漸痊可

聞皇城內井中尙有滇軍臨去時所棄礮彈

前月戰時川軍打衝鋒者以錢紙裹頭赤膊徒手已誌各報聞滇軍中前隊亦有以棉花裹頭者

前月戰事未解決時各處交通阻隔城外匪徒遍地而新郵務長塔君行李扛担安然進城無恙塔君係英國人也

聞皇城內被砲彈打毀者爲至公堂屋瓦及副官處之差遣室餘尙無恙

朱鷗齊等之通電

北京大總統國務院陸參部參眾院四川同鄉會南京副總統各省省議會督軍省長各報館重慶王張查辦使鈞鑒竊信賞必罰古有明徵縱兵殃民國垂常典川中變故純由羅督一人肇釁於先肆亂於後事實昭然中外共鑒既經中央派員查辦是非曲直將來自可大明無論滇川軍民苟有良知稍明國法應即靜候無俟調言乃閱報載羅督通電及王楨等質問書直斥中央爲作亂之人預爲卸過地步而數千萬慘被滇軍毒虐之生靈呼籲無路冤憤何堪近理亂真不能不辯查原電稱因裁兵問題釀成戰禍固矣然羅督爲一省軍政長官裁川軍隊應照中央核定辦法辦理乃於令准成旅之四師概以武力解散於遵奉裁編之二師又復派隊環攻即謂非強滇併川之謀已自蹈罔上凌下之罪對於中央是否欺朦對於川軍是否暴虐縱羅督不先發難凡我國民亦將聲罪致討不意羅督不自悔省而反捏詞妄誣蠻橫可知至軍事最重統

系凡命令文報皆按級遞轉原電似亦深知但羅督請覲入京非中央強之川軍迫之也何既經電准彼趙鍾奇等胆敢逕電請留危詞挾制釀此厲堵是直以中央爲兒戲故以一電嘗試俾貫澈其踞川之謀壞法亂紀莫此爲甚且劉存厚兼任軍長四六兩師皆其隸屬四月十八之夜六師師長顧品珍首先派隊攻擊軍司令部犯上作亂罪將誰屬乃故反其詞不罪顧品珍攻擊軍長翻謂劉存厚圍攻督署即使川軍爲防禦計偶以一矢相加不若羅督之喪心譴語直謂未一還擊然督署之側即品珍師部所在品珍既經叛亂川軍能不還攻而矯令圖川之羅佩金忽授以將軍指揮攻劉之劉云峰併任爲師長謂爲獎亂此或近似若以英領事一電巧爲證佐不知英領之電皆在督署迫發業經劉軍長照會質明并函省議會有案當亂事前後數日羅督通電日必數起而劉軍長一電不能拍發孰被圍攻孰爲攻者更屬顯然况戴省長有會辦之責若果川軍抗命何難手提黔旅一鼓盪平乃出作調人而換防黔軍反多被

滇軍傷斃強弱順逆尤有明徵此猶川滇兩軍之是非事實具存不能顛倒至謂停戰以後督署前後焚燬數千家民房滇軍區內慘殺數千之平民皆劉軍所爲意若川人皆已狂病故乃自焚自戕則益見爲此說者之喪盡天良也成都慘禍中外仝悲此亦欲爲羅掩飾蒼蒼者天夫復何言以上所陳不過就該電過誣之處略加指駁現在佳川滇軍集中附郭滇省援軍增益無己自東門而外千里之內村市爲墟雞犬不甯似此行動自由直欲宰割吾蜀反抗中央患在腹心禍懸眉睫川省生靈縱不足恤國家分裂亂爲胡底究應如何拯救之處迫切泣懇伏祈矜鑒四川全省公民代表朱鵬霄馬玉成湯晉三李猶龍等一萬七千人叩敬

請昭公允

川滇舉義再造共和轉戰熇納一帶之師謂爲有功則皆有功不得取彼舍此顯分厚薄致令將士墜心也

至兩軍交惡後謂爲有過則皆有過也何以但見滇軍變爲國軍而統滇軍者任爲師長川軍之將士無聞焉此劉軍長所以請獎有功也况同是中華民國之軍不應區而別之曰某軍爲國軍某軍非國軍此理明然無待研究者中央政府欲爲吾川息事寧人請注意於此否則有南北之見黨派之私也其何以彰公道而服人心

兩團長復議會函

三師步九團團長許澍及礮三團團長余昂覆省議會函云敬覆者頃准貴會諸公來緘殷殷囑以遠慮深謀萬衆一心固我西陲棒讀之下莫名欽佩吾川自反正以來歷年所受痛苦爲他省所無推厥由來實人各異心爲權利者半爲黨爭者半致使鷓蚌相持羣盜得乘間而入屢次決裂糜爛者非四川乎死亡者非四川乎中央之賞罰不明而彼則逍遙法外遠之陳宦其殷鑒也究之爭權利者安在爭黨爭者安在前事不忘後事之師可爲痛哭流涕者也此次

羅氏佩金在川種種事實早已通電宣佈在案業由各師預前聯合一氣爲川人爭一線人格羅氏又甘冒不韙竟首先攻擊川軍吾儕責有攸歸安忍坐視非不知糜爛者四川實長痛不如短痛亦屬不得已之苦衷幸各師士激昂微收效果然而吾輩天職尙未盡也誠如來緘所謂滇軍能否退出川境黔軍能否維持川局虎狼在室龍蛇遍野前路茫茫隱患方多現據各方面觀察團體甚堅將來如不幸觀於前事尙能一致進行不生何種問題惟貴會諸公爲七十萬人所託代表民意尙希立論正大化除意見勿爲黨見所愚權利所誤再陷人民於水深火熱之中自貴會成立以來爲人民造福者固多爲邦人士所指摘者亦時有所聞然已往者不可追未來者尙可圖此則澍等所馨香禱祝而不能已於言者惟川督繼任問題貴會及一般人士主張岑西林來川者甚多惟西林前清督川整頓吏治勤求民隱有清一代實督撫中首屈一指川中人民食其惠者至今尤有餘思即澍等亦同聲愛戴傾佩無已然時移勢易今

日之西林乃黨派最深爲西南政策中之皎皎者與滇桂粵之重要人聯爲一氣別有深意前此羅氏請假入覲來電切責阻止此其朋儻也羅岑比較孰擾孰劣不待智者而知如果言之不中則如天之福如成識語又致鉄馬兵戈相見於戎馬間想亦諸公所不忍亦爲人民所隱痛明者見機於未萌智者窺禍於未達幸少察焉至繼任者應以何者爲宜澍等所見當以超然派爲當勿問其爲南人北人不帶兵無黨見方能福川利民諸公如能以此主張進行將見四川數年痛苦或可撥雲見天兵氣銷爲日月光皆諸公之賜也患昧之見尙希亮察謹此肅覆敬請 台安諸維鑒照不宣步九團團長許砲澍三團團長余昂全啟

評議一

忠告滇軍官長

自井滇軍擄掠婦女一事本月初得訪函猶疑信參半繼而連接數函并他方

面之家信大略相同始信而不疑然余之心滋痛矣
中央特派之查辦使現駐渝埠而正使且係滇人今所爲如是雖欲爲之彌縫
恐亦難掩人耳目也

余敢正告滇軍官長曰再造共和滇省首先起義其所以能制勝者由於軍紀
風紀爲人所欽佩耳今若此匪僅吾川之不幸亦滇師之辱也盍起而補救之
請看四川之浩劫

羅佩金之兇殘

戴戡之險毒

某某先生偉鑒敬啓者前迭次於盛庠春膏等處得見手諭識見超卓議論宏
深誠爲民國砥石令人欽佩不置乃者吾川召禍雖羅佩金之措置乖方其遠
因實由於中央政府 先生知之不待煩述謹將吾川此次起亂之真象略爲
述之羅佩金自督川以來改西南政策爲雲南政策吾黨之獻策者遂墮入漩

過而不顧民政軍政均是川人受其苦今歲奉中央令裁軍調川中五師長集議川軍規定三師一旅雲南軍規定一師一旅川軍履行裁汰雲南軍則另設名目明裁汰實則加多至於軍餉軍費川軍每師全年八十萬雲南軍每師全年一百二十萬雲南軍用現金川軍用紙票故有五師長電陳中央羅因之請假進京旋奉總統府秘書來電厲行裁軍暫緩來京羅遂用強硬手段將第四師各旅團長官押署勒令繳械即刻發電中央又將劉存厚師長取消保劉雲峰接代各軍聞之異常憤激遂於三月十八黃昏時羅密派滇軍三路齊出一攻北較場二師本部一攻西較場二師砲隊營一攻將軍舊署二師砲隊團部遂即開鎗防衛終夜始息次日各方調停無效晚間又開砲對射羅佩金遂用洋油潑下將皇城前後左右一齊放火達旦停戰憲兵出而救火又被滇軍在皇城上用鎗猛射斃憲兵多人至午間火始息英法領事及省議會兩方調停電候中央解決殊二十一日滇軍先傳令告皇城壩居民及東御街西御街陝

西街梨花街等處卽行搬遷定放火燒盡到晚間滇軍由皇城出各帶洋油火彈油紙遍處施發火又大起由議員公寓電告省長速派憲兵救火至三更後始熄此羅奉中央停戰令後之所爲也二十二夜二十三夜羅又派兵猛攻少城鎗砲聲又自夕達旦羅見省議會緊急開會僉稱羅不誠不公釀此大禍竟於二十三夜用巨砲射議員公寓三放只中一砲房瓦皆飛其彈壳落偏房空處量之壳重五十六兩幸未傷人此次共燒民房三千餘家燒死居民三千餘人流離無依者七千餘人羅佩金之用心慘毒而川民亦慘痛矣川軍遵中央令退出城外滇軍仍盤據東較場二十五午後搜括附近各街銀錢貨物二十六午後又大肆搜括東北角一帶共十餘條街遂漸移住東門外仍大肆搜括滇軍在新東門見穿市布衣之平等人悉行拉去誣爲偵探其處決法爲自古所未聞在城牆垛口將人砌入用刺刀由礮門殺入拋下城去或用鎗由礮門施放以驗其鎗之力量數日內斃殺七百餘人哀哉川民不知何以遭此慘劫

也當其放火燒房之夜滇軍一面用水槍將洋油射下一面用火槍注射居民不准哀號不准外逃其不死於火者卽死於槍故死者如此其多及至移紮城外要勒索現金六十萬因之遲遲不去任意燒殺而又給手工錢數十萬川人真弱極矣此次川禍實起於羅佩金川中大小軍官均皆憤激劉存厚實有不得已之苦衷羅不派兵暗攻以武力解散劉何敢動川人團體向來渙散此次見此慘毒反對者極少前之留羅者二萬元現又暗中運動原人電劉以下犯上之罪亦係三萬元省城各界人言嘖嘖而彼等若罔聞者真喪心病狂川禍猶未已也現羅住東門外兵工廠聞將起程如果則川亂可稍息矣外面討羅軍四起各師長已開兵來省援劉羅如卽日拔隊回滇將滇軍悉行帶去沿途雖有騷擾以後尙無絕大危險若戀棧不去川禍不堪設想此對於羅佩金一方面之害也其最好狡者吾川之省長當事未發之前三日省議會見此勢機危迫請議長往公署詢彼如何調處並請到會出席陳述該省長僅派代表僉

謂代表能負完全責任否如不然仍請省長出席戴堅持不到謂有代表蒞會足矣衆詢以事前如何維持伊答以無法然則竟坐視不理伊言自有把握不便明言衆又詢以應爲曲突徙薪之計不應坐收焦頭爛額之功伊悵悵無言當卽咨請省長極力解勸免生衝突省長並不答覆及至禍已發生東較場及皇城係滇軍範圍北較場及少城係川軍範圍省公署及南邊係黔軍範圍川滇兩軍圍擊時省公署懸白旗中立都城內劃爲三區督軍與軍長交綏而省長中立此種情形不惟中國所無亦外國所未聞者竟於吾川見之更可怪者停戰後黔軍將省城從中割斷川軍退出西門而滇軍在東門一帶大打起發省議會當用電話請省長干涉而政務廳尹昌齡答覆小有騷擾未至全城大亂真正令人憤懣戴省長之計策裁兵會議時伊以會辦名義蒞會五師長爭之最力伊不發一言利用劉去羅恐不卽發兩方面煽惑之去羅後奉中央令果兼督軍恐各師長不服故又電辭仍暗與羅之軍長接洽令其緩去借滇軍

勢力逼劉將師長交與（此人即助羅攻川軍最烈者）劉雲峰接收先行募電中央謂劉不遵命令仍在開鎗攻擊將劉將軍銜一並褫去然後再接督軍印省議會見此情況開會討論謂省長事前不能維持事後不能補救督軍虛懸急電中央請岑西林督川一則川人愛戴二則不帶兵入川川禍庶有寧日擬電後省公署聞之竟將電報局員密令以緩兵之計謂各處電線不通不能打去又恐各議員開會討論竟將文廟前後街口用黔軍紮斷普通人漸有放行惟議員竟不放行唐宗堯用省議會議長名義過此將衣脫開遍身搜檢始行放去一連三日未開成會今日午後始行撤防此吾川近日最確切之情事也刻聞中央派王人文張有二公到川查辦此案戴以如此手段又有川中老朽數人在公署主持恐真象不得擴老朽之包袱種川中之大禍國會 諸先生當亦俯念桑梓早爲主張吾川自有客軍以來幾無甯日爲 諸先生所目覩而身受其害者也此次劉爲全川吐氣若以爭權利目之則差矣若以以下犯

上罪之不特墮戴之術中吾川人宜沉於九幽下獄矣語無倫次走筆值達祈先生諒之恕之餘容後再陳特此即頌偉安

滇省議會

議會者代表民意之機關也民之所好好之民之所惡惡之所謂民者國家之民天下之民無滇川之界別也

焚殺姦搆而益之以拉任何省任何人皆不能容滇軍長官且出示約束矣且斬其不法之滇軍矣可見滇軍中亦不乏公允正直之君子

武成門皇城壩之慘禍不知滇省議會有所聞否如有所聞亦當痛弔也然昨讀來電（見本報）則似尙未聞者

痛苦中之痛苦

巷戰七八晝夜慘死數千人民盡其力以從事於槍彈砲火者當亦初意所不及料也嗚呼傷哉

吾民對於貽殃者固不敢道之即對於造福者亦不敢稱之惟引咎責躬而已夫人民有心有口而至於引咎責躬不敢稱道一字如天刑之桎梏焉是誠痛苦中之痛苦矣

電報作用

川中變亂京滬各報紀載有與事實積端相反者且冠以某處來電某人來電以爲電文卽真相也

不知辛亥革命共和告成電報作用也癸丑軍興武人報續亦電報作用也推之一團體一會社之傾軋排擠亦往往而藉電報之作用嗚呼真正電文亦不知包含許多作用况乎報紙上之電文其不足輕重也宜矣

查辦使將抵渝

查辦使已將抵渝川事糾紛皆望立解不僅此次成都兵災之呼訴也惟是查辦使既代表中央而來王張兩軍又素有公正之聲望其存心固無私其處置

尤貴平伸中央之信造地方之福皆在此一行矣

代評

四川羣報社諸先大鑒（上略）岑西林督川鄙人去歲亦極主張及知其近况竊又以為不可輿論為事實之母貴報似可不必隨衆鼓吹鄙意以後督川者勿論為川人非川人均無所擇惟萬不能有黨派臭味供其利用蓋我國根基未定稍有變動苟握兵柄者黨見太深必又將吾川捲入漩滑無論其舉動為反對為贊同均必受兵禍也四川苦兵禍久矣必得一超然派督川不預黨爭專講地方主義然後吾川庶有休養生息之望今日所稱北洋派既無敢贊成岑西林近亦不免黨派作用私心故亦不以為然徵之往事胡景伊專利用共和黨與國民進步均不合故川中無寧日及陳二庵入川又附入北洋系漢事一起即立於反對地位受人攻擊川中又無寧日故愚以為他日欲免兵禍非超然派不可也

可矜而易撫

戰禍既息以後因惶惑而誤會因誤會而愈惶惑驚弓之鳥市虎杯蛇人情之常不足怪也

然而讀劉軍長禁止雙方搆煽之布告而人心定聞戴省長呈請緩裁兵隊之消息而人心定閱殷鎮守維持川邊秩序之電文而人心定

見其惶而知人民之可矜見其定而知人民之易撫嗚呼人民者可矜而易撫者也嗚呼可矜而易撫者惟我人民也

戴劉兩公

戴省長於成都戰事發生前調停無效戰事發生以後連日調停實費苦心然調停之地位最難處亦最易得咎惟識者能諒之

觀於駐省黔軍與駐西黔軍之紀律又觀於劉軍長迭次解釋謠惑之布告戴公固可欽劉公亦可敬無事生波者亦可以止矣

怪哉胡景伊

平張兩使奉令入川查辦川民不反對羅劉亦無所用其反對而反對者乃獨出於胡景伊（見日前京電）其反對之理由乃又獨以籍貫爲口實夫張川人而不黨王滇人而非羅派何嫌何疑而必改派耶苟查而不實再糾正之可也今未查即斥其不然毋亦有私衷不可告人者歟且查辦使亦以省籍爲嫌則胡治軍時川人胡中亮以檢查使回川又何以大博胡之歡迎同於己者則迎之異於己者則阻之中央豈胡景伊之中央四川豈胡景伊之四川乎

怪哉質問彈劾者

十八夜川滇兩軍交戰後凡在城內戰線中之居民雖其受禍有異而其惶恐則同惟東南一隅得以安枕而不驚不擾蓋由戴省長熊旅長鎮靜維持之功亦給軍恪守紀律之惠我人民也
乃不意竟有人焉反以鎮靜維持爲不當無端而提起質問彈劾之議可謂無

惻隱無是非而大悖民意矣豈若輩之心理以成都糜爛尙不足額必使全城無一寸乾淨土乃足爲快耶

箴川人

川事之敗壞其咎不只一人亦不始於今日記者川人也對於川人無不致其愛惜之私故揭其短誠非所欲知其病而不加藥石亦豈吾川人所忍爲區區之愚竊以爲欲出川人於水火宜先顧全中央之威信必中央之威信不墜始足以判是非而明曲直非然者中央命令先不能責效於川人又何能因川人之呼籲而懲創禍我川人者不惟沈冤永無伸雪之日舉國且將視吾川人爲化外之民揚眉吐氣永無其時矣

前王后王

陳宦查辦案成立國人方冀蜀民冤抑有撥云見天之望王芝祥方奉派而陳氏坦然無慮矣王芝祥一呈覆而陳氏竟逍遙法外矣芝祥不忍負其友忍負

川民不以私交廢公義求之今世誠難哉

此度事變王采老奉命查辦結果何若殊難預言以意度之前之王狡而滑后之王拙而誠后其有以異乎前耶

和衷

劉軍長起義川南功同蔡戴去年蔡松波公尙未抵省之時劉公拒絕周王約東部隊賢哉劉公此心可表矣

劉公近已尊崇中央命令而卸職矣願劉公部屬諸君其仍體劉公之美意事與戴公和衷共濟以保安人民也

十八後之十八

辛亥以後談川事而慨嘆者莫不曰十月十八

十月十八誠爲成都悲慘之紀念也豈知辛亥十月十八以後復有民國六年陽歷四月十八之慘劇耶嗚呼今之十八

十月十八之亂因僅十八一晝夜耳豈知今年陽歷四月十八以後復有連日之死傷流亡耶嗚呼今之十八

戰後之省議會

成都戰禍醞釀已久本年省議會臨時會開人民方冀爲議員者必有以消患無形維持桑梓也乃迄無所聞所聞者日日爭議長耳

戰事已發生人民已糜爛忽又有所謂質問書者出現可問之時不問不必問者而問謂之爲私固屬太過然妄則不免矣

查辦

十八日之役以中央已令王張二君到川查辦中央視川局之重要可知已因民國成立以來查辦使之字樣久不見於命令也近年海珠慘殺案徐州陰謀案中央對之但聞派調停之使絡繹於道使於彼而早以查辦行之其消弭未來之禍即謂錦城四月十八日可免聞槍砲之聲亦未可知也

往事已矣是非非吾所知亦不忍說惟冀所謂查辦使者蒞川之後得將蜀民此次所受痛苦博探周諮上達中央政府平民怨以此感召天和亦以此於民國破天荒之查辦使名義亦庶幾無所負耳

唐督軍請查之要點

日前公府又接雲南唐督軍來電謂此次政府查辦川事宜即囑令王張兩使注重最近發生之緊要四種要則計（一）焚燬民房千餘戶是否由劉軍圍攻督署時礙於戰線所爲（二）慘殺無辜人民極衆此種殘忍行爲有無羅軍在內以上詢諸成都各國領事可知（三）劉軍有無空額內容是否腐敗應裁（四）該軍複雜有無收容匪類以上各項其在川人民卽已衆口皆碑凡此種種均爲充分證據請即致電兩使妥爲詳查云

雲南議會造謠

川滇軍之衝突偶然之事也而滇軍於武成門一帶恣情殘殺我川人對於滇

人之旅居吾川者未嘗加報復也

雲南議會之來電乃謂旅川滇人千數百家擄殺殆盡婦女則輪姦而後殺且有以綿裹身浸油燒死者其誣我川人甚矣

而居川省之滇人未嘗被慘殺而誣我以慘殺未嘗被輪姦而誣我以輪姦豈以爲川人所慘殺與輪姦卽莫大之榮典乎

雲南議會諸君無故而造謠殆所謂仰天自唾適以自汗其面者耶

是非曲直

查辦使王采老之來電靄然仁者之言當此大亂未已之時所以化厲氣而慰川民者可謂至矣

電文中之一語曰寧是非曲直之忍較夫王公之來除明是非辨曲直外尙有何事吾人之所望於王公除明是非辨曲直外更有何事然而王君必如彼云云者蓋以既查則不患真象之不明言辨則中央有當負之責若川滇兩方獨

自爭是非不已自爭曲直不已不惟是非曲直愈淆亂不可判別再激事變尤大可憂故今日爲兩方計惟有靜默以俟兩使之調查中央之處置無謂曉曉殊無取耳

公署公函開竊戡迭奉中央命令飭向川滇兩軍停止爭鬪當經調處冀免再釀巨變糜爛地方牽動大局本日各紳商學界來署商請將兩軍開出城外駐紮俾免接觸并述近日難民情形驚恐萬狀實屬慘不忍聞而英法日領連日多方調處解說亦極希望此事早日解決保全全城戡爰於本日由電話請尊處派員來署面商僉以除將兩軍調開實無以解目前之危迫當即商定滇軍留警衛團仍住督署川軍留兩營仍住北較場本部其餘川滇軍開住城外城內治安暫由黔軍警廳保持已將此意電陳中央并定於本月二十四號午前九時照此實行除函羅督軍轉飭滇軍查照外相應抄錄原電函請貴軍長煩爲查照辦理等由准此并准紳商曾鑑等函同前由查此次川滇兩軍衝突經

省長戴及領事團并省議會紳商各界出而調和先行停戰靜候中央解決業經嚴東所部確實照辦旋奉大總統令特任省長兼代四川督軍并特任本軍長爲崇威將軍等因自應仰體明令速弭兵禍惟戰爭甫息民困未蘇深慮善後無方有負軍民期望是以遣派代表與省公署往返磋商希冀拔人民於水火後承兼代督軍戴允諾以黔軍及警察保衛全城我境內人民生命財產已可無虞本將軍捍衛地方藉可稍輕責咎惟是軍隊開拔出城深恐各該士兵人民不悉本將軍息事寧人之苦心轉生驚疑台亟掬誠布告仰諸色人等一體知悉須知此次調兵出城既與退却有別亦非置人民於不顧特以雙方軍隊同時一城若不稍事退讓萬一再有誤會衝突情事發生人民將重受痛苦匪惟非本將軍愛護桑梓之初心亦豈我官長士兵保障地方之素志况本將軍尙住省城尤非愬然而去我既深具苦心滇軍同係國軍諒不致置地方人民於不顧自佈告後倘再有奸人造謠生事乘機燒搶但在本將軍職責之內

誓當率我將士除暴安良以靖地方除分令外特此剴切佈告周知此佈

羅督軍二十一號佈告

爲布告事照得本督軍前奉中央電令以川省軍隊過多亟宜收束本督軍遵即會同王檢察使戴省長酌擬辦法滇軍暫留一師一旅黔軍暫留一混成旅又一團其溢額官兵一律裁去至川軍五師按照五年度預算核定軍費六百餘萬之數分別裁減均經電奉中央核准並令川軍裁留兵額應照五年預算數再加減少並緩設特種兵以紓財力等因除黔軍由戴省長酌裁滇軍已電令趙師長將所部成爲一旅外川軍五師擬裁爲三師兩旅其每連兵數均裁爲九十名並緩設特種兵科以期減輕軍費亦經擬定辦法電請中央核示迭奉命令飭即嚴厲進行惟因裁兵經費不敷未能同時舉辦先於二月二十七日分令第二師師長劉存厚第四師師長陳澤霖將所部隊伍分別裁遣統限於三月十號以前一律辦竣乃該師長等逾限日久抗不遵行陳澤霖業將恩

正各餉如數領清猶復多所要求迄未遵令辦理本督軍以該師隊伍冗雜紀律廢弛現復有意抗延軍隊終無收束之望爰於本月十五日將該師分駐省外軍隊一律資遣幸事前布置周妥秩序釐然不意第二師師長劉存厚久蓄異圖自生驚擾逼放步哨遮斷交通擅傳口令破壞軍紀迭經本督軍剴切開諭該師長仍陽奉陰違延至十八日午後六時本督軍派赴德陽解回之槍彈至北門外被該師截留又派赴灌縣點驗軍隊之兵二連回省經過通惠門復被該師開槍轟擊方用電話傳令該師長急速放行乃該師長竟派兵圍攻軍署彈如雨下全城震驚此種行爲實屬犯上作亂本督軍職權所在應卽痛予剿除惟念川省人民兵燹迭經何堪重罹塗炭乃一面嚴令滇軍謹守秩序不准離原位地點一面嚴令該師長停止轟擊以免糜爛地方該師長毫不聽從猛攻益急英法日領事力勸停攻該師長既經應允不意各領事甫到本署該師復開礮環攻各領事欲出不能困守署中自午達旦時因滇軍多出省清鄉

本不難調集全軍力圖戡定然城中居民稠密終不忍貽患地方仍令警衛團嚴守署中其駐東較場之步兵一團亦不准出營還擊乃該師長猛攻未下遂縱火沿燒本署周圍民房無算哭聲震天此種情形當爲人民所共覩不識該師長是何肺腑竟忍如此蹂躪父母之邦本署軍統馭無方養此驕將致令貽害吾民又因地勢所牽坐視人民之火熱水深而不能拯救椎心自問負疚難名現已電請大總統立予罷斥嚴重處罰以謝人民並請電令該師長立即停攻以紓兵禍本督軍引愆自責本不欲求諒於人民惟該師長肇亂之原因及經過實情不能不與人民以共曉合行佈告俾衆週知如此佈

亂後之回溯與預計

三吾民所受兩度之教訓

吾言將既猶有一事當揭以告於我七千萬之川人此問題蓋自經驗中得來確認爲吾川七千萬人所呈共喻而爲四川將來根本上之安寧計畫其事爲

何即吾人經兩度之教訓而深信客軍駐川絕對的有害而無利也吾川自洪楊亂後久無客軍二三年來一見蹂躪於陳宦再見蹂躪於羅佩金所遭固已酷烈矣昔者駱文忠之夷石李收功於士兵鄉勇常用客軍也方其未督蜀也蜀吏有調湘軍以赴援者湘軍入蜀而焚殺淫掠乃甚於賊是客軍之爲害吾人於五十年前徵之矣不幸而有帝制之役陳馮橫恣於成都曹張爲暴於渝瀘而川民乃飽受五十年中未有之苦痛禍猶未已又構今茲二百數十年來僅見之慘劇嗚呼此固吾民兩度所遭至親切之教訓不容或忘者也

客軍之駐異地未有不思歸者也欲歸不得未有不思亂者也習俗之不相宜言語之不相通感情之不相浹大亂未有不起者也得其人以施治豈必憑藉客軍而後可以有爲前清督撫遷調移轉未有挈軍旅以隨行獨至民國任官非挾軍不足以就職此以徵中央命令之失其權威也久矣今茲滇軍旣去秩序漸就恢復少數黔軍保衛地方與川軍同其勞苦吾人固不能以客軍視之

惟是自此以後中央處分川事苟仍令滇軍回防或再令北軍入川吾川七千萬人鑒於兩度所受之教訓必將合全力以呼籲求一線之生機而不能俛首帖耳以再受客軍三次之痛苦此則川人所必當共喻者耳

四最終之目的

最終之目的爲何川人經非常之痛苦必將籌所以自全之道養兵而不能保衛人民則國家何貴養此兵設官而不能綏靖地方則國家何必設此官秩序既紊亂人民既塗炭矣事後之希望凡得三端

一吾人鑒於前此兩度之痛苦此後中央無論任命何人督川吾人皆承認之無論何人若欲挾客軍以入川吾人皆反對之質言之四川決不容第三次客軍之蹂躪

二爲國家綱紀計爲地方秩序計應嚴懲禍川首要以謝川民

三川民亦中華民國一部分之人民亂亂不能得中央之預防亂後宜得中

央之撫卹

嗚呼今日尙得爲國矣乎今日尙得爲共和矣乎印度朝鮮之民不過奴隸牛馬尙有其生命財產之自由也吾川人則固較印度朝鮮之民瞠乎後矣悲夫

劫後罪言

會垣兵事實肇於四月十八日今也痛定思痛有說及十八日之慘禍者莫不色變曰數百年來無此浩劫其慘痛勝於辛亥十月十八日之變奚逮王倍雖然今年四月十八日之役不過一時有形之印象耳爲問十八日以前其重重黑幕於醞釀此惡果者有其人乎無其人乎民國開國以來四民荒嬉競言功利遜於前清乎抑盛於前清乎明乎此則今日所現之種種之慘象正如求仁得仁可以知其必無倖矣夫兵凶戰危雖三尺童子莫不知其爲不祥之事也然於兵事未發端以前更於兵事範圍之外預擬持盈保泰感召祥和之虛象求之各等社會一不可得者窮奢豪賭兇酒淫殺而已昔之不肖官吏

居高樓擁諸姬醉夢於室招搖於市見者莫不恥之比年以來乃竟釀爲風氣士也如此農工商賈亦罔不如此其所資其揮霍者功利之說是已冀行其說以快私計強有力者以權勢攫取財帛而爲喪行敗德倡之於是羣小效尤各呈絕技奴顏婢膝欺凌詭詐彼言擁戴此請取銷朝爲演說暮電總統一人行之而見功則舉國皆如飲狂藥矣當乙卯歲暮陳宦深居皇城之日帝制之禍已萌動京師而蜀中醉心功利之徒智取謀奪下知所屆本報嘗撰論箴之意謂人心妄僭即是禍基秩序之亂甚於兵革蓋彼時成都空氣已覺不堪其腐朽齷齪矣矧在倉海橫流之今日耶吾民試於四月十八日之浩劫即果求因能不爽然若失泣然而涕者乎

聚九州之鐵而鑄成大錯成事可以不說矣吾所不能釋然者流亡滿目積尸盈野日擊其禍者懲前愆後當如何猛省自責養成獨立精神冀他日專機契合以求適於兼善之義卽以世俗鬼神果報之說論之亦當撫心自問平日處

事是否可以質之鬼神不違天理欲求十八日之禍亂不再現於他日除矢志積善之外豈有他道足以銷弭罪惡然求如持以上諸說者千百人中殆難得一二焉其多數國民則無不同聲相應曰吾川將爲外人侵掠吞併此而不預籌抵制之策至於噉臍悔無及矣爲是言督出於愛川愛川即是愛國且螻蟻一命之微咸知自衛吾儕儼然人也吾川有人民七千萬因自愛而謀自衛豈能議其妄作獨是侵掠吞併之說卽指主客兩軍衝突乎即使他人圖我之證據實已充分昭著我之所謂抵制之策者以口齒欺以電報欺吾舍知口齒電報必爲第三利器也蓋尙客氣而不求事實此實吾國民之通病不獨川人嘆失亦有不專恃口齒電報爭勝者其禍害尤不堪言則庚子義和拳之對外是已吾亦可人也塊肉餘生不思振作其氣爲國人綢繆陰雨之一助而惟以不倫之語誣及同胞其與病狂何異嗚呼今何世耶吾思十八日以前種種吾思十八日以後種種吾更思庚子八月以前國民之心理吾并思乙卯五月七號

以後國民之動作雖欲不爲病狂其可得哉其可得哉

對於查辦使之希望

前者羅戴相忌中央有檢查使之命令者羅劉相攻中央又有查辦使之命令前者之檢查使油滑敷衍不稱厥職此度災禍即謂其爲種因之一亦不爲過嗚呼前事已矣今使節又將賁臨矣王公采臣前護川督當爭路事起尊重民意盡人而知張公佩嚴吾川人也平日守正不阿亦吾人所素聞重以桑梓關係當必有拯救鄉人之熱忱彼王氏芝祥固不可同年而語吾民對於王張二公既莫不有良好之希望記者亦川民之一也有首先希望者二一日化除省界只就事論事二日先言善後緩論是非請得詳陳其說

自省亂發生以來涕泣而談時事者莫不曰滇省如何川省又如何滇軍如何川軍又如何而自吾人觀只得謂羅軍與劉軍之相攻耳所謂滇也川也滇軍也川軍也皆一種含混名詞隨口而道耳初無省界存乎其間兩使遙臨若先

存一區分省界之心誰是誰非或者爲客問禍誤而不能剖白之時故必先化除省界然後可以剖白是非此次成都慘禍誰爲戎首姑且勿論只論無辜人民所受之痛苦在戰線上所誤傷者亦不必論殺人放火擄掠奸淫皆出乎正當防衛以外吾民何辜而竟受此奇冤是果誰之咎歟如使殺人放火擄掠奸淫等事出於劉氏所部雖同爲川人亦絕無所用其姑容如使不出於劉氏所部而出於羅氏所部堂堂國軍吾民出膏血以養之者而竟爲此盜賊所不敢常爲之事天理何存國法何在應請我大使秉公查辦聊伸吾民之冤憤所謂化除省界就事論事之希望此也

大使之入川也本受有剖白是非之命吾民受此奇冤引領而望大使之早臨亦莫不求是非公道有以共白于天下雖然吾民兵燹餘生有如驚弓之鳥本欲求是非立白一轉念焉恐謂羅軍是而劉軍非劉軍又有不安謂劉軍是而羅軍非羅軍又他變生兩軍相持或更演出第二次之慘劇當軍武人專橫紀

網不整之時此中隱憂亦正多耳嗚呼死者已矣生者倖存與其立爭已往之是非而恐生他故誠不如急謀後來之安寧而度此難關之較爲得也夫吾民生命之斷送至於數千之多財產之損失更不知其幾何乃至誰是誰非亦不敢急求剖白天下傷心之事寧有過于之者兩大使悲憫爲懷他日善後已定返京復命不患無主張公道之一日所謂先言善後緩論是非之希望者此也以上兩端不過辦理上先決問題及其手續耳夫吾川之攘亂久矣今欲言善後吾人更有種種希望扼要言之蓋有目前急求實行者三長治久安之事一

省議會之彈劾案

議員秦森甫提議彈劾羅前督違令肆虐橫燒枉殺慘無人道請建議中央查核嚴辦并任用川人以維川局案云四川慘禍前有陳宦既經兩院彈劾指陳罪惡今羅佩金之督川橫暴陰險較之陳宦爲尤甚人第知川省因裁兵問題釀此巨禍而不知羅佩金之行蹤詭秘常抱侵略主義而欲握全川之政權財

權兵權盡歸之滇省者亦已久矣請卽其前日處置川事確鑿言之方其任督軍兼省長時官吏多用滇人各縣知事無論矣一切重要位職如鎮守使及各局各廠之總辦等至今猶歷歷可稽况川南一帶或駐兵或派員已密密布置一切又昭然若揭此政權之欲歸入滇省者其一

財政廳長雖非滇人而任用不出其勢力所及一切政費軍費莫非隨其意旨所在而勉爲供億况紙幣一項中交及濬川各銀行價格任其低落而苦心經營一雲南護國軍銀行以獨握我全川財政其他之勒收現金且派員各縣另籌生洋尤其顯而易見者也此財權之欲歸入滇省者其二

至於兵權之掌握固屬督軍戰務而當日起義之護國軍川滇雖先後不同不得謂用心稍異何以滇軍來川多數徒手盡編爲國軍川軍多數久經訓練盡編爲民軍是滇軍爲永久性質而川軍皆在裁汰之列且又組織一軍官學校定額四百餘名滇人取二百餘名川人僅百餘名且將來畢業後任用川官滇

人必占多數川人必且向隅四川兵權全落滇人之手此其勢甚使而其計爲尤毒况近因裁兵事件擇其川中最有名望威信素著之人先行裁革漸次將川中精銳一概銷滅以實行其吞併政策至餉需之輕重厚薄猶其小焉者耳及戰事發生把持大局使議會不能通電此兵權欲歸入滇省者其三

有此三端而川首已全非川有終入雲南勢力範圍異日川省財賦之增加必且循前清協餉之例政局之變動必且在雲南籌畫之中而兵力之滅滅又盡爲雲南剝奪矣是以川軍奮激誓不欲生五師一心共同電請以常呼籲即國家不議裁兵識者已早知有今日况羅佩金聞裁兵令下遂乃獨出陰謀始以疑獄而發難於四師即使四師軍隊果如所言豈其全師一致皆宜裁汰此中枉屈不問可知而又以酷烈手段電請中央欲漸次取銷各賢能軍官使之盡歸雲南勢力之內此川軍之所以欲食其肉而寢其皮也於是川軍奮起合力戰爭羅佩金理曲氣餒敗機屢見遂乃肆意橫行殘暴凶惡至今川西各縣討

羅軍起人心可試驗就其開戰以來之行動切其大罪略有六焉警察則肆殺也保護治安全賴警察於兵事毫無妨礙倘非滇兵有意擾亂何以竟將省垣新東門一帶警兵盡行戕殺是其居心造逆已可顯見大罪一

報館則拘囚也報館實言論自由亦足徵求民意是非公道共見共聞初非於軍事稍有妨害何以逮捕笞杖拘管軍署如警華報及四川新聞報等均被逮捕各報館皆已停版潛逃大罪二

民房則橫燒也督軍署附近各街道民房稠密貧戶尤多值戰爭劇烈後於四月二十八日多數滇兵手提洋油沿街擱置同時縱火八處并起連亘焚燒烽烟障天哀號震地晝夜不熄慘不忍睹兼之槍砲交加禁人救火住屋居民不許逃出縱凶肆虐莫此爲甚幸各前街折斷天雨火熄至二十九日又連燒四處忽被劉軍長派兵猛力赴救且戰且撲未及全城被害嗣經省長各國領事及省議會議長紳耆等雙方調和待命中央始免大罪三民命則慘戮也戰線

之地子彈波及亦屬應得惟東較場駐紮滇軍新東門附近居民無辜被殺臚陳如下一幼婦經過以槍砲指之使來與言及婦至以繩繫置城牆上以刀刺其腹拋之牆下有一二老年身穿絲服指云汝肥斃命脫衣下驅往門外跪下以刀刺死有幼孩拋刀殺之謂之此孽種也其他之被搜尋枉死者大約二三百人屍橫道路血流街衢臭不可當至於被火燒死及槍砲擊死者共六千餘人傷者五千餘人死人如麻慘無人道大罪四

財物則搶掠也及其潰敗之日駐紮及經過之處凡少有餘財之銀無不被其劫掠卽中人之戶什物亦皆掃空至今猶可調查各商家不得已始沿街分派湊合四十萬給付始免大罪五

城內各街因拒戰斷絕交通各街口均有兵守護不准人民去來是以婦女不能逃避滇軍駐處婦女被其奸淫不少而尤慘莫如奸淫後且以亂刀剖殺大罪六

至其去時沿途騷擾但聞龍泉驛復燒民房其他尙在不可知之數夫以民國
刑律最崇人道今滇人以外省人視川省民幾如異類而川省人民遭此屠毒
冤氣難伸設非建議中央請求兩院大張公道以伸枉曲死者冤抑生者痛恨
前者已矣如後來何計惟協懇大總統任用川人以督川軍原湖南浙江雲南
先例永鑒前車冀沾後惠庶川禍永息川民共慶矣是否有當應請大會公決
提議人秦森甫贊成人董績緯黎光堃王壽培馬文勳戴正潛龔選廉韓澍滋
秦大猷劉元杰李樹熙宋炳勳李庚廖希曾陳宗彥汪金義周炳文魯本竺黃
輔翼汪金相蘇啓元王志仁袁容光劉培祿張梓梁周烈先辜增榮何伯雨邱
兆熊劉恒光秦運中楊應璣

省議會呈中央電

北京大總統國務院參眾兩院南京副總統各省督軍省長省議會各報館鑒
滇軍退出省城後刻正駐紮沙河鋪龍泉驛等處沿途奸淫擄掠并燒燬民房

慘殺老弱難民來會陳訴者積至數十百起之多省長已兼督篆而坐守雷池一籌莫展人民呼籲充耳弗聞查滇軍雖有退志而由東路遄返滇境計程千里有奇聽其毒燄蔓延沿途滋擾名爲國軍與明末流寇何異蜀難已深寧堪迭遭荼毒應懇大總統飛電來川嚴飭滇軍各將領率部速離川境并指定回滇路線責令經過川省地方嚴守秩序並飛飭戴兼督川軍劉軍長及各師長飭隊嚴密防範如該軍再有騷擾情事准川黔軍隊就地捕拿懲辦以免全境流毒其沿途受害之區飭戴兼督查明撫卹稍紓切膚之痛危迫待命伏冀慈察四川省議會支印

丁澤煦自滬來電

上海來電成都羅督軍劉軍長省議會並轉各報館各法團均鑒煦滬濱養病忽聞羅劉兩公失和驚耗傳來莫名悽悲茲中德絕交行將宣戰誠使共謀對外而茫茫前路當切杞憂乃我督軍我軍長偶然失和遽致操戈同室吾川凋

敝已達極點何今不幸而又重術浩劫也此照所以聞耗付泣伏枕哀鳴而不
自己用敢籲懇兩公捐棄兵爭痍瘵休息想兩公再造共和勛昭日月決不使
我七千萬之同胞再罹塗炭現中央有議處似宜靜候解決並懇當局諸賢暨
各法團諸公力勸兩方息爭維持治安川民幸甚國家幸甚丁澤煦叩個

張尊致同鄉國會議員書

獨立團團長張達三致北京兩院同鄉議員書云羅子卿蒲伯英熊繼周李敬
安陳漢船暨同鄉諸先生鑒啓者吾川本蠶叢古國民氣深醇天降鞠凶罹此
慘酷川滇脣齒也脣齒相殘可哀孰甚川滇又兄弟也兄弟交惡有難誰扶諸
公遠在京都當日吾川肇釁情形祇係耳聞未經目睹弟則身當其難曾被扣
留較爲明瞭請爲諸公言之前月十五號恰值星期羅督乘此時機卽於是日
將四師全師解散城內師部旅部團部盡派滇軍武裝圍繞軍官則扣留軍署
士兵則勒繳槍支不半日間而各部之軍裝服被用物儲藏與夫個人私有之

衣物器具紙幣銅元盡輦入皇城軍署矣維時弟部遠道清鄉滇軍鞭長莫及
僅將弟綿陽雜槍百餘枝提去至今快槍兵全部尙存即四師之碩果也夫川
滇本係鄰省彼此軍隊均由護國而來羅督待遇兩軍何竟厚薄懸殊若此此
即問諸羅督恐亦無詞以自解也兔死狐悲物傷其類於人何獨不然羅督於
四師軍隊不惜爲一網打盡之謀又何異自去爪牙自剪羽翼而囂囂然自以
爲善於保身耶羅督若恍然大悟應悔前日謀之不臧受人愚弄終夜徬徨不
能安寢矣軍隊且不必論可痛者省垣人民耳前月七號晝夜之戰城內東西
北各街居民哭聲震天流血赭地砲彈過處其轟斃之男婦肢體零斷充塞街
衢數日之後猶作伸縮之狀戰後調查滇軍燒我民房數千家殺我川民數千
人此非第一人私言凡警界紅十字會難民救濟會皆調查確鑿衆口一詞
者也某友人有駢語云哀鴻滿目城隅久斷炊煙歸燕無巢華屋僅餘殘礎據
弟考察可謂精切不移不獨此也省垣東門外人民被滇軍焚殺淫掠尤屬慘

無人理有劫其資財者有焚其廬舍者有姦其妻女者并有先姦而後殺之者
查其姦人處女更有放美人風箏之事用刀剗兩處女陰戶抽出小腸繫在一
處將兩女屍一擲腸拖丈餘名爲放美人風箏由東門而龍泉驛而簡陽而資
中沿途純係滇軍駐紮龍泉驛燒作白地簡陽地面并有掘墓暴屍屠人家族
等事滇軍久已編入國軍此種行爲豈國軍舉動耶嗟乎昆明劫灰毒流吾蜀
茫茫前路其禍安窮弟革命三次腦筋絞盡熱血全枯本擬披緇入山不復再
任軍事惟念部下健兒追隨日久設令全行解散有產業者固可歸田無產業
者何處覓食昨已呈明戴兼督請率所部仍遵羅前督指令開赴松藩從事屯
殖藉冰天雪窖之寒消彈雨槍林之熱屯田養士請看一障乘邊血戰餘生早
把此身還我謹抒愚抱不盡拳拳祇頌台安愚弟張尊鞠躬

議員鐘山等真電

成都去電北京大總統國務總理參衆院四川同鄉會均鑒客秋山晉謁崇階

曾列舉羅佩金不可督川之理由面瀆聰聽回川后復詳攷該前督之行動益徵實川民好惡之公民國本統一制國家其容以部落思想敷之政治方面羅督於吏治軍政財政上厲行地域主義直認雲南爲漢高之豐沛四川爲北美之新疆節經宗培同各議員暨各法團將事實彙陳計蒙均鑒此次復以部落思想對付裁兵問題致激成四月十八日之變劉存厚與該前督本爲三次革命之同志何至隙末凶終如是若謂競爭權利劉昔以護國故而可拋袁氏之封爵者詎至今日因一師長位置遽操同室之戈况據該前督密電所云曾謂其毫無膽略則兵戎相見出於川軍之公憤不問而知且一三兩師亦復命將西來誰生屬階於茲可見顧此中曲直查辦當俟諸王張兩使該前督不宜因敵視川軍之故仇視川民計自十九以還停戰之令已到乃焚燬不已繼以搶劫搶劫不已繼以屠戮省中人民家貲達百元者搜劫始盡出百以後經過牛市口大麵鋪龍泉驛石橋等處更於搶劫焚殺之外濟以姦淫錦城以九里三

分大半已成焦土枕骸遍野哭聲震天村落爲墟奚水盡赤號稱義軍而效多爾哀之屠嘉定號稱偉人而爲張獻忠之入城都豈惟忘川滇乃兄弟之邦直認川民非民國之籍舊列強盜但得財者斬况吏焚燒房屋污辱良家新律殺人者處死刑况乃塗灰生靈數難縷指中央爲息事寧人計變賊若友略法言請既榮該前督以將軍又編該滇軍爲國軍如現狀可維持政略極堪崇拜惟是指揮權爲公理引強盜作十城法紀蕩然其何以國往事已矣來軫方猶近又聞滇督唐繼堯派兵三團分道入川已一抵宜賓一抵敘永此直認四川爲近東東巴耳幹逼令川人爲英屬之愛爾蘭川民歲以上萬權稅擁護國家行且爲滇人奴隸是四川未無目作之孽中央亦當有側隱之心應懇俯川念難已深飭該前督迅速離川該滇軍既編爲國軍即請別指駐地以免主客相搏缺及生命戴省長既已兼代督軍賑恤災黎綏緝軍隊是其責任應懇飭令安速辦理毋或驚擾閭閻并勿以兵爭之喋血僵尸供兵爭之鈞心鬥角蜀介南

北關係全國安危責寄匹夫敬東讓論臨電涕泣不知所云鍾山劉宗漢楊續歐陽瑜黃輔翼胡文英劉天敘范介和劉恒光吳其煥何其義帥正邦等七十人叩真

杜步雲生時去電

杜步雲生前致北京川人及重慶順慶電云自羅迭請撤換川軍師長并以武力解散四師省內如臨大敵川滇兩軍各設步哨巧夜肇舉滇軍占領電局督軍省長外均須查扣郵件同時亦被檢查故此真象外間多不明瞭茲將真象略爲言之羅圍攻劉早有布置巧夜以步兵兩連改裝用手槍圍攻舊將軍署二師砲團部擊斃官兵十餘人一面圍攻文殊院機關槍營斃二師官兵各一同時皇城卽以大砲轟擊北西較場所幸二師亦有準備一面應戰一面卽取攻勢還砲射擊次日正午皇城前後危急萬狀羅屢向省長告急謂劉若再進攻惟有請求黔軍保護皇城戴卽力勸兩方停戰英法日領事均向兩方調

停皓夜羅以水槍注射石油於皇城附近民房噶言川軍放火皇城週圍一里內外均成焦土哥日拂曉戰鬪仍烈午後由省長及各界並英法日領事商定換防辦法將城內畫成川字形川滇兩軍移駐兩旁黔軍居中以隔斷兩軍免事衝突養日羅劉兩軍均允出城始着手漸次撤防是夜始無槍聲梗日川軍開駐新西門外滇軍開駐新舊東門外羅已出城現駐兵工廠城內僅東較場尙有滇軍一部北較場尙駐有川軍一部綜計兩軍之行動滇軍燒民房警察救火反爲擊斃滇軍區域內燒殺殆盡川軍區域內燒殺之事全無川人無辜被殺無數警察被殺者計二十餘人兩相比較孰暴孰仁有目共見乃反以種種違法暴虐之行嫁之於川軍其陰險卑劣極矣徒以交通機關爲羅所握對劉則吹毛索瘢對羅則隱惡揚善此其利害情感不同固無足怪獨川人身受痛苦而不敢言即言而反以祖川排外見疑此真可爲痛心飲泣者也今劉家已燬矣位已失矣冒萬死願全川其志不見白於天下而同事以隔絕之故坐

視其危苦不急援手以相慰藉反聽外人之言以交責有不令志士寒心後來誰爲川人出死力以爭公益乎况屬共同之意以爲此也劉始終尊重中央命令大處尙無不合內諫外張可也對外毫無團結其害豈可勝言耶此時去羅目的雖達滇軍滯而不去恐難仍未已也如何善後尙望有所主張聯霄叩感死有生氣

省議會對於川事之主張

十三號成都省議員等來渝致電北京云大總統國務院參衆兩院陸軍部交通部馮副總統鈞鑒川受滇軍毒荼禍水橫流自前月二十四號起至本月支日止迭將肇釁顛末及擾亂情形於敬洒各電內瀝陳計七八次不等昨參衆院四川議員黃雲鵬等冬電謂羅氏朦電院部淆亂是非致劉將軍免職又滇省違悖院令派兵三團略川情形危迫本會所發各電只敬日一電到京無任惶駭查滇爲川禍痛甚切膚滇軍出城以後沿途淫掠燒殺慘無人理兵兇道

遠流毒安窮已於支日痛述慘狀迫請中央解救在案茲接黃議員等來電始知迭電被遮支電計難速達應懇大總統飛電滇軍將領部勒各軍尅日出境指定出川路線經過地方嚴守軍紀并電滇督立將派出三團撤回一面飛電戴兼督及川軍各師嚴重防範并飭戴督飛飭各電局於本會電文不得任意阻遏救危局而抒民隱無任銘感

補誌川北公民電

當成都戰事將起時川北公民致北京電云大總統國務總理暨參眾兩院川省議員鑒羅督蒞任以來日違民望理軍治匪漫無計畫嗜烟宿妓悍不顧恤惟日搜巨款所提各稅約七八百萬而軍餉未發用途無聞中央明令裁兵而新招徒手滇軍來川者前後近萬近復籍裁兵之名行弱川強滇之計裁兵減餉惟在川軍滇軍餉項獨厚兵數暗增並罄兵工廠大批械彈悉給滇軍以致川軍全體抗議請命中央幸調羅入覲全蜀歡騰乃羅督要挾中央總求緩行

一面調遣軍隊勒逼財廳勢將作戰各師情急均謀抵抗川省近狀危急萬分竊川經三次革命糜散已極若再罹塗炭其何以堪伏懇大總統總理仍申前命俾羅去川以肅紀綱而弭禍亂公民等身家性命爭此頃刻北望號泣罔知所措川北公民代表游澤寰秦之良李雲蘇聶開基等二百三十五人同叩戰禍起後該公民等又去一電北京大總統國務總理陸軍部參謀本部鈞鑒四川參眾兩院議員鑒此次川滇軍衝突令去羅劉簡使查辦成都秩序可望回復然推往察來禍機未弭肌膚切痛噤默難安竊辛亥以來滇軍三次禍蜀雖藉政變實舍侵略憤彼貪殘遂積惡感羅前督不特不善補苴又變本加厲去年陰歷除夕滇軍譁變沿途搶劫已遺人口實此次與劉交關凡滇軍劃駐區域焚殺淫掠之慘暴於獻忠出城暨啟行後沿途淫殺抄擄一如成都民有何辜遭其淫屠如遇異種曾任長官其所行乃勝強盜故現在蜀民對滇均有不共戴天之勢滇軍對蜀尙何望有相容之心夫以主客積憤之軍有觸即發而

欲令其相安無事並以淫劫焚殺之人與被淫劫焚殺之人相處而欲令其兩好無猜雖有聖智恐難着手是厝火積薪必無幸理以兼易暴甯有窮期如非棄民之國應爲補牢之計特協懇我大總統總理將滇軍調回原省或移駐他處既已編爲國軍當然由中央調遣一紙命令可息禍胎懲前毖後非此不可否則彌縫一時則蜀亂未休而聽民乘危恐國無此政彈刃餘生罔識忌諱瀝血呼號萬千采納川北公民代表游澤寰盧廷棟李雲蘇奚箴秦之良聶開基林維韓等六百七十人公叩

趙寶賢責人恕己

滇軍第六師騎兵第六團長兼步兵二十二團團長趙寶賢致劉軍長書云積之先生有道蓉城聚處半載有餘不幸一日以兵戎相見心殊耿耿今者前事已成泡影矣是非曲直查辦到來自有定論非先生所得私亦非吾輩所能據惟不佞尙有不能已於言者近閱報章見先生致各處文電皆謂此次肇亂係

羅督軍派人先攻西北較場披閱之餘不禁嗤笑夫此次亂事固由先生身爲禍首派隊圍攻皇城此實爲旅居外人及全城父老子弟所共揚其見雖目前爲先生試問所刦之不敢言而心中亦實不能爲先生諱者也今乃誘過他人此爲解說先生口中雖振振有詞然請試問良心亦赧然不能承認大丈夫作事磊磊落落夫既敢於甘爲禍首犯上作亂則直以禍首自認猶不夫爲英雄之氣概乃時過境遷遽效兒女子輩謊謬語飾詞冀圖卸與是何前勇後怯真懦弱小人之所爲矣自欺良心猶不能安能欺全城父老子弟之良心乎縱省中人民目前曲爲之諱則請看半載以後公論何如此先生之可憐可笑者一也夫養兵原以保護人民捍衛國家僕雖不肖嘗聞此指滇軍在川半載與民間相處甚形融洽自四月十八日以前試問曾與民間有絲毫仇怨否此全城百姓所共信即先生亦不能妄加詆毀者也乃先生不以保護人民爲主旨惟以爭權利爲要圖擅敢倡亂糜爛閭閻小民何辜罹此荼毒且遍處搜捕滇人

擄掠家產此等行爲直盜賊流寇之不若（使我滇人亦持此仇視主義）（將旅滇之蜀人盡行殘殺搶據）先生亦將以爲何如耶不重公安惟洩私忿此先生之可憐可笑者二也又聞先生刻下噩夢未醒猶復招集四處土匪編爲討滇討羅軍名目離奇不可思議如張昇廷輩公然以此種名目施之公文矣夫羅督軍中央任命之長官也討羅卽所以叛中央滇民國之領土也討滇卽無異於背民國試問先生有何權力敢於犯上作亂如此聞貴部下近日對於先生亦有依胡蘆畫樣者上有好者下必有甚先生其將何以爲情耶謂之爲妄延胡行誰曰不宜此先生之可憐可笑者三也略舉三端先生之荒謬糊塗可見其餘皆零枝碎節不必備述僕亦知先生近日騎虎難下愧悔交集不過爲部下所迫無法擺脫其狼狽之狀僕亦爲先生憐憫一失足成千古恨先生今日始豁然矣目下爲先生計爲川省計宜速解兵北上請罪中央以懺悔前此之罪惡庶川省兵禍可弭）（秩序可復）吾輩觀過知仁庶於先生或有

恕辭焉否則非僕所敢知者臨穎倉卒不盡所懷除錄達外并寄登報章省中
通人不少諒能自有公評良藥苦口請一嘗之

川事處分之推測

川事處分之困難人民同謂然也渝中各界就商會會議主張數事其一日先
辦善後緩論是非此其特論可謂獨到特吾以爲既以善後爲急是非爲緩則
所謂善後問題者又當有討論之餘地善後二字與是非絕異是非者過去之
事舉世所同喻善後者未來之事今日所難測則謀善後之事較辨是非之事
爲重亦較辨是非之事爲難吾儕小民於痛深創鉅之餘而何幸獲聞善後二
字中央與查辦使亦將何以善其後乎

今吾翹善後二字以不全國請國人爲我策川事善後之具體辦法而得如左
之疑問種種

一滇軍駐川境乎抑出川境乎

二後此督川之人誰乎將求之川乎北洋派乎抑西南派乎

三客軍駐川是否爲必要之辦法乎後此督川者需客軍乎

右三問題就第一言吾民則絕對認爲必須出境若在政府眼中則尙懸爲一待決之疑問即使政府亦認滇軍出境爲必要然是否有此毅力辦到仍一疑問也就第二言吾民但求遂客軍之苦任命何人殊無成見若在政府爲川擇人北洋派勢有所不能西南派理有所不可求之川籍尤復無人則仍一疑問也就第三言吾民固絕對反對客軍之駐川政府眼中則祇問其勢之能否因勢以爲應付之法而不能爲川人作永久之保證則亦一未解之懸案耳此善後之所以難言也

善後二字解釋懸殊吾川民意思中之所謂善後辦法與中央之所謂善後辦法是否同一界域隱相符合不可知也渝商會之所謂善後度必爲吾民意思中長治久安之善後而非吾民意思外敷衍補苴之善後固已然記者不敏謹

以其個人的推測質之全國曰若吾民意想中長治久安之善後微特非二查辦使之力所能及且恐非今中央之力所能達到也何則吾所設疑問第一條絕對的滇軍出境之主張吾逆料中央之毅力與吾民之禱求必將不能一致耳

中央以府院問題而累及四川受無窮之害毒此川民所當知也羅爲督軍而其所部屬五師長合電攻之此其威信已墮在理當更動矣羅既不自安而請假總理亦既准假許其去位而府派必欲與院爲難總統單電囑其緩來遂以釀成今日之禍謂川事非係於府院之爭而釀成乎夫去一威信既墮之羅佩金以安四川而府派獨以私見留羅以昭蜀禍此何意也去一羅佩金中央猶無此毅力矧今日欲絕對的使滇軍完全退出川境不留一人此豈今日政府之力所能企及乎吾恐將來之所謂善後終不免敷衍補苴而不足矣策長治久安也若然則所謂善後者終不足以善其後耳

如上所言吾於將來查辦使至後中央所以處分川事之善後的具體辦法將有以窺測其彷彿也其辦法如何如左二端

一一時無督川相當之人則亦不別求人物即仍以戴兼督維持現狀

二滇軍編爲國軍由中央指定地點屯駐叙瀘一帶

所謂中央之善後辦法其他不可知此二端則以記者之所窺測認爲意中應有之事蓋今日川軍糾紛萬端而以中央之能力覘之能爲敷衍補苴之謀而不能爲長治久安之計此非吾人之輕視中央事勢所在理則然也夫中央果能奮然果決深知滇軍偪處川局必無寧日決然出令令滇軍仍返原駐地點而不能以一人一騎留四川於是客軍既去川政亦甯吾民所謂長治久安之良關於是乎得主客交攻之慘劇於是乎弭記者所推測敷衍補苴之善後辦法亦幸而言之不中此豈非七千萬人之至幸而不然者客軍既未出境危險隨時可發凡記者所推測敷衍補苴之善後辦法亦不幸而言中其幣害亦如

量以實現則所謂川局之善後辦法者毋乃非吾民意想中當然之辦法歟
在述二辦法記者之推測而已中央果否出此此時尙不能爲下必然之判斷
今吾人卽假定此二端爲中央既經發布之辦法吾川民之對此二者果具如
何細情就第一言趙爾巽李經羲督川不成事實西林入蜀亦徒想望爲維持
現狀計卽以戴兼省仍攝督篆川民無所用其非賴若就第二言則川民苟未
厭亂或恐生命財產戕殺損失之尙未足則已非然者川民苟能爲將來之長
治久安計必將合全力以自謀不能聽滇軍之一人一騎留於境內以貽將來
無窮之患害也

今試依吾所假定中央而果令滇軍以敘瀘爲屯駐地點其幣害則何如
害一敘瀘蜀南之門戶川江之上游蜀賴之以自固者也蜀而失敘瀘則藩籬
撤而腹心墮滇川軍之不相能固已爲天下所共見割敘瀘以畀滇軍則蜀之
爲蜀可以日日在兵戈之中而永無寧日其爲危險可以想見并渝爲吾蜀財

賦所出之區而皆與敘瀘接近割敘瀘以畀滇軍一日有事非渝非蜀有矣故滇軍之屯駐敘瀘實無異其屯駐非渝所以貽將來之患者爲非淺矣

害二敘瀘川境而隣於滇者也以滇軍屯敘瀘是無異割川境以畀滇四川全境將有一局部之地爲督軍省長發號施令之所不及而此一局部之地乃轉爲雲南督軍省長伸張權利發表命令之地川滇軍權轉以分割而相衝突後此紛糾將未有艾而滇軍駐在之地行政官吏亦將仰其鼻息莫敢抗違故中央苟指敘瀘以駐滇軍是無異剝奪四川督軍治軍之權與省長行政之權之一局部川滇軍政上之衝突將繼此永永之窮期也

害三敘瀘之距成都爲程不及十日成都爲川政所從出川局若長此穩固則已非然者川事苟稍有搖動彼敘瀘駐守之滇軍必將乘隙長驅以再圖川局之擾亂則今日之紛糾必將復現於來日矧川軍駐地與滇軍所駐之敘瀘地勢犬牙相錯以接近而相衝突則吾川將無寧歲若夫推省城焚殺淫掠之慘

以及敘述則川南赤子寧得謂非蜀人也耶夫以吾人之推測中央之所以處置川事者或如此而以吾人之推論滇軍駐境之患害也又如彼然則吾人將何以爲長治久安之計中央亦將何以爲防患未然之策悲夫悲夫記者蓋有最終之一語以告吾最親愛之川人曰絕對的滇軍出境之主張吾川人不可不合全力死爭以求得之也

旅京川議員來電

北京來電成都省議會并轉商會教育會各報館均鑒敬電悉羅氏肇亂攻擊川軍錦繡蓉垣然成焦土聞茲警耗無不心摧同人等府院呼籲迄無補救殊深慚疚衝突之罪首在滇軍昨謁府院力請將滇軍調駐邊遠以紓川禍并請撫卹被災人民政府已表同意允電省長分別辦理望內外一致敦促進行自羅氏阻電後以一面之詞迭電中央淆亂是非任意誣陷川變真象壅不上聞故有劉將軍免職之令權位雖不足計是非不可不明除電各師長主張公道

外並盼將肇釁顛末擾亂情形陳明中央以明曲直藉資考核又滇省續派兵三團分道略川中央嚴電阻止陽奉陰違進行不怠反抗命令國有常刑望調查詳情隨時電告以便協籌捍衛不勝翹企黃雲鵬廖希賢張瑾斐余紹琴饒應銘楊肇基郭成文王湘劉澤龍周擇黃汝鑑袁弼臣舒祖勳李汝翼龔煥宸叩冬

速了

川軍紛擾亟待解決乃旬日以來中央毫無措置豈以政局變更不暇及此耶牽一髮動全身川省如再糜爛非獨一隅蒙禍勢且波及全國而意氣相持又斷難以不了了之敢告執政諸人幸有以排難解紛勿徒遷延爲也

省議員與國會議員

十四號省議會接到李國定來函云省會同人公鑒外交問題愈逼愈緊政府又將行第三步加入戰團也二十五日開軍事會議張紹曾反對最烈海軍總

長謂海軍毫無準備何以言戰江西將軍李純亦反對之後由倪嗣冲提起鑄字贊成勉強通過政府行將提交國會討論投票表決此中國存亡問題省會當然有一種表示今俄總單獨議和將成事實土耳其已與美斷絕邦交土與中國接壤鐵路已通土爲德之同盟國中國加入戰團國際間成甚麼現象此最有研究之價值者也請上注意焉羅劉衝突省城糜爛旅京川人無不痛心疾首京中祇有羅戴來電劉電到京最後政府一切措施命令皆根據羅戴來電留京川人且疑且忿祈同人主張公道將羅劉衝突歷史迅速詳電中央使同鄉議員有所根據走向府院陳述另籌補救善法不勝翹盼之至崑此并請公安頃有某議員擬有復電文云北京參院李靜菴及川籍諸公鑒函悉宣戰事已於前日拍電反對川局危甚羅軍駐簡資敘瀘一帶不動且日增兵索款不休羣情忿惶同事且有袒庇者而電則共上十六次不識均到否戴持兩端居民多出省而各屬多糜除電請調回滇軍外復郵呈各報各案請協持云云

第一軍照會英領事

四川陸軍第一軍司令部照會英領事署云爲照會事此次省城兵燹承貴領事出爲調停敝部允即照辦曾經佈函聲謝川省軍民咸謂貴領事敦崇睦誼秉正維持不勝佩頌乃昨閱報載貴領事有三電到京與當日事實大相反背軍心民心同深惶駭環請敝軍長備文質詢如十九發第一電言四川軍隊昨晚七時攻打雲南軍隊等語查十八夜雲南軍隊分三路攻擊敝部以致激成衝突被攻各地皆在本軍防區有各處所受彈痕爲憑附近居民可質原電顛倒其詞關係非淺又謂督軍係被攻者與敝部通信亦無效果四川黨係由附近縣城調集援軍等語皆與事實不符二十日發第二電謂劉乘機兵圍內城且無故開始劇烈之侵攻并且燒去內城三百餘戶等語查十九貴領事到督署後滇軍卽自前門向三橋街出並攜帶大砲由西御街向少城方面猛攻川軍迫於自衛始行還擊敝軍長不欲逾越範圍且因各領事遂在署內故極力

阻止以是督署得以保存貴領事身居署內惟見川軍之還擊至於開始原因貴領事有何證據能下此決定之斷語且電後復云余等在次度夜爲劉所盡知者敵軍長粗明外交自從戎以來對於友國官商無不照約保護既明知各領事在署按之戰略已屬防礙圍攻電乘機二字不啻爲羅前督寫照加之敵軍尤覺不合情事至於焚燒房屋此次被焚居民多親見滇軍以煤油射注民房四出放火敵軍長住宅亦被焚燬當經敵部及各處拿獲放火之人取有供詞在案各災民紛紛呈訴亦並有案可查貴領事既自言在督署度夜自未親見縱火之人憑何證據乃確指係川軍所爲竟與數千萬災民所見所聞均各歧異殊屬不解第三電謂昨晚之攻擊完全爲敵部之過等語查此兩軍衝突原因至爲複雜孰孰通非綜合先後逐一調查難於判斷貴領事乃確指爲川軍之過尤不可解此案經作國政府派員詳查敵軍長方靜候查辦現時敵國政府與貴國政府睦誼方敦川省軍民對於貴領事亦未稍虧主誼現在

受災人民哀號滿路方冀貴領事憫念鄰交代將實情上達不意貴領事所去各電乃竟顛倒如斯案關罪名出入及川民存亡未敢緘默相應照貴會領事請煩查照將以上質問各情明白賜覆如係確有證據即請切實檢出俾敝部自知過誤倘係得之傳聞亦請確切聲明以昭公論除函交涉署外爲此照會須至照會者

耿金錫致議會函

難爲你存心寬大

滇軍第六師礮兵第六團團長耿金錫致省議會一函語多偏袒閱者自有公論茲將其原函錄下四川省議會公鑒頃閱羣報五月五號新聞欄內載四川省議會代民呼冤一則披覽之餘不勝詫異查此次事變係劉存厚於事前密派重兵夜設步哨截扣我軍槍枝拘留我軍步兵兩連並敢開礮轟擊圍攻督署七晝夜焚殺商民數千家罪大惡極情節顯然此在省婦孺所共聞見非可

稍容掩飾者也我軍心存寬大不忍痛加勦除貽害平民故甘居退讓以維地方卽此一端我軍對於川民亦已不薄乃貴會一再通電各省謂我軍出城後沿途姦淫擄掠並焚燬民房慘殺老弱等事是貴會有意污蔑我軍名譽以肆其助紂爲虐之野心而置川民生死之冤於不顧公等皆川民而代表川民者也劉逆犯上作亂殘害桑梓對於川民爲仇讎對於國家爲叛逆既不聲討其罪以雪川民之恨反迴護其惡以抑川民之冤徒口雌黃捏造黑白淆惑衆聽慫動人心似此違心背理之談非徒有負於川民亦居心挑起川滇釁矣公等不爲全川計獨不爲身家計耶我軍義起滇南憑三迤健兒冒天下之大險挽回二十二行省垂死之民國公等之嘵嘵饒舌本不足以玷吾污劉逆之區區叛黨更不足以當吾銳爰念川省無辜赤子自反正以來迭遭禍變元氣已傷不便伸張武力殃及池魚卽此次出城一則遵從中央命令一則顧惜民命公等宜如何代表川民感戴我軍厚德乃不出此任意狂吠顛倒是非以致各報

館亦飛短流長以激我軍衆怒逼我於勢不可遏之地是公等將連川民之禍以逞公等之私夫復何言夫復何言今茲忠告並非求諒於公等不過慨念川民將盡死於公等之手不得不大聲疾呼以盡人道之義肝膽之言惟公等自擇之專此泐達敬請社安云云

補誌杜步雲遺電

川中變起杜君步雲代表一三師來省呼號奔走備極苦心不圖見嫉於人竟遭暗殺良材中落痛悼同稱頃得杜君四月廿七日致北京某君暨重慶順慶電稿一紙亟登報端俾論杜君者藉資研究并附數語藉誌哀思其電文云自羅迭請撤換川軍師長并以武力解散四師省內如臨大敵川滇兩軍各設步哨巧夜肇事滇軍占領電局督軍省長外均須查扣郵件同時亦被檢查故此大真象外間多不明瞭茲將真象略爲言之羅圍攻劉早有布置巧夜以步兵兩連改裝用手槍圍攻奮將軍署二師砲團部擊斃官兵十餘人一面圍攻文

殊院機關槍營斃二師官兵各一同時皇城即以大砲轟擊北西較場所幸二師亦有準備一而應戰一面即取攻勢還礮射擊次日正午皇城前後危急萬狀羅屢向省長告急謂劉若再進攻惟有請求黔軍保護皇城戴即力勸兩方停戰英法日領事均向兩方調停皓夜羅以水槍注射石油於皇城附近民房喝言川軍放火皇城週圍一里內外均成焦土翌日拂曉戰鬪仍烈午後由省長及各界並英法日領事商定換防辦法將城內畫成川字形川滇兩軍移駐兩傍黔軍居中以隔斷兩軍免事衝突養日羅劉兩軍均允出城始着手漸次撤防是夜始無槍聲梗日川軍開駐新西門外滇軍開駐新舊東門外羅已出城現駐兵工廠城內僅東較場尙有滇軍一部北較場尙駐有川軍一部綜計兩軍之行動滇軍燒民房警察救火反爲擊斃滇軍區域內燒殺殆盡川軍區域內燒殺之事全無川人無辜被殺無數警察被殺者計二十餘人兩相比較孰暴孰仁有目共見乃反以種種違法暴虐之行嫁之於川軍其陰險卑劣極

矣徒以交通機關爲羅所握而口又以同口同口之故對劉則吹毛索瘢對羅則隱惡揚善此其利害情感不同固無足怪獨川人身受痛苦而不敢言即言而反以祖川排外見疑此真可爲痛心飲泣者也今劉家已燬矣位已失矣冒萬死顧全川其志不見白於天下而同事以隔絕之故坐視其危苦不急援手以相慰藉反聽外人之言以交責有不令志士寒心後來誰爲川人出死力以爭公益乎况屬共同之意以爲此也劉始終尊重中央命令大處尙無不合內諫外張可也對外毫無團結其害豈可勝言耶此時去羅目的雖達滇軍滯而不去恐難仍未已也如何善後尙望有所主張聯霄叩感

殷鎮守使之來電

四月九號川邊殷鎮守來電云戴省長劉軍長顧師長鑒因軍務結束以來不幸蔡公即遭殞殂以川事付託我輩川難如麻治彼失此果能各抒智慮捐除私見同舟共濟何難克臻法理淺識者流不務息事甯人輒欲揚湯止沸幸鵠

蚌之相爭快漁翁之得利竊所大惑當袁氏秉鈞崑以操縱政黨供其魚肉進步派亦曾助袁以壓迫國民派國民派倒而進步派亦隨之當是時民氣墮落國勢消沉其後國民進步合力以倒袁袁死而國基再造重見天日今黨爭又恢復原狀矣承璫素無黨籍亦不知黨派作何解竊意際此歐戰擴張巴爾幹問題已解東亞大陸問題其亡其亡繫予包桑凡有血氣之倫均當肝膽共照一致對外若徒自相煎但爲他人作嫁此其所大惑者一也段氏襲袁故態素來開誠布公崑與西南當局者事事爲難謀浙之後繼以閩川羅督軍賦性深厚臨事不苟我輩同心協助夫豈無濟今者羅督將去而江朝宗輩來彼等歡迎以媚之者是也抑知北軍南來飲馬大江能保彼等之有幸耶即使有幸川民何辜再堪糜爛此其所大惑者二也縮減軍力以輕川民之負擔桑梓所關義不容辭乃竟敢擁兵自衛捏電攻訐忍于壞義軍根據地墮司馬氏之狡謀此其大惑者三也承璫明知逆耳之言不足動聽唯不忍以千萬頭顱所博得

之共和基礎一朝而去之故敢略貢愚忱幸垂聽焉川邊鎮守使殷承瓏
叩青

川軍官聯名公電

川軍聯名致北京電云北京大總統國務總理陸軍總長參謀總長各省督軍
省長鈞鑒旅長等籍隸軍人義在服從中央用人豈敢過問然慘痛之極能不
呼天乃者羅督治川無狀已由川軍各師長迭電痛陳茲再將其罪證謹爲我
賢明大總統總理總長縷晰陳之戴戡長川羅懋分權種種反對顯抗國命其
罪一因反對省長嗾開公民大會並敢宣言將用武力對付以地方長官之爭
權輒公然煽動內亂其罪二蒞任以來吏治民隱毫不關心朋淫聚賭日事荒
嬉如成都文廟後街及府街爲彼淫窟計有三四又復嗜好最深廢弛煙禁以
致滇省大宗鴉片充斥各地干憲瀆紀莫茲爲甚其罪三川西巫匪吉哇前據
綿竹殺人越貨日數十起曲爲包庇縱匪殃民因之萑苻至今未靖距省愈近

劫案愈多其罪四蒞任數月勒提稅款踰七百萬對於中央一錢不解本省軍餉數月未發近因請假准覲復勒提濬川源銀行紙幣七十餘萬並迫財政廳索取生銀窮搜極掘用途無聞其罪五裁兵節費舉國一致辦理持平誰敢不遵竊查滇軍去年入川計只十七營戰事畢後所存者十二營羅督電告詐稱兩師隨即由滇招來徒手七千餘人迨奉嚴令飭編一師一旅因於駐省衛戍軍隊外警衛設團衛廠設營安插滇軍約近兩團仍達兩師人數弁髦命令明減暗增其罪六收束川軍改編四五兩師各爲一旅其餘三師每連減爲九十人并廢特科全部俾川軍根本破壞滇軍迭增川軍銳減強滇弱川奸計顯然其罪七到川數月兵工廠出槍五千餘枝彈三百餘萬顆全給滇軍不准川請反客爲主公道何存其罪八劉師長起義川中功同蔡戴近因裁兵主張公道犯彼逆鱗遽加撤換且對所部竟行攻擊昨夜迄今槍礮不歇省城精華不惜糜爛其罪九似此姦回險毒誤國禍川軍民共憤用特協懇迅予決解以弭川

軍情危勢迫急痛陳詞無任屏營待命之至川軍旅長劉湘王禔舒榮衡陳洪
範劉成勳龍光陳經但懋辛團長陳能芳王麗中王炳章聶文光鄧錫侯廖謙
萬成黃澤薄田頌堯賴心輝袁昌峻曹文龍許澍張鵬舞郝焘李進成余昂向
傳義呂超喻培棣王維綱獨立營長文道心楊天信陳光仁陳國棟龔襄湯化
培唐義承韓祖武吳震卬皓

川軍官致中央電

北京大總統南京副總統國務院段總理參謀本部王總長鈞鑒頃據成都混
成旅長劉成勳等刪電稱羅督因裁兵事宜滕電中央致以強力去劉師長存
厚及陳師長澤沛并勒令四師全部解散提款調兵情勢更迫聞之不勝駭異
竊以川局糾紛皆以羅督署任以來動挾偏私所致其已往事實均經王中將
隆中王上將芝祥目擊先後到京復命呈報府院其是非曲直想早爲中央所
洞鑒已無容湘等之贅陳至此裁兵辦法主張復極不公允當時曾由各師

長聯名揭告奉電示靜候澈查旋准羅督請假入京伏見中央於川局已久灼照隱微不聽羅督私意處置湘等久因中央有靜候澈查之命以爲必有最公允之處置解決川事乃聞中央又因滇軍將領及羅督朦電復准羅督暫緩來京王成勳等電復稱中央以羅劉不能相容擬去劉以安川局竊維川之安否不在劉之去留誠以羅督在川種種偏私行爲川省軍民共憤況此時機不於根本上籌萬全之策而反調劉入京恐愈激動人心一旦決裂不堪設想湘等非敢顯違命令袒護劉陳劉貪戀位置倘中央能有公平之處置使川局從此大定湘等卽解甲釋戈聯翩歸田亦所深願否則人心騷動截止無方川局前途非湘等所敢逆料也臨電悚惶不勝待命之至旅長劉湘王禔龍光陳經廬師諦但懋辛參謀長楊廷溥唐廷牧周世英傅常余際唐團長陳能方王麗中王秉章聶文光許澍張鵬舞郝焘李進成余昂張思聰張尊向傅義呂超喻培義王維綱獨立營長文道心韓祖武吳震叩篠

雲南省議會公電


雲南來電北京大總統參衆兩院國務院南京副總統盛京吉林齊齊哈爾天津開封濟南西安蘭州迪化城都桂陽武昌長沙南昌安慶蘇州漢口福州廣東南甯各省督軍省長省議會鈞鑒劉存厚叛攻川督當於漾日電請查辦殊中央竟授劉存厚崇威將軍羅督軍超威將軍戴戡督川曲直不分賞罰不明致川滇軍羣情奮激夫羅督以實行中央裁兵計畫致劉叛攻卽應撤查而劉稱兵犯上侮滅中央弁髦法令恣意搗亂妨害國家罪惡貫盈令人髮指乃竟與羅督同授將軍顛倒黑白自爲厲階軍紀蕩然將何爲國應請大總統收回成命仍令雙方停戰聽候澈底查辦以彰國法而肅軍紀倘再姑息禍不堪言滇川毗連燎原是懼用敢再作讀陳臨電無任迫切待命之至滇省議會敬印

辨冤

羅前督佩金近印辨冤書數十萬册余竊以爲可以不必

四月十八日之變由解散四師軍隊釀成變作後惟人民最苦在川黔軍區域內者幸獲平安然亦不幸中之幸也

吾儕小民望一查辦使而不可得冤何從辨羅前督之辦冤書若將皇城前後之火災武成門上之慘殺一一寫出生者死者感激無涯矣



善後救濟

籌借急款之公啓

財警兩廳長西川道尹會銜公啓云敬啓者此次省城兵禍實爲明季清初以來未有之慘罹受害者既委身家於鋒鏑幸免者亦莫不日夕惴惴馨香頂祝冀早得息事寧人之一日猶幸浹旬之間經省長督率黔軍盡力保持又得著望紳耆諸先生奔走呼號晝夜調停於其間大總統復一再電飭息兵遣使查辦而兩軍亦先後撥隊出城駐紮此實我閩城人民出死入生之一線轉機也惟是各軍需餉久殷居者倉積全空行者裹糧皆絕川省財政自辛亥後疲茶不支已非一日客夏擾攘元氣尤傷債積如山庫空若洗凡我紳商士庶諒早共見共悉則欲紓目前之急難勢不得不出於募債之一途爰集議由財廳出具金庫證券註明借數利率及還款期限編號鈐印就省城區域募足六十萬元爲止至交款領券暨異日憑券收款悉由商務總會會同成都中國銀行經手

以杜歧誤年來杼柚之空久矣世族寓公家計日下商困於途工輟於室心長力絀不問可知然處常而爲日用飲食計則財自重處變而爲生命骨肉計則財似輕際茲危急存亡之秋萬望罄其室之藏竭其力所至相與扶危濟困化險爲夷以得例失奚啻倍蓰又况操券可償還珠有日以視捐賜更有間耶○等丁茲時艱愧無識狀但使公家財力稍可支持何忍於水深火熱之餘從事腴削奈實備處此無可如何所冀紳商士庶權寄金錢於外府共紓痛苦於剝膚是則臨穎徬徨不禁涕泣以道者爾黃大暹雷颺周恭壽同啓

附金庫證券簡章

- 一 欸額定爲六十萬元無論銀元或中濬兌券均可
- 一 利率按月七釐
- 一 償限分爲三期以民國六年八月一號爲第一期十月一號爲第二期十二月一號爲第三期

一此項證券用記名式

一此項證券准其買賣並准交納各項保證金

一持此項證券到期如不願領回准其交納各項稅款

一此項證券收款付息由成都商務總會會同成都中國銀行經理

籌借急款之公函

四川財政廳致成都總商會函云逕啟者此次省垣兵禍最爲慘烈幸賴省長與諸紳耆盡力調停始得兩軍撥隊出禁城內秩序漸次回復惟是各軍待餉孔急爲數又屬至鉅值此庫空如洗無可挪撥若不趕急設法籌措誠恐遷延滋患昨由本廳長會同巡警廳長西川道尹及貴會協商擬定借款辦法猥荷鼎力贊成極深欽佩第念踴躍輸貸實賴殷戶商民而提倡勸辦尤盼貴會力爲主持俾救眉急除借款證券趕緊製備併擬就借款簡章及會銜公啓業已刊刷另送外合特函達貴會請煩查照公啓及簡章內載辦法迅將借款事宜

代爲勸辦一切手續并希與成都中行及本廳現派委員協商辦理總期早集鉅數撥付各軍以安時局至深紉感再此項借款現經本廳布告至少須以五元爲率俾免涉於苛細知合併函

兵禍中之省商會

採米接濟 自省城兵禍發生總協理於槍林彈雨中連日奔走調停見各城關閉城中乏食各街居民恐惶萬狀乃要求省長發給採米護照一面囑會董冒險出東南兩門採運食米入城如華陽縣紅十字分會救出避難居民與法領事府中之避難者均各數百人購食正艱均函請商會撥米接濟各照函撥給避難者幸免飢殍此皆四月十九號後事也

設會賑救 總協理見被難災民紛聚各街情堪憫惻立即集合本會職員於四月二十號成立臨時救濟會發冊募捐散放急賑如外東慈善與人同與冬青樹街之積福會力有未逮者無不補助之俾實惠均沾其領首募捐各員均

甚得力一面敦請黔軍警察會同本會職員親赴災區引導難民出險妥爲安插一面調查傷斃無主屍身立刻棺殮標牌拾出掩埋

製表調查 此次戰禍砲傷火斃故殺遭掠者不可勝計商會一面派人調查并製發簡明表以便被難之家照表填列其表中列有左右鄰更爲切實

代辦借款 兩軍皆退以後政府庫空如洗爲急支計不能不出於借款之一途商會亦知兵燹之餘瘡痍滿目人民咸處水深火熱亟待恩膏以甦民困何忍又重加以借款之義務然時危勢迫待餉孔殷不能不仰望城內之世族富公富商巨賈集腋成裘度此危厄但使於事有濟各職員均不以受怨受謗而擱置也

紅十字會之善舉

留養難民 戰事猝興瘡痍滿目紅十字四川省分會醫隊出發引渡難民四百餘人分別安置華陽縣文廟江濱廟南城小學校梓潼宮該會辦事處附設

臨時留養院各街紳商捐資施送麵餅粥飯絡繹不絕被難人民咸慶得所該會辦事處地點無多只留養婦孺計百餘人每日供給兩餐現已陸續出院
醫療傷病 臨時醫院設南門文昌宮該會辦事處內設經理醫務員庶務員住院療治者二十餘人每日來院治療者四五十人醫務員譚協五陳筠如汪黎齋陳炳輝該會救護班畢業員陳詩舫黃鑄顏林且之一律擔任醫務每日均八鐘到院傍晚始各散值好行其德真難得而可貴也

掩埋屍骸 掩埋隊員劉孟丹徐梓宣諸君自兩軍停戰後即率領夫役前赴戰區裝殮七十餘人并會同該處街正雇夫掩埋中多腐朽不堪者

善士贊助 陳岳安君目覩省分會之救護情形連日代爲勸募并未受該會分毫之報酬始終不懈又有李茂亭君慨捐中行券一百元由何協修君代交他如秦季涵陳月溪張仲篋顏雍耆諸君均各代爲勸募熱心贊助云

催填災民調查表

省會警察廳訓令各區署所迅將各管內災民詳細調查填表具報各情曾誌本報茲復由該廳令填報令云照得因此次戰事被燒燬民房燒斃丁口被戕人民及被劫各戶究有若干前曾由廳擬就表式各紙分發各區署所飭令詳細查明填報在案已經數日填報者雖有數處而未經填報者甚多現在立等彙造成冊合行令催爲此令仰各區署所限於文到兩日內遵照前頒表式逐項查明填送來廳以憑彙辦勿再遲延干咎云云

辦理災民處報告

省議會特委辦理災民處報告云查此種請願至本日止共收到三百三十二件其中所具情節大致不外被軍隊焚燬搶劫殺傷間有淫掠者或請願維持或請願伸雪本處審查此種情形慘目傷心實難言狀擬由本會議決俟收齊後彙案咨請省長查明分別賑恤安置其淫掠者并轉咨督軍嚴爲究辦以慰災黎而紓冤抑是否有當請大會公決省議會特委辦理災民處報告五月十

號

籌賑局實行散賑

頃聞籌賑局現已擬定於本月十二三兩日實行發賑其散放賑款辦法共分數等輪亡者每口二十元受傷者每口八元房屋被燬者每口四元房屋未焚扯壞者每大口二元小口一元（此項賑款係中券銀洋一樣一半）聞此項賑款共約需二萬餘元之多昨二拾六號曾督辦已派人到各災區散放各災民領賑收據以便後日執據前往領取云

又據別一函云籌賑總局昨派唐子禎劉小泉在皇城邊一帶散發賑票男婦老幼聚集如蟻圍繞爭先幾如餓虎攫食一時秩序大亂幸二君前曾放賑瀘納辦理有方挨戶照給現已畢務矣

渝紅會籌借賑款

成都戴省長兼督軍暨紅十字分會鑒頃聞省垣軍隊衝突地方人民遭此慘

酷曷勝痛悼本會以博愛恤兵爲天職定期約集軍政紳商各界熱心慈善者在渝總商會籌議賑撫災區傷亡疾苦先行借墊銀壹萬二千元交由聚興誠天順祥德生裕等商號匯省俟後如籌有多款再行續匯並委托聚興誠天順祥德生裕三號執事暨會內職員江岳生魏蘭皋並梅黍兩三君會同辦理其事就近商承省長分別撫恤總以被災輕重人口多寡爲等差酌量散給務期實惠及人勿任災民流離失所卽請省長轉知聚興誠等商號執事暨江梅魏三君查照辦理並將災情迅復至感至要重慶紅十字分會魏國平胡國樑卍沁印

救濟團索查災表

日昨（二十二號）中國紅十字會新津分會致成華城會附設災民調查所公函云遷啓者昊天不弔變起蕭牆十日以來生靈塗炭損失財產何可勝計哀鴻遍地待哺嗷嗷觸目傷心浩歎曷極賑撫一項庸能稍已本會抱人道主

義爲世界上最博最碩之有名慈善法國此次進駐省城襄辦賑撫諸事非敢越境干譽實欲實惠同沾現雖着手調查災民而一人之聞見有限深虞辦理未周轉負我待救同胞之屬望久欽貴所痾瘵在抱善與人同對於災戶幾經徵求自無冒濫遺漏等弊本擬派員踵鈔惟敵團辦事人數極少難於分佈務懇將貴所災民調查表照鈔一分擲下以便籌備壹切曷勝盼禱之至此致

陶杓君變產賑災

雙流縣屬彭家場鄉紳陶杓君自聞羅劉巷戰每日痛哭流涕廢寢忘餐且嘆曰我日有兩餐能免饑餒足矣遂將存儲倉谷三百餘擔召集各佃戶代分其勞概行售賣又將彭家場自置鋪房數間倩中變賣一俟手續完善卽行赴省賑災復邀集同志募捐廣爲勸導

清地址以杜訟端

警廳令云爲通令遵辦事查此次各區民房因兵事焚燬不少若不亟令被災

之家清還故址以杜侵佔將來涉訟滋累本廳實尸其咎甚非思患預防痼瘵民瘼之意也合亟通令爲此令仰各區署所即便遵照轉諭被災各戶迅將自有被燬房屋地址限一星期內按界清出各樹標記邀同區街正等覆勘明確并由各分所登記填表報署彙廳備案以免糾葛而杜訟端其有修復者應由業主先行報區勘明果無侵佔官街妨礙交通情事始允興工不得自由建造是爲至要云云

趕辦急賑之簡章

四川西川道道尹公署四月二十九號布告云爲曉諭事案奉省長訓令開照得滇川兩軍連日在城衝突子彈橫飛火災蔓延西南居民受害最深現在射擊停止亟應速辦城內急賑以濟難民合行令委該道尹遵照迅即分區遴委委員趕緊辦理一面擬具簡章公布遵照如有應需各區署警員襄助之處即隨時商同省會警察廳妥爲辦理務使實惠及民勿稍遺漏爲要所用賑款并

准作正報銷切速勿延此令等因奉此本道尹於奉令後立即會同各紳耆並省會警察廳商定辦法擬具簡章着手賑濟惟省垣地方遼闊此次被災人民復衆調查恐難確盡除將已經收集災民覓地安插賑濟外合亟諭知凡屬此次被災人民實係貧窮未經安插者可隨赴籌賑總局紅十字會商務總會臨時救濟會一切慈善團體暨本道公署成華兩縣公署聲明以便一律照章賑濟茲將簡章附列於後俾衆週知此諭

籌辦省城被災民急賑簡章

- 一 此次急賑由道尹函請省城各紳耆會同商酌辦理
- 一 購買製備散放等事均由道尹會商各紳耆酌請本城公正紳商分頭承辦
- 一 受賑災民專以實係貧窮而被此次兵火之損害者爲限
- 一 賑品所需米麵食物無論何種總以就地臨時能購辦者斟酌辦理
- 一 受賑災民每人每日食品以酌量能充飢爲限

一安插被難災民所在酌設大瓦缸貯茶水以資飲料

一散賑之際卽由承散之人將受賑者姓名丁口及素常執業被災輕重詳細調查明晰註冊以便酌給資斧俾得藉以復業

一此項急賑以被難災民有多數復業爲止期

一除現時應賑被難災民外如有續到被難災民查明後一律安插照章賑濟

一此項經費由道尹先行具領若干或籌賑總局酌撥若干不足續請事竣後造冊報請省長核銷

一款項除道尹發官款暨籌賑局所籌賑款外如有各善士捐款另立收賬事竣登報報銷

一此簡章自呈省長核閱允定後發生效力至急賑事竣日取銷

查辦使行轅紀聞

查辦使有通電致各省爲成都災民募捐收捐處指定重慶總商會現并託商

會代借二萬元匯省前意在官賑項下撥還恐有不妥已改定由各省捐款項下撥還

自治研究會近事

成立醫局 成華地方自治研究會以此次兵燹之後不免疾病發生該會董事部衛生股各股員特爲便利貧民計議定由該會籌款成立醫藥局聞刻間業經組織就序并已指定陝西街節孝祠爲局所故不日將開幕云

報告災民 該會職員部議決集資賑濟此次受災災民且由該會調查員負調查災民之責已誌各報刻聞該調查員連日分頭調查業經調查確實者已於昨日彙冊送該會核查

賑濟辦法 該會董事部慈善股各股員已將賑濟災民辦法籌備完畢送交職員部討論探其所擬辦法係（一）限於死亡者（二）限於受傷及房屋被焚者（三）被搶劫者於此三者中復詳細分列如視死亡之多寡受傷及被劫之

輕重等類分別賑濟

製發郵券 該會職員部於日前擬定對於已經調查確實受災之災民由各調查員經手分別發給郵券以便訂期受賑刻聞該會已將此項郵券製備完善已開始發給

救難紀事

中國紅十字會華陽分會救難紀事序云二十世紀以後兵禍激烈矣歐亞風雲戰爭不息神州莽莽隱有陸沉之憂而兵禍之烈尤爲莫甚於吾蜀民國至今六年耳蜀中凡革命者三省城被大難者亦三蜀民何辜獨罹茲慘禍也迺者川滇兩軍交鬪於成都凡七晝夜未已兵士死傷相等也居民死者傷者火災者被難逃竄者殆不知凡幾時蕭君劍秋爲中國紅十字會華陽分會理事長變起亟偕本會會員職員率同救護掩埋各隊出入煙火鋒鏑中收尸救火引護受傷救濟逃難之民不遺餘力計掩埋尸首五百餘人引護受傷之民二

十餘人救濟逃難之民數千餘人又撲滅烈焰者數而攝影以紀其慘狀焉夫紅十字會在歐西各國素爲海陸軍人及國人之所尊重華陽之有紅十字會實權輿於民國之五年尙在幼穉世代蕭君與其會員職員等獨能於戰地收尸救火引護受傷救濟逃難之民大達其施仁濟衆博愛恤兵之本旨起軍士國人之尊崇信仰其功詎淺鮮哉苟非然者則死者無與殮傷者無與醫火焚者無與爲救被難逃竄者無與爲引護施濟其爲禍不愈慘乎吾是以敬愛華陽紅十字會之能施仁濟衆博愛恤兵也吾且慕乎蕭君與其會員職員等之能涉險以成仁奮勇以爲善也吾尤不忍乎死者傷者火焚者被難逃竄者之罹茲慘禍也於其所攝影作爲慟詞九章以紀其事蓋欲使天下后世知吾蜀兵禍之慘酷而欽仰蕭君及其會員職員等之功與紅十字會之仁愛焉遂爲序岷江南泉居士楊鳳徽識

公民代表胡駿等電

大總統國務院各部參衆兩院民友會鈞鑒羅佩金自督川以來恃武殘民恣睢暴厲軍心不服民忿尤深前次反抗中央任命嗾使黨羽力拒戴戡又以一師之滇軍冒兩師之薪餉川軍則搭發紙幣滇軍則籌給生銀種種不法均爲王檢查使芝祥所深悉諒達鈞聽近日四川新聞及警華報各編輯無辜被逮棍責數千刪日突派滇兵迫脅四師駐省軍隊令其繳械解散不給欠餉並收沒自備之衣物以致該師省外各軍聞風憤怒實行戰鬥附省騷然且借裁兵爲名剗鋤川軍一面召募滇中徒手張其爪牙直欲擴西陲抗違政府請假既准復嗾使部下抗電阻行數日以來更欲以武力撤換劉軍長存厚沿街設哨僻地屯兵軍隊縱橫互相戒備交通阻絕人民驚惶危在旦夕竊思中央命令僅在裁兵彼乃肆其野心將護國首義之川軍悉行遣散劉軍長率師多年功勳卓著川中軍民倚若柱石中央亦當視若長城劉軍長一人之去留卽川省治亂安危所係攀轡叩馬萬衆一心迫於桑梓之危務懇力予主持迅賜解決

以出川民於水火不勝惶恐待命之至公民代表胡駿等及四川七千萬人同叩

法領事救災卹鄰

頃聞鐵足巷友人云現刻大紅土地廟街鐵足巷中順城街三街街衆以法國駐四川領事白蘭兩氏於此次省中突起兵禍燒毀民房槍斃街民該領事不忍生民塗炭於四月十九號夜僱各街勞動家數十名每人賞錢千文親自督率署內役丁隨從職員人等分到火場救火時滇軍射擊槍彈如雨兩領事一面由電話嚴詞質問一面因救火僱工等不敢上前該領事說以如滇軍亂擊伊負完全之責人衆尾隨前去施救并命附近各街人民到署避難約數百人直至停戰始許各歸一般人民深感其德特在願綉鋪定繡白緞料掛匾一道上綉救災卹鄰四字下書順城街鐵足巷大紅土地廟街三街街民敬贈日內卽將綉成贈送法領署以誌不忘云

紅十字會之近訊

劉軍長調查災民 第一軍致華陽紅十字分會救濟團函云敬啓者此次省城變生意外人民慘遭滇軍荼毒敵軍長限於區域救護未週每一念及深爲哀痛惟幸貴會賑生掩死感謝之忱莫可言喻現在秩序漸定凡受害人民亟應設法賑濟略慰鄙衷第不識燒燬民房燒斃丁口及被戕殺者究有若干勢非查確無從着手茲特函達貴會請煩查照分別調查明確立予賜覆勿任翹盼之至云云

第一軍設籌賑處

第一軍賑卹籌辦處致各紅十字會函云逕啓者竊查此次戰事省垣內外被難災民流離滿道同人等目擊心傷思圖賑救爰於本部組織賑卹處以隨諸先生之後惟災民遍野未悉調查敝處只就呈訴者條列擬辦其遺漏者不知凡幾殊不足以昭公允而普實惠素諗貴會人道爲懷調查詳悉敢請將所查

災民名冊賜擲一份以憑按冊賑助實紉德誼云云

女工校募捐拯災

海會寺相國祠女子工業學校教員丁蘭君韓伯良毛敏修諸女士發起女界賑濟災民會以補政府及各慈善團之不逮茲錄其募捐啓如下敬啟者災害因小人而至豈盡天殃慈悲以大士爲宗原推女界此次省垣川滇失和兩軍交閔滇軍縱火焚燒幾日任意肆殺數千姦淫擄掠者尤不可勝計夙稱繁華之境今成瓦礫之場目擊其情良可悲已茲際哀鴻滿目災隅久斷炊煙歸燕無巢華屋僅餘焦土錦城絲管捲入南雲洱海波瀾橫流西蜀觀此流離之象誰無惻隱之心惟冀大家閨秀濟世名姝苦海渡以慈航立地現蓮花世界枯葢綴以甘露厥功是楊柳枝頭集腋原可成裘善因斷無惡果省個人傅粉塗脂之費綽綽有餘募萬姓青蚨白銀而成多多益善他日災黎獲福咸欽裙屐高風枯朽逢春定向妝臺下拜謹啓發起人丁蘭君莊瓊如曹水如魏雪恨張

清和楊錦裳羅夢媯王冰祥李夢蘭毛敏修蔣志操張自新崔覺民韓伯良吳
本周謝人傑鄧伯堅李瓊穆淑安

議撥路款賑川災

重慶總商會致成都總商會函云敬啓者此次成都禍起倉卒生靈塗炭慘不
忍聞幸賴各界諸公力予維持停止戰爭下風逃聽感激涕零惟善後賑撫非
籌鉅款無裨災黎除由渝中紳商學各界竭力籌募外僉議酌撥路款以資賑
恤頃已由電專達但恐線路不通合再抄錄電文肅函飛請貴會抄送電列各
機關力請當道迅予照辦無任感禱敬請公安

附抄電文一紙云成都分送戴省長籌賑局曾督辦總商會鐵路公司暨各界
諸公均鑒蓉遭兵燹慘不忍聞此間已由紅會借墊萬二千元先行匯省暫維
現狀但杯水車薪殊難有濟頃集各界會議前年旱災曾經前巡按使呈請中
央准撥路款五十萬元在案嗣因中阻迄未實行此次災情重大吾民無辜受

累衆議援照前案酌撥二三十萬元量災賑撫以川人之財產紓川人之急難諸公目擊情形諒必樂爲贊成除渝城各界竭力募捐接濟外特懇省長轉飭鐵路總公司速卽指撥的款以恤難民無任感禱重慶紳商學界劉道榮梅樹南胡啓虞申家樹魏國平趙城璧左秉鈞汪德薰溫仁椿潘慎溫嗣康胡國樑周家楨等叩暨

關於賑災之訓令

大總統令此次川滇兩軍在四川省城互鬪以致省城及附近一帶地方人民傷斃街市延燒疊據該省官紳聯電告災並據查辦使王人文張習電陳沿途接見紳耆陳述被難情形披閱之下實深憫惻着財政部迅卽籌撥銀十萬元并由本大總統特捐銀二萬元發交該省省長督率該管地方官商會同公正紳耆將被災戶口切實查明迅予分別賑撫其餘善後應辦各事宜并着安速籌辦具報此令

善後案咨覆議會

省長咨復省議會云爲咨復事案准貴會二百三十一號咨請將議決省垣軍事善後辦法各條切實辦理等由准此查第一條所載調查災情一節除由警廳調查外本公署現更令委專員四人分段調查務將死傷人數被災戶數及損失財產確數逐一查明登記一俟呈復至日再行分咨查照第二條先辦急賑一節本公署于四月二十三日卽令西川道遴委妥員分區趕辦現更電請中央撥款賑濟因財政廳現未存有中央解款無從截留第三條通告省垣秩序回復一事昨已布告并通令各縣知照在案第五條咨請督軍收束解散軍隊之携有槍枝者卽當查照辦理至舊日皇城現作督軍公署別無相當地點可以遷移且軍裝各庫關於兵事置備此項房室非鉅款莫辦大咨第五條所載一時尙難辦到相應備文咨復請煩查照此咨四川省議會暫署四川省長戴戡

工黨賑災已開辦

四川工黨會員李立生君介紹自流井王君谷貽堂委託該黨代辦臨時賑務並捐銀五百元已於五月二十日在三義廟着手開辦矣

康公廟建醮開壇

蔣耕堂君提倡於康公廟建設羅天大醮以超薦災區冤魂爰集四街街正熱心勸募聞日昨各街已募至二百餘串之多擇日開壇云

孔教會籌賑災民

省城此次變亂後各界慈善家均踴躍輸金以惠災黎今聞孔教會發起募賑由曾習之唐伯華楊靜川呂次濱諸君等主持已定於陰歷四月籌商進行